

COV HAUV PAUS XA LUS

COV HAUJ LWM

Hauj Lwm, Zaj 1

Cov lus qhib phau ntawv.

1 : 1 - 3.

1 1 Tes Os Fis Los, nyob hauv kuv thawj phau ntawv, kuv twb sau txog tas ib puas tsav yam uas Yes Xus tau ua thiab tau qhia txij lub hauv paus los, 2 mus txog hnub uas Ntuj nqa nws mus saum ntuj. Thaum nws yuav mus, Leej Ntuj Plig Ntshiab tshoj kom nws xub qhia cov Hauv Paus Xa Lus uas nws tau xai. 3 Thaum nws raug luag tsim txom tas, nws yees tawm los xyuas cov Hauv Paus Xa Lus. Nws ua ntaw uam zeem tseeb tias nws muaj txoj sia, nws tawm los rau lawv pom plaub caug hnub, nws tham txog Tswv Ntuj lub Ceeb Tsheej rau lawv.

Yes Xus nrog cov thwj tim tham zaum kawg. 1 : 4 - 8.

4 Thaum Yes Xus nrog lawv nyob, nws hais rau lawv kom tsis txhob tawm hauv Yes Lus Xas Les mus, kom lawv nyob tos Leej Txiv lo lus cog tseg :

"Lo lus uas nej hnov kuv hais tias :

5 Zam ua kab ke ntxuav nyob hauv dej. Hos nej, mas tshuav hnub puav xwb, nej yuav txais kab ke ntxuav nyob hauv Leej Ntuj Plig Ntshiab."

6 Thaum cov Hauv Paus Xa Lus nyob ua ke, lawv nug Yes Xus tias :

"Huab Tais, nyem no puas yog lub sij hawm koj yuav rov tsa tus vaj His Xas Lais ?"

7 Yes Xus hais rau lawv tias :

"Tsis yog nej hauj lwm yuav paub txog lub zim txwv thiab lub sij hawm uas Leej Txiv siv nws lub hwj huam los teem cia.

8 Tab sis, Leej Ntuj Plig Ntshiab yuav

nqes los saum nej, ces nej yuav txais hwj huam, nej yuav ua kuv cov tim khawv nyob Yes Lus Xas Les, nyob thoob lub xeev Yus Das, thiab Xas Mas Lias, mus txog paug tim npoo ntiaj teb."

Yes Xus nce saum ntuj. 1 : 9 - 11.

9 Yes Xus hais cov lus no tas, nws nce zuj zus ntawm lawv qhov muag. Muaj ib tw huab los thaiv ces lawv tsis pom nws lawm. 10 Thaum Yes Xus nce mus saum ub lawm, mas lawv nyob ntsia ntsoov lub ntuj, ces muaj ob tug neeg hnav tsoos dawb los cuag lawv. 11 Nkawd hais tias : "Cov Nkas Lis Lais, vim li cas nej nyob ntsia ntsoov lub ntuj zoo li no ? Tus Yes Xus uas Ntuj nqa nws hauv nej mus rau saum ntuj lawd, nws yuav rov los zoo nkaus li nej pom nws nce mus saum ntuj thiab."

Cov thwj tim nyob saum chav tsev siab. 1 : 12 - 14.

12 Cov thwj tim nqes pem lub roob uas hu ua "Txiv Ntoo Roj" rov mus rau Yes Lus Xas Les. Lub roob ntawd nyob ze ntawm Yes Lus Xas Les li ntu kev uas hnub Xas Npas Tos kheev mus.

13 Thaum lawv rov los txog, lawv nce mus saum chav tsev siab uas yog lawv qhov chaw nyob : muaj Pob Zeb thiab Zam,

Yas Kos thiab As Nres,

Fis Lis Pos thiab Tos Mas,

Npas Tos Los Mas Yos thiab Mas Tais,

Yas Kos uas yog As Fas Yos tus tub,

thiab Xis Moos Siab Kub,

Yus Das uas yog Yas Kos tus tub.

14 Tas lawv cov no sawv daws koom ib

lub siab, lawv kub siab teev ntuj. Muaj ob peb tug poj niam nrog lawv thiab. Nyob hauv cov poj niam ntawd, muaj Mab Liab uas yog Yes Xus niam, thiab muaj Yes Xus cov kwv tij.

Xaiv Mas Thias ua Hauv Paus Xa Lus. 1 : 15 - 26.

15 Lub caij ntawd, muaj ze ntawm ib puas nees nkaum leej tuaj sib txoos ua ke. Pob Zeb sawv ntsug hauv nruab nrab cov kwv tij, nws hais tias :

16 "Kwv tij sawv daws, cov lus uas Leej Ntuj Plig kom sau rau hauv Ntaww Ntshiab yuav tsum tshwm sim tuaj. Leej Ntuj Plig siv Das Vis lub ncauj hais txog Yus Das, uas yog tus coj luag kev tuaj ntes Yes Xus. 17 Yus Das yog ib tug nyob hauv peb. Yes Xus faib ib txog hauj lwm xws li peb txoj rau nws ua. 18 Tab sis tus neeg ntawd muab tus nqi uas tau ntawm nws lub siab tsis ncaj, mus muas ib thaj av. Nws thiaj poob rau hauv pem teb, taub hau ua ntej, yav nruab nrab tawg rhe, nws tej plab hnyuv dhia tas. 19 Tas cov neeg nyob Yes Lus Xas Les paub qhov ntawd, lawv thiaj hu thaj av no hauv lawv xeem lus tias : Has Kes Das Mas, txhais tias Teb Ntshav. 20 Ntaww Nkauj Paj Nruag sau tias : *Cia nws lub tsev nphob xuav mus, kom txhob muaj neeg nyob hauv nws lub tsev. Ntaww tseem hais tias : Cia lwm tus ua nws cov dej num.*

21 Vim li ntawd, cov neeg uas tau nrog peb ua ke tas lub caij Huab Tais Yes Xus nrog peb mus mus los los, 22 txij hnub Zam ua kab ke ntxuav los txog hnub uas Ntuj nqa nws hauv peb mus lawd, mas yuav tsum muaj ib tug hauv cov neeg ntawd los nrog peb ua tim khawv txog nws txoj kev sawv rov los."

23 Ces lawv coj tau ob leeg los, yog tus Yos Xes Npas Xas Npas, uas sawv daws hu nws ua Zus Tws, thiab Mas Thias.

24 Lawv thov Ntuj li no : "Huab Tais, koj paub sawv daws lub siab tas huv si. Thov koj qhia saib tus twg yog tus koj xaiv 25 los leg cov dej num tshaj lus uas Yus Das tso pov tseg, vim nws khiav mus nraim hauv nws qhov chaw."

26 Ces lawv rho ntawv, txoj hmoo los raug Mas Thias. Lawv thiaj muab nws los ntxiv rau pab Kaum Ib leeg Hauv Paus Xas Lus.

Leej Ntuj Plig nqes los. 2 : 1 - 13.

2 1 Thaum txog lub Hnub Nyoog Tsib Caug, tas cov thwj tim huv tib si tuaj sib txoos ua ke. 2 Ib sij huam, txawm muaj ib lub suab nrov saum ntuj tuaj xws li ib nthwv cua hlob hlob ntsawj, lub suab ntawd nrov thoob plaws lub tsev uas lawv nyob. 3 Ces lawv pom tej ntshua nplaim zoo li nplaim taws, ncau ua tej tus nplaim me ya tuaj tsaws saum cov thwj tim txhua tus. 4 Lawv sawv daws tau txais Leej Ntuj Plig Ntshiab puv hauv lawv, ces lawv pib hais ntau xeem lus raws li Leej Ntuj Plig pub kom lawv hais tau.

5 Thaum ntawd, muaj ib co Yus Das kub siab ntseeg tuaj ntawm tas cov teb chaws hauv lub qab ntuj khwb tuaj nyob Yes Lus Xas Les. 6 Thaum lawv hnov lub suab nrov, tas ib tsoom neeg tuaj ntsauv vij vog. Sawv daws ua siab poob nthav vim tias thaum cov thwj tim hais lus, mas lawv nyias hnov hais nyias xeem lus.

7 Lawv ceeb tas nrho, xav tsis thoob, ces lawv hais tias :

"Tas cov neeg uas hais lus ntawd, lawv tsis yog ib co Nkas Lis Lais lod ? 8 Ua li cas peb thiaj nyias hnov lawv hais nyias

xeem lus ? 9 Peb yog ib co neeg Pas Tos, Mes Dias, Es Las Mias, peb nyob Mes Xos Pos Tas Mias tuaj, Yus Das, Kas Pas Dos, Poos Tus, As Xias, 10 Fis Zias, Pas Fis Lias, nyob Hais Nkws Tos thiab Lis Npias teb chaws uas ze Xis Les Nas, peb yog neeg Los Mas tuaj nyob ntawm no. 11 Peb yog ib co Yus Das thiab ib co teev dab txais kev ntseeg, ib co Khes Tas, As Las Npias, peb puav leej hnov lawv hais peb xeem lus cav txog Tswv Ntuj lub hwj chim."

12 Tas sawv daws poob siab, lawv xav tsis thoob, lawv thiaj ib leeg hais rau ib leeg tias :

"Qhov ntawd yog dab ts'i ? "

13 Tab sis, lwm cov thuam tias :

"Lawv haus cawv tshiab lawv quag cawv xwb."

Pob Zeb tshaj lub Moo Zoo rau tsoom sid. 2 : 14 - 36.

14 Pob Zeb nrog Pab Kaum Ib leeg sawv ntsug, nws hais cov lus no nrov nrov tias : "Cov Yus Das, thiab tas nej cov uas nyob hauv Yes Lus Xas Les, nej yuav tsum paub qhov no, nej tig ntsej los mloog kuv cov lus mog. 15 Cov neeg no tsis quag cawv zoo li nej hais. Vim tias nyuam qhuav txog cuaj teev sawv ntxov xwb.

16 Qhov tshwm sim no yog qhov uas Yaj Saub Yos Es tau hais tias : 17 Tswv Ntuj hais tias :

Thaum txog hnub kawg, kuv yuav tso kuv lub Tswv Yim los rau saum txhua leej txhua tus uas muaj lub cev nqaij. Ces nej cov tub cov ntxhais yuav ua yaj saub. Nej cov hluas yuav yees pom tej yam qhov muag pom tsis tau. Nej cov laus yuav ua tej zaj npau suav.

18 *Hnub ntawd, kuv yuav tso kuv lub Tswv Yim nqes los rau saum kuv cov tub*

txib ntxhais txib, ces lawv yuav ua yaj saub. 19 Kuv yuav ua ib co hwj huam loj nyob saum ntuj, thiab ua ib co cim nyob hauv ntiaj teb : uas zoo li ntshav, zoo li hluav taws, thiab zoo li ncej pa taws.

20 Lub hnub yuav tsaus ntuj nti tuaj, lub hli yuav hloov ua ntshav. Ces thaum ntawd txog Huab Tais Hnub. Yog hnub loj thiab nto koob meej. 21 Ces leej twg hu txog Huab Tais lub npe, mas nws yuav txais kev cawm.

22 "Cov His Xas Lais, nej mloog cov lus no mog : Yes Xus Nas Xas Les yog tus uas Tswv Ntuj pom zoo kom nws ua hwj huam yees ntxwv, ua cov dej num nto moo, thiab ua ib co cim nyob hauv nej. Yog Tswv Ntuj pub kom nws ua tau li ntawd. 23 Tus neeg ntawd, luag muab nws muag rau nej, raws nraim li Tswv Ntuj tau teem tseg nyob hauv nws txoj kev paub yav tom ntej. Nej kom cov neeg tsis hwm txoj cai xuas lawv txhais tes mus tua nws, thiab muab nws ntsia saum ntoo cuam. 24 Tswv Ntuj tsa nws sawv rov los, thiab npo nws ntawm txoj kev mob hauv qhov tuag. Vim tias kev tuag tsis muaj hwj huam tuav tau nws cia.

25 Das Vis twb hais txog nws tias : *Kuv pom Huab Tais nyob ntawm kuv xub ntiaj tsis tseg. Huab Tais nyob ntawm kuv sab xis, kom kuv txhob qaij txhob quag. 26 Yog vim li ntawd kuv lub plawv thiaj xyiv fab hlo, kuv tus nplaig hom khaj. Kuv cev nqaij muaj sia nyob hauv txoj kev tso siab. 27 Vim koj yuav tsis tso kuv tus plig pov tseg rau hauv ntuj txias teb tsaus, koj yuav tsis cia koj tus Ntshiab lub cev lwj. 28 Koj ua kom kuv paub cov kev mus hauv txoj sia. Koj cia kuv pom koj lub ntsej muag kom kuv xyiv fab.*

29 Kwv tij sawv daws, kuv thov hais meej rau nej txog tus yawg koob Das Vis tias : nws tuag thiab nws mus zwm av

lawm. Nws lub ntxa tseem nyob rau peb pom txog niaj hnub no. 30 Tiam sis Das Vis yog ib tug yaj saub, mas nws paub tias Tswv Ntuj twb cog lus rau nws yuav cia nws ib tug xeeb ntxwv uas yog nws cov roj ntsha zaum nws lub theej kiab.

31 Das Vis twb xub pom tias Leej Pleev yuav sawv rov los, ces nws thiaj qhia tias : Ntuj yuav tsis tso nws pov tseg rau hauv tub tuag teb, thiab nws lub cev nqaij yuav tsis lwj.

32 Tus Yes Xus ntawd, Tswv Ntuj tsa nws sawv rov los lawm. Peb ua taus tim khawv. 33 Nyem no Tswv Ntuj sab xis tsa Yes Xus nyob siab. Nws tau txais Leej Ntuj Plig Ntshiab ntawm Leej Txiv, vim Leej Txiv yeej tau cog lus li ntawd. Yes Xus thiaj tso Leej Ntuj Plig los rau sawv daws : yog qhov uas nej pom thiab nej hnov. 34 Das Vis mas nws tsis tau nce mus saum ntuj. Tsis kav nws tau hais tias : *Huab Tais hais rau kuv tus Huab Tais tias* : Koj zaum ntawm kuv sab xis, 35 mus txog thaum kuv muab koj cov yeeb ncuab los ua rooj rau koj tiag taw. 36 "Tsoom His Xas Lais, nej yuav paub meej tias : Tswv Ntuj tsa tus Yes Xus uas nej tau dai saum ntoo cuam, ua Huab Tais thiab ua Leej Pleev."

Thawj pab neeg tig los ntseeg txog Yes Xus. 2 : 37 - 41.

37 Cov lus ntawd raug sawv daws lub siab. Ces lawv hais rau Pob Zeb thiab rau cov Hauv Paus Xa Lus tias : "Kvv tij, peb yuav ua dab tsi ?"

38 Pob Zeb teb rau lawv tias : Nej yuav thov txhaum, thiab nej txhia leej txhia tus yuav txais lub cim ntxuav nyob hauv Yes Xus Pleev lub npe kom Ntuj zam txhaum rau nej. Ces nej yuav txais Leej Ntuj Plig Ntshiab cov paj tshab.

39 Vim thaum Ntuj cog lus, mas yog nws cog lus yuav muab rau nej, thiab rau nej cov me nyuam, rau cov neeg nyob deb, thiab rau tsoom neeg coob coob uas Huab Tais peb tus Tswv Ntuj yuav hu lawv los."

40 Pob Zeb tseem hais ntau lo lus qhuab qhia thiab ntuas lawv. Nws hais tias : "Nej khiav kom nej dim ntawm tiam neeg xib rau kev phem no."

41 Cov neeg ntawd mloog Pob Zeb cov lus, lawv txais lub cim ntxuav. Hnub ntawd, muaj ze ntawm peb txhiab leej los ntxiv cov thwj tim.

Thawj pab ntseeg nyob li cas.

2 : 42 - 47.

42 Lawv nquag tuaj mloog cov Hauv Paus Xa Lus qhia lawv. Sawv daws koom siab ua ib pab kvv tij, ua kab ke lov ncuav mov thiab teev ntuj ua ke.

43 Tas tsoom sid hwm, vim cov Hauv Paus Xa Lus ua ntau hom dej num zoo kawg thiab ua ib co cim ntau. 44 Cov ntseeg muab lawv lub cuab tam los tso ua ke. 45 Lawv muab lawv tej cuab yeej cuab tam muag, lawv muab tus nqi los faib rau sawv daws raws li nyias tej chaw siv. 46 Lawv niaj hnub koom ua ib lub siab, lawv nquag mus tom lub Tuam Tsev Teev Ntuj. Lawv ua kab ke ntais ncuav mov nyob hauv lawv cov tsev, sawv daws noj luag ntxhwu ntxhi, nyob muaj siab kaj lug.

47 Lawv cav lus zoo txog Tswv Ntuj. Tsoom pej xeem pom lawv zoo. Huab Tais niaj hnub coj cov neeg uas Ntuj cawm tau lawv los ntxiv rau lub txoos.

Tus tuag ceg ntawm lub Qhov Rooj Zoo Nkauj. 3 : 1 - 10.

- 3** 1 Pob Zeb thiab Zam nkawd nce mus pem lub Tuam Tsev Teev Ntuj, mus ua zaj teev ntuj thaum teev cuaj.
- 2 Thaum ntawd, luag coj ib tug neeg tuag ceg nruab thiab tuaj. Lawv niaj hnub muab nws tso rau ntawm lub qhov rooj mus hauv lub Tuam Tsev Teev Ntuj, uas hu ua Zoo Nkauj, kom tus tuag ceg tau kev thov khawv ntawm cov neeg uas chaws mus hauv. 3 Thaum nws pom Pob Zeb thiab Zam nkawd tab tom yuav chaws mus hauv, ces nws thov khawv ntawm nkawd. 4 Pob Zeb ntsia ntsoov nws, Zam kuj ntsia ntsoov thiab.
- Pob Zeb hais tias :
"Koj ntsia wb."
- 5 Tus tuag ceg ntsia ntsoov nkawd, tsis ntsais muag, nws xav tias nws yuav tau ib Yam dab tsi. 6 Tab sis Pob Zeb hais tias : "Nyiaj thiab kub mas kuv tsis muaj. Tab sis qhov kuv muaj, mas kuv muab pub rau koj : Kuv tuav txog Yes Xus Pleev, tus Nas Xas Les lub npe, koj mus kev !"
- 7 Ces Pob Zeb tuav nkaus tus tuag ceg sab tes xis, rub nws sawv. Tam sim ntawd, nws ob txhais taw thiab nws ob lub pob luj taws ruaj nrees tuaj. 8 Nws tib plhaw, sawv tsees, ces nws mus taus kev. Nws nrog nkawd chaws mus hauv lub Tuam Tsev. Nws rhais ruam mus kev, nws dhia tej paj paws thiab nws cav txog Tswv Ntuj. 9 Tas tsoom pej xeem pom nws rhais ruam mus kev thiab cav txog Tswv Ntuj. 10 Sawv daws zeem tau nws : yog tus zaum thov khawv ntawm lub Qhov Rooj Zoo Nkauj tiag. Sawv daws ntshai, ua siab poob nthav txog qhov uas nyuam qhuav tshwm sim tuaj rau tus tuag ceg.
- 11 Tus tuag ceg tsis tso Pob Zeb thiab Zam nkawd tseg li. Ces tas tsoom pej xeem ntshai, lawv khiav tuaj vij nkawd nyob hauv lub qab ruv tsev uas hu ua Xas Los Moos.
- 12 Pob Zeb pom li ntawd, nws hais rau tsoom pej xeem hais tias : "Cov His Xas Lais, vim li cas nej poob siab rau qhov ntawd ? Vim li cas nej qhov muag ntsia ntsoov rau peb, xws li peb yog neeg muaj hwj huam thiab txawj thov Ntuj, ua kom tus neeg ntawd mus taus kev ? 13 Yog Has Nplas Has, His Xas Has, thiab Yas Kos tus Tswv Ntuj, thiab peb cov yawg koob tus Tswv Ntuj muab koob meej rau nws tus tub txib Yes Xus, uas nej muab nws ntes. Thaum Pis Las Tos xav tso nws mus, mas nej tsis kam lees nws. 14 Nej tsis lees tus siab Ntshiaj thiab siab Ncaj. Nej thov kom luag zam rau ib tug tua neeg. 15 Hos nej muab tus Tswv pub txoj sia tua. Tiam sis Tswv Ntuj tsa nws sawv hauv cov tub tuag rov los lawm. Peb ua tim khawv pom. 16 Yog vim peb ntseeg txog nws lub npe, mas nws lub npe thiaj li ua kom tus neeg ntawd muaj zog, uas yog tus nej pom kam nws thiab paub nws. Yog t xo kev ntseeg txog Yes Xus tsa tus neeg ntawd kom nws lub cev zoo hlo rau ntawm nej xub ntiag.
- 17 Kvw tij sawv daws, kuv paub hais tias thaum nej ua li ntawd, nej yeej tsis paub dab tsi. Nej cov nom los kuj tsis paub thiab. 18 Li ntawd, Tswv Ntuj ua raws li nws tau xuas cov Yaj Saub lub ncauj xub hais ntxov los tias nws Leej Pleev yuav raug luag tsim.
- 19 Ua li mas nyem no, nej yuav thov txhaum thiab nej yuav tig los hloov ib lub siab tshiab kom Ntuj so nej cov txhaum.
- 20 Ces Huab Tais yuav pub ib co sij hawm zam rau sawv daws, thiab nws

**Pob Zeb qhia tsoom sid nyob hauv
lub qab ruv tsev Xas Los Moos.**

3 : 11 - 26.

yuav xa tus uas nws ib txwm npaj cia ua
 Leej Pleev tuaj rau nej : Yes Xus, 21
 tus uas lub ntuj yuav tau txais nws mus
 txog lub zim txwv tas txhia yam yuav rov
 plhis dua tshiab. Raws li Tswv Ntuj xuas
 nws cov yaj saub ntshiab lub ncauj xub
 qhia thaum ub.
 22 Mais Xes xub hais tias : Huab Tais
 Tswv Ntuj yuav muab nej ib tug kww tij
 tsa ua Yaj Saub xws li kuv. Nej yuav
 mloog tas puas tsav yam nws qhia rau nej.
 23 Leej twg tsis mloog tus Yaj Saub
 ntawd, mas luag yuav muab nws thanu
 ntawm peb haiv neeg mus.
 24 Tas cov yaj saub tom qab no, txij Xas
 Muas los rau cov hloov nws, sawv daws
 kuj tau hais txog tej yam uas tshwm sim
 ob peb hnub no. 25 Nej yog cov yaj
 saub ntawd cov tub. Nej yog cov neeg
 txais lo lus Tswv Ntuj cog rau peb cov
 yawg koob, raws li Tswv Ntuj hais rau
 Has Nplas Has tias :
*Tas ib tsoom haiv neeg nyob ntiaj teb no
 yuav tau txais ib txog hmoov zoo nyob
 hauv koj cov xeeb zeeb ntxwv.*
 26 Yog vim nej, mas Tswv Ntuj thiaj tsa
 nws Leej Tub sawv rov los, thiab Tswv
 Ntuj tso nws tuaj foom hmoov zoo rau nej
 thiab pab nej ncaim ntawm nej txoj kev
 phenem."

kaw hauv tsev loj faj txog kaj ntug, vim
 thaum ntawd twb tsaus ntuj lawm.
 4 Tiam sis muaj ntau leej uas tau hnov
 nkawd lo lus kuj txais kev ntseeg. Tsuas
 suav cov txiv neej xwb, cov ntseeg muaj
 nto tsib txhiab leej.
 5 Hnub tom qab, cov nom tswv Yus Das,
 cov laus neeg, thiab cov kws ntawv, sawv
 daws tuaj sib sau nyob Yes Lus Xas Les.
 6 Tus thawj leej choj As Nas kuj nyob
 ntawd, Kais Fas, Yos Nas Thas, As Les
 Xas Nrias thiab cov uas yog caj ces ua
 leej choj puav leej tuaj nyob ntawd tas
 huv tib si. 7 Lawv kom luag coj ob tug
 Hauv Paus Xa Lus los, ces lawv nug
 nkawd tias :
 "Leej twg muab cai rau neb, thiab neb
 tuav txog leej twg lub npe los ua tej
 ntawd" ?
 8 Ces Pob Zeb muaj Leej Ntuj Plig nyob
 puv hauv nws, nws hais rau lawv tias :
 "Cov nom tswv coj tsoom pej xeem, thiab
 tsoom laus neeg sawv daws : 9 Hnub no,
 nej kom wb hais tseeb txog qhov tias ib
 tug tuag ceg zoo lawm, thiab tim li cas
 nws thiaj li zoo lawm. 10 Nej sawv
 daws, thiab tas tsoom His Xas Lais huv
 tib si, nej yuav paub tias tus neeg uas zoo
 hlo rau nej pom ntawd, mas yog vim Yes
 Xus Pleev lub npe. Yog tus Yes Xus Nas
 Xas uas nej muab dai saum ntoo
 cuam, tab sis Tswv Ntuj tsa nws sawv
 hauv cov tub tuag rov los. Yog vim Yes
 Xus lub npe xwb, tsis yog vim lwm tus.
 11 Yes Xus yog lub pob zeb uas nej cov
 txhim tsev tsis xav yuav. Zaum no nws
 yog thawj lub pob zeb txheem lub tsev.
 12 Vim nyob hauv lub qab ntuj khwb tsis
 muaj dua lwm lub npe yuav cawm tau
 peb."
 13 Cov nom txiav txim pom Pob Zeb
 thiab Zam nkawd lub siab tawv, thiab
 lawv pom tias nkawd yog neeg tsis tau

kawm txuj ci, thiab tsis muaj kev txawj ntse, ces cov kev txwj laus neeg ua siab poob nthav. Lawv kuj rov zeem tau tias nkawd yog cov uas tau nrog Yes Xus ua ke. 14 Ib ziag ntawd, lawv kuj pom tus neeg uas nkawd kho zoo, sawv ntsug nyob ze nkawd. Ces lawv tsis pom qab teb dab tsi.

15 Lawv kom coj nkawd tawm ntawm lub tsev txiav txim mus, ces lawv mam sab laj ua ke hais tias :

16 "Peb yuav ua dab tsi rau ob tug neeg ntawd ? Qhov tias nkawd tau ua ib yam hwj huam yees ntxwv loj kawg, mas tas cov neeg nyob Yes Xas Les paub tas lawm, peb dag tsis tau tias nkawd tsis tau ua. 17 Tiam sis yuav kom cov pej xeem tsis txlob ntseeg zuj zus ntxiv, mas peb yuav txwv nkawd, tsis pub nkawd hais txog lub Npe ntawd ntxiv rau leej twg li."

18 Ces lawv hu Pob Zeb thiab Zam nkawd rov los, lawv txwv tsis kheev nkawd hais dab tsi. 19 Tiam sis Pob Zeb thiab Zam nkawd teb hais tias :

"Yog nej thiaj paub txiav saib Tswv Ntuj

pom zoo wb mloog nej, los wb mloog

Tswv Ntuj. 20 Hos wb, mas yog wb tsis

tshaj tej yam wb tau pom tau hnov mas

wb nyob tsis taus."

21 Cov nom tswv tseem hem nkawd ntxiv, ces lawv tso nkawd mus : lawv tsis pom qab muab txim dab tsi rau nkawd, vim lawv ntshai cov pej xeem. Sawv daws cav txog Tswv Ntuj rau tej yam tshwm sim tuaj. 22 Tus neeg mob uas nkawd ua hwj huam yees ntxwv kho zoo muaj plaub caug tawm xyoo lawm.

**Cov Hauv Paus Xa Lus raug luag
hiam. Lawv thov Ntuj pab lawv.
4 : 23 - 31.**

23 Thaum lawv tso Pob Zeb thiab Zam

nkawd lawm, mas nkawd rov qab los nrog cov kwv tij nyob. Nkawd piav tej yam uas cov leej choj thiab cov txwj laus tau hais. 24 Sawv daws hnov li ntawd mas sawv daws tsa suab thov Tswv Ntuj tias : "Tswv Huab Tais, koj yog tus tsim lub ntuj lub teb, lub hiav txwv thiab tas ib puas tsav yam nyob hauv. 25 Yog koj nrog Leej Ntuj Plig Ntshiab qhia peb txiv Das Vis, koj tus tub txib, kom nws hais tias :

"Vim li cas tsoom kuj cuab yuav ua ntxhov hnyo, tsoom haiv neeg yuav xav txog tej yam tsis muaj tsim ? 26 Cov vaj nyob ntiaj teb sawv ntxeev siab, cov thawj coj ua tej pab tuav xam nrhiav kev tawm tsam tiv Huab Tais thiab nws Leej Pleev."

27 Nyob hauv lub nroog no, Hes Los thiab Poos Xyus Pis Las Tos nrog cov pej kum haiv neeg thiab nrog cov haiv neeg His Xas Lais sib koom ua rog rau koj Leej Tub Txib Ntshiab Yes Xus uas koj tau Pleev nws. 28 Lawv tsuas kawg ua raws li koj lub hwj huam, koj txhais tes thiab koj lub tswv yim tau teem puag ntxov los. 29 Huab Tais, nyem no koj ntsia saib lawv hem peb. Yog koj xav pab koj cov tub txib kom lawv muaj lub siab ruaj nreb tshaj koj lo lus, 30 mas thov koj cev tes los ua hwj huam yees ntxwv kho cov neeg mob, thiab ua tej yam txawv nyob hauv koj Leej Tub Txib Ntshiab Yes Xus lub npe."

31 Thaum lawv tab tom teev ntuj, mas qhov chaw lawv nyob qeeg nkaws. Leej Ntuj Plig Ntshiab los nyob puv lawv siab ntsws. Lawv rov ua siab ruaj nreb tshaj Tswv Ntuj lo lus.

**Thawj pab ntseeg kub siab coj cov
kev cai tshiab. 4 : 32 - 37.**

32 Tas ib tsoom ntseeg coob coob sawv

daws muaj ib lub siab, ib lub tswv yim xwb. Tej yam uas yog nws li, tsis kav tsis muaj leej twg yuav hais tias yog nws tug xwb. Nyias muab nyias tug los ua sawv daws tug. 33 Cov Hauv Paus Xa Lus muaj hwj huam loj, lawv ua tim khawv txog Huab Tais Yes Xus sawv rov los. Tsoom sid pom lawv zoo kawg. 34 Nyob hauv lawv, tsis muaj ib tug yuav tshaib nqhis dab tsi : vim tias cov uas muaj liaj muaj teb, muaj vaj tse, muab muag tas huv si, 35 lawv nqa tus nqi uas muag tau tuaj tso ntawm cov Hauv Paus Xa Lus ko taw. Lawv mam muab faib rau sawv daws kom nyias tau txaus nyias siv. 36 Muaj ib tug hu ua Yos Xes, cov Hauv Paus Xa Lus hu nws ua Npas Nas Npes - lub npe no txhais tias : tus txawj nplij neeg. Nws yog xeem Les Vis, nws yug los nyob Kws Plos. 37 Npas Nas Npes muaj ib daim teb, nws muab muag, nws coj cov nyiaj tuaj tso ntawm cov Hauv Paus Xa Lus ko taw.

As Nas Nias thiab Xas Fis nkawd dag. 5 : 1 - 11.

5 1 Muaj ib tug neeg hu ua As Nas Nias. Nws nrog nws poj niam Xas Fis hais haum tas, ces nkawd muab nkawd lub vaj muag. 2 Tiam sis nkawd zais ib nrab nqi cia. Tus txiv mam li nqa qhov seem tuaj tso ntawm cov Hauv Paus Xa Lus ko taw.

3 Pob Zeb hais rau nws tias : "As Nas Nias, vim li cas Xas Tas nyob puv hauv koj lub siab, koj thiab dag Leej Ntuj Plig Ntshia, thiab koj nyiag qee cov nyiaj nqi vaj ib nrab ? 4 Koj tsis muaj cai cia daim teb ntawd rau koj los ua cas ? Tab yog koj muab muag tas, koj ceev tus nqi tas huv si rau koj yuav kuj tau. Vim li cas koj lub siab thiab yuav xav tau phem

tas npaum li ntawd ? Koj dag li ntawd mas tsis yog koj dag rau neeg, yog koj dag rau Tswv Ntuj."

5 Thaum As Nas Nias hnov cov lus ntawd, nws cia li ntog, nws t xo sia tu nrho. Cov neeg hnov lub moo ntawd, sawv daws ntshai. 6 Cov tub hluas tuaj muab lub cev qhwv thiab coj mus los.

7 As Nas Nias twb tuag tas tau peb teev, nws poj niam mam lawv qab tuaj txog. Nws tsis paub dab tsi txog nws tus txiv.

8 Pob Zeb hu nws tias : "Koj hais rau kuv saib, neb muag neb daim teb tau npaum no lod ?"

Tus poj niam teb tias : "Yog tiag, wb muag tau npaum li ntawd."

9 Ces Pob Zeb hais rau nws tias : "Tim li cas neb yuav tuav xam dag Huab Tais lub Tswv Yim ? Koj saib ! cov neeg uas kwv koj tus txiv mus faus, lawv txhais taw twb los txog ntawm qhov rooj lawm. Lawv yuav kwv koj mus thiab."

10 Tus poj niam vau hlo Tam sim ntawd rau ntawm Pob Zeb ko taw, nws t xo sia tu nrho. Cov tub hluas los txog, lawv pom nws twb tuag lawm ; lawv kwv nws mus faus rau ntawm nws tus txiv. 11 Tas lub Koom Txoos thiab cov neeg tau hnov lub moo ntawd, sawv daws ntshai kawg.

Cov Hauv Paus Xa Lus ua hwj huam yees ntxwv. 5 : 12 - 16.

12 Ntuj siv cov Hauv Paus Xa Lus ob txhais tes los ua ntau lub cim thiab ntau yam hwj huam yees ntxwv nyob hauv tsoom pej xeem. Cov ntseeg koom siab koom ntsws tuaj nyob hauv lub qab ruv tsev Xas Los Moos. 13 Tsis muaj leej twg muaj cuab kav tuaj nrog lawv ua ke. Tab sis tsoom pej xeem cav lus zoo txog lawv. 14 Cov ntseeg los ntxiv coob zuj zus rau Huab Tais, tej pab txiv neej thiab

poj niam coob kawg... 15 Ces lawv coj cov neeg mob tuaj tso ntawm kev, lawv tso cov mob pw saum tej lub txaj thiab tej daim lev, kom thaum Pob Zeb hla los mus, nws tus duab ntxoov tus puav neeg mob. 16 Tsoom neeg coob coob ntawd tuaj ntawm cov zos tsis deb ntawm Yes Lus Xas Les tuaj. Lawv coj cov neeg mob thiab cov neeg raug dab tsis huv tuaj. Sawv daws puav leej zoo tas huv si.

**Luag ntes cov Hauv Paus Xa Lus.
Ntuj cawm lawv. 5 : 17 - 21.**

17 Tus thawj leej choj thiab nws cov tub ncig uas yog tog Xas Dus Kais, sawv tuaj cuam tshuam. Lawv khib kawg, 18 ces lawv ntes cov Hauv Paus Xa Lus coj mus pov rau huv tsev loj faj. 19 Tab sis hmo ntuj, Huab Tais tus Tshiab qhib cov qhov rooj huv tsev loj faj, nws coj lawv tawm sab nraud, ces nws hais rau lawv tias :
20 "Nej ua siab tawv qhawv mus tshaj cov lus muaj Txoj Sia rau tsoom pej xeem nyob huv lub Tuam Tsev Teev Ntuj."
21 Cov Hauv Paus Xa Lus ua raws li cov lus ntawd : thaum kaj ntug txoog, lawv chaws mus huv lub Tuam Tsev Teev Ntuj, ces lawv pib qhia.

**Cov Hauv Paus Xa Lus nyob ntawm
rooj txwj laus Xas Nes Nrees.
5 : 22 - 33.**

Thaum ntawd, tus thawj leej choj nrog nws cov tub ncig tuaj txog. Lawv hu cov txwj laus Xas Nes Nrees thiab lub rooj sab laj laus neeg huv cov tub His Xas Lais tas hu si tuaj. Ces luag tso neeg mus coj cov Hauv Paus Xa Lus tom tsev loj faj los. 22 Tab sis thaum cov zov keeb mus txog tom chaw, lawv tsis pom cov Hauv Paus Xa Lus nyob huv tsev loj faj.

Lawv thiaj rov los ceeb toom tias :
23 "Peb pom lub tsev loj faj kaw zoo, hos cov zov keeb nyob rawv ntawm cov rooj loog. Tab sis thaum peb qhib qhov rooj, peb tsis pom leej twg nyob sab hauv li."

24 Tus tswj zov lub Tuam Tsev Teev Ntuj thiab cov thawj leej choj hnov cov lus ntawd, lawv nyob hab nuv tsis to taub tias qhov ntawd yog vim li cas. 25 Ces txawm muaj ib tug neeg tuaj ceeb toom rau lawv tias :

"Cov neeg uas nej muab kaw hauv tsev loj faj, mas nyem no lawv nyob hauv lub Tuam Tsev Teev Ntuj qhia tsoom pej xeem."

26 Tus tswj zov lub Tuam Tsev thiaj nrog nws cov neeg mus coj cov Hauv Paus Xa Lus rov los. Lawv tsis ua phem rau cov Hauv Paus Xa Lus, vim lawv ntshai tsam tsoom pej xeem muab pob zeb los tua lawv.

27 Lawv coj los txog, lawv kom cov Hauv Paus Xa Lus mus sawv ntawm cov txwj laus Xas Nes Nrees xub ntiag. Tus Thawj leej choj nug cov Hauv Paus Xa Lus tias :

28 "Peb twb txwv nej, tsis kheev nej siv lub npe ntawd los qhia. Tab sis nej tseem qhia nej zaj ntawd mus thoob Yes Lus Xas Les. Nej puas xav kom tus neeg ntawd cov ntshav rov qab poob los rau saum peb ?"

29 Ces Pob Zeb nrog cov Hauv Paus Xa Lus teb tias :

"Yuav tsum mloog Tswv Ntuj lus zoo dua mloog neeg lus. 30 Tus Yes Xus uas nej muab nws dai saum ib tug ncej kom tuag, mas peb cov yawg koob tus Huab Tais tsa nws sawv rov los lawm. 31 Nws yog tus uas Tswv Ntuj txhais tes xis tsa nws siab kom nws ua tus Thawj thiab tus Cawm Seej. Yog vim nws, mas Tswv Ntuj thiaj pub txoj kev thov txhaum thiab kev zam

txhaum rau His Xas Lais. 32 Peb yog cov tim khawv pom tej yam ntawd. Leej Ntuj Plig Ntshiab uas Tswv Ntuj pub rau cov neeg mloog nws lus kuj ua tim khawv txog tej yam ntawd thiab."

33 Lawv hnov li ntawd mas lawv npau taws kawg, lawv npaj yuav muab cov Hauv Paus Xa Lus tua.

Nkas Mas Lias pab cov Hauv Paus Xa Lus. 5 : 34 - 42.

34 Ces ib tug Fas Lis Xais hu ua Nkas Mas Lias sawv hauv cov txwj laus Xas Nes Nrees. Nws yog ib tug kws Txoj Cai uas tas tsoom pej xeem hwm. Nws hais kom coj cov Hauv Paus Xa Lus tawm mus ib pliag. 35 Ces nws hais rau cov txwj laus Xas Nes Nrees tias :

"Cov His Xas Lais, nej yuav xyuam xim rau tej yam nej ua rau cov neeg ntawd. 36 Tau tsis ntev muaj ib tug hu ua Thaws Das. Nws hais tias nws yog ib tug loj. Nws sau tau kwv yees plaub puas leej neeg. Tab sis nws raug luag tua tuag, ces nws cov neeg tawg tas, tsis tshuav ib tug li.

37 Tom qab no, lub zim txwv txheeb tsoom mej hwm, mas Yus Das tus uas nyob Nkas Lis Lais kuj sawv. Nws coj tau coob leej raws nws qab. Nws kuj tuag thiab, ces cov neeg uas raws nws tawg tas. 38 Ua li mas, nyem no, kuv hais rau nej tias nej tsis txhob quav ntsej rau cov neeg ntawd, nej tso plhuav lawv. Vim tias yog lawv cov lus thiab lawv t xo kab xwm tuaj ntawm neeg tuaj, mas t xo kab xwm ntawd nws yuav rov rhuav nws ploj mus. 39 Hos yog tias lawv t xo kab xwm tuaj ntawm Tswv Ntuj tuaj tiag, mas nej yeej rhuav tsis tau. Nej tsis txhob tuam yim, tsam nej lam ua rog tiv Tswv Ntuj." Sawv daws yuav Nkas Mas Lias zaj tswv

yim. 40 Lawv hu cov Hauv Paus Xa Lus kom rov los hauv tsev. Lawv kom luag muab cov Hauv Paus Xa Lus nplawm tas, lawv txwv tsis pub tuav txog Yes Xus lub npe los qhia. Ces lawv tso cov Hauv Paus Xa Lus mus. 41 Cov Hauv Paus Xa Lus tawm ntawm lub rooj txwj laus Xas Nes Nrees, lawv zoo siab vim Ntuj saib lawv tsim nyog raug luag hiam vim Lub Npe. 42 Lawv niaj hnub nyob hauv lub Tuam Tsev Teev Ntuj thiab nyob hauv lawv tsev qhia thiab tshaj txog Yes Xus lub Moo Zoo tsis tseg.

**Lawv tsa ib co tub tsob hwb.
6 : 1 - 7.**

6 1 Lub caij ntawd, cov thwj tim huam vam coob zuj zus. Ces cov Hes Las yws yws cov Hes Nplaws. Lawv hais tias niaj hnub thaum faib mov mas tsis muaj neeg nco txog cov poj ntsuam Hes Las. 2 Pab Kaum Ob hu cov thwj tim tuaj sab laj, lawv hais tias :

"Tsis phim peb yuav tso Tswv Ntuj lo lus tseg, mus saib cov rooj noj mov. 3 Kwv tij, nej nrhiav nyob hauv nej, xya leej txiv neej nto moo zoo, uas yog neeg thoob tsib, thiab muaj Leej Ntuj Plig nyob puv hauv lawv. Peb yuav tsa lawv tuav t xo hauj lwm ntawd. 4 Hos peb, mas peb yuav muab siab hlo npuab t xo kev teev ntuj thiab tsob hwb Lo Lus."

5 Cov lus no haum lub t xoos siab, ces lawv xaiv Tes Fas Nos, uas nws yog ib tug neeg ntseeg ruaj, thiab muaj Leej Ntuj Plig Ntshiab nyob puv hauv nws. Fis Lis Pos, Plos Kos Los, Nis Kas Nos, Tis Moos, Pas Mes Nas, thiab Nis Kos Las uas yog ib tug neeg ntseeg nyob As Nthias Kias tuaj. 6 Lawv coj cov neeg no los rau cov Hauv Paus Xa Lus. Cov Hauv Paus Xa Lus thov ntuj tas, ces lawv

tsa tes rau saum xya leej ntawd.
 7 Huab Tais lo lus hlob zuj zus. Cov thwj tim huam vam coob kawg nyob Yes Lus Xas Les. Muaj ib co leej choj coob kawg los mloog txoj kev ntseeg.

Lawv ntes Tes Fas Nos. 6 : 8 - 15.

8 Tes Fas Nos yog ib tug neeg muaj txiaj ntsim thiab muaj hwj chim. Nws ua ib co hwj huam yees ntxwv thiab ib co cim loj kawg nyob hauv tsoom pej xeem. 9 Ces muaj ib co neeg tuaj ntawm lub Tsev Txoos uas hu ua cov Qhev Dim Txim lub ; lawv yog ib co neeg nyob Xis Les Nas tuaj, nyob As Les Xas Nrias tuaj, thiab ib co nyob Xis Lis Xias, thiab nyob As Xias tuaj. 10 Lawv nrog Tes Fas Nos sib cav. Tab sis lawv cav tsis yeej Tes Fas Nos, vim nws yog neeg thoob tsib, thiab yog Leej Ntuj Plig qhia nws hais.

11 Ces lawv xiab ib co neeg kom liam tias :

"Peb hnov tus neeg ntawd hais ib co lus thuam Mais Xes thiab thuam Tswv Ntuj."

12 Lawv haub tsoom pej xeem, tsoom laus neeg, thiab tsoom kws ntawv kom sawv daws npau taws. Ces lawv nyas tuaj ntes Tes Fas Nos, lawv coj nws mus rau ntawm lub rooj txwj laus Xas Nes Nrees.

13 Lawv coj ib co tim khawv cuav tuaj liam tias :

"Tus neeg ntawd hais lus phenem tsis tseg txog lub Tsev Ntshiab no thiab txog Txoj Cai. 14 Peb tau hnov nws hais tias Yes Xus, tus Nas Xas Les, yuav rhuav lub Chaw no, thiab nws yuav hloov tej kab ke uas Mais Xes muab rau peb."

15 Tas cov uas zaum hauv lub rooj txwj laus Xas Nes Nrees ua qhov muag tav zas tuaj ntsia Tes Fas Nos, lawv pom Tes Fas Nos lub ntsej muag zoo xws li ib tug

Tshiab lub ntsej muag.

Tes Fas Nos cov lus qhia.

7 : 1 - 54.

7 1 Tus thawj leej choj nug hais tias : "Puas muaj li ntawd tiag ?"

2 Tes Fas Nos teb hais tias :

"Kwv tij, thiab tsoom txiv, nej mloog mog ! Tus Tswv Ntuj muaj koob meej tawm los rau peb txiv Has Nplas Has pom thaum nws nyob Mes Xos Pos Tas Mias teb, tsis tau tsiv mus nyob Has Laas.

3 Tswv Ntuj hais rau Has Nplas Has tias : *Koj tso koj lub teb chaws tseg, tso koj cov kwv tij neej tsa tseg, koj mus nyob lub teb chaws uas kuv yuav qhia rau koj.*

4 Ces Has Nplas Has tso lub teb chaws Kas Des tseg, tsiv mus nyob Has Laas. Thaum Has Nplas Has txiv tuag tas lawm, ces Tswv Ntuj coj nws los nyob hauv lub teb chaws no, uas yog lub nej nyob niaj hnub no.

5 Tswv Ntuj tsis tau muab ib qho chaw los ua Has Nplas Has tug hauv lub teb chaws no, tab yog qhov nyuag chaw tiag ko taw twb tsis tau. Tsis kav, Tswv Ntuj cog lus tias yuav muab lub teb chaws rau nws ua nws tug, thiab thaum dua nws lawd, yuav muab rau nws cov xeeb ntxwv txawm hais tias nws tsis muaj ib tug me nyuam li.

6 Tswv Ntuj qhia nws tias nws cov xeeb ntxwv yuav mus nyob pej kum teb, luag yuav muab ua qhev, thiab luag yuav hiam lawv tas plaub puas xyoo. 7 Tab sis Tswv Ntuj hais tias :

"Kuv yuav txiav txim rau haiv neeg uas yuam koj tsoom xeeb ntxwv ua lawv qhev. Ces thaum dhau tej ntawd tas, lawv yuav tawm rov los, lawv yuav los teev kuv nyob ntawm thaj chaw no. 8 Tswv Ntuj thiaj muab lub cim txiav rau Has

Nplas Has ua ib txoj cai cog lus. Yog vim li no, thaum Has Nplas Has yug tau His Xas Has puv yim hnub, nws ua lub cim txiav rau His Xas Has. His Xas Has ua lub cim txiav rau Yas Kos. Yas Kos kuj ua lub cim txiav rau nws kaum ob leeg tub uas yog cov yawg koob.

9 Cov yawg koob khib Yos Xes, lawv muab nws muag rau luag coj mus tim Hais Nkws Tos teb. Tab sis Tswv Ntuj nrog nws nyob. 10 Tswv Ntuj rub nws tawm hauv nws tej kev txom nyem. Tswv Ntuj pub txiaj ntsim thiab kev thoob tsib rau nws nyob ntawm Fas Las Oos xub ntiag. Ces tus vaj Hais Nkws Tos tsa Yos Xes ua tus thawj saib Hais Nkws Tos teb chaws thiab saib tus vaj lub tsev tas huv si. 11 Nyob nyob ces tas Hais Nkws Tos teb thiab Kas Nas Has teb tshaib plab thiab txom nyem loj kawg. Peb cov yawg koob nrhiav tsis tau dab tsis noj li. 12 Yas Kos hnov tias nyob Hais Nkws Tos teb muaj mov noj, nws thiaj xa peb cov yawg koob mus nrhiav mov noj lawm nrad thawj zaug. 13 Zaum no, Yos Xes qhia nws cov tij laug tias nws yog leej twg, nws lub keeb thiaj tawm los rau Fas Las Oos paub. 14 Yos Xes xa neeg mus tos nws txiv Yas Kos thiab nws cov kwv tij kom los tas huv si. Lawv muaj xya caum tsib leeg. 15 Yas Kos nqes mus nyob Hais Nkws Tos teb, nws tas sim neej nyob nrad. Peb cov yawg koob kuj tas sim neej nyob Hais Nkws Tos teb thiab. 16 Luag coj lawv lub cev los rau Xis Kes, lawv muab tso rau hauv lub ntxa uas Has Nplas Has rho nyiaj mus muas ntawm Es Mos cov tub uas yog Xis Kes txiv.

17 Thaum yuav txog lub caij uas lo lus Tswv Ntuj cog rau Has Nplas Has tsheej xeeb, mas cov pej xeem nyob Hais Nkws Tos teb huam vam coob coob 18 mus

txog lub zwj ceeb uas ib tug vaj tshiab sawv kav. Tus vaj ntawd tsis nco qab txog Yos Xes lawm. 19 Nws ua nkhaus rau peb haiv neeg, nws ua lim hiam rau peb cov yawg koob : nws yuam kom lawv tso lawv cov me nyuam mos liab pov tseg, kom cov me nyuam ciaj tsis taus. 20 Thaum ntawd Mais Xes yug los. Tswv Ntuj pom nws zoo nraug. Lawv pub mis rau nws noj peb lub hlis nyob hauv nws txiv tsev. 21 Ces lawv muab nws tso pov tseg, Fas Las Oos tus ntxhais thiaj khaws nws los tu xws li ib tug tub uas nws yug. 22 Li ntawd Mais Xes thiaj tau kawm txhua yam txuj raws li cov Hais Nkws Tos. Nws muaj peev xwm hais lus thiab muaj peev xwm ua dej num.

23 Thaum Mais Xes muaj plaub caug tawm xyoo, mas nws xav tau tias nws yuav mus xyuas nws cov kwv tij His Xas Lais. 24 Nws pom ib tug Hais Nkws Tos tsim txom ib tug His Xas Lais, ces nws pab tus His Xas Lais rob caub : nws muab tus Hais Nkws Tos tua.

25 Mais Xes xav tias nyaj nws cov kwv tij yuav to taub tias yog Tswv Ntuj xuas Mais Xes txhais tes cawm lawv. Tab sis lawv tsis to taub li ntawd. 26 Hnub tom qab, Mais Xes tuaj txog hauv lawv. Nws pom ib co His Xas Lais sib ntaus, nws cheem lawv kom lawv rov sib haum. Nws hais rau lawv tias :

"Cov npawg, nej yog kwv tij, vim li cas nej ib leeg thiaj yuav rov ua phem rau ib leeg ?"

27 Ces tus uas ua phem rau nws tus kwv npawg thawb Mais Xes, thiab nws cem Mais Xes tias :

"Leej twg tsa koj ua hau los txiav txim rau wb ? 28 Koj puas xav muab kuv tua xws li koj tua tus Hais Nkws Tos nag hmo ?"

29 Mais Xes hnov cov lus ntawd, ces nws khiav mus nkaum nyob Mas Dias teb

chaws. Nyob teb chaws ntawd, nws muaj ob tug tub.

30 Plaub caug xyoo tom qab, ib tug Tshiab tawm los rau nws pom hauv cov nplaim taws cig cig hauv ib tsob pos kub hnyiab, nyob hauv teb chaws quav poj Xis Nais. 31 Mais Xes pom qhov yees tawm tuaj li ntawd, nws poob siab. Thaum nws txav los ze kom pom tseeb , nws hnov Huab Tais lub suab nrov tuaj hais tias :

32 "Kuv yog koj cov yawg koob tus Tswv Ntuj, yog Has Nplas Has, His Xas Has, thiab Yas Kos tus Tswv Ntuj."

Mais Xes tshee tshee, tsis muaj cuab kav tsa muag ntsia. 33 Ces Huab Tais hais rau Mais Xes tias :

"Hle nkawm khau ntawm koj ko taw, vim qhov chaw uas koj nyob yog ib thaj av ntshiab. 34 Kuv pom kuv haiv neeg txom nyem nyob Hais Nkws Tos teb. Kuv hnov lawv lub suab ntsaj, kuv thiaj nqes los npo kuv haiv neeg. Kuv xa koj mus lawm Hais Nkws Tos teb."

35 Tus Mais Xes no yog tus uas lawv tsis xav yuav, lawv thiaj hais rau nws tias : 'Leej twg tsa koj ua hau txiav txim ?' Tiam sis Tswv Ntuj xa nws mus ua lawv tus hau thiab tus txhiv lawv. Tswv Ntuj xa tus Tshiab tuaj nyob hauv tsob pos qhia kom ua li ntawd. 36 Mais Xes yog tus coj lawv khiav. Nws ua hwj huam loj thiab ua ib co cim nyob teb chaws Hais Nkws Tos, nyob hauv lub hiav txwv liab, thiab nyob teb chaws suab puam tas plaub caug xyoo. 37 Yog Mais Xes hais rau cov His Xas Lais tias :

"Tswv Ntuj yuav muab nej ib tug kwv tij tsa ua Yaj Saub coj nej xws li kuv."

38 Thaum lawv sib txoos ua ke nyob teb chaws suab puam, Mais Xes nrog Tus Tshiab nyob, Tus Tshiab hais lus rau nws nyob saum lub roob Xis Nais. Nws nrog

cov yawg koob nyob, vim nws tau txais cov lus muaj txoj sia kom nws muab pub rau peb. 39 Tiam sis peb cov yawg koob tsis mloog nws, lawv muab nws xyeeb pov tseg. Lawv lub siab yuj plaws rov rau Hais Nkws Tos teb. 40 Lawv hais rau As Loos tias :

Koj ua ib co tswv ntuj txawj mus kev ua peb ntej mas ! Vim tus Mais Xes uas coj peb tawm ntawm Hais Nkws Tos teb los, mas peb tsis paub tias dab tsi tuaj raug nws lawm.

41 Ces lub caij ntawd lawv thiaj puab ib tug mlom nyuj. Lawv tua tsiaj los txi tus mlom ntawd. Lawv tsob hwb tus mlom uas yog lawv txhais tes tsim. 42 Tswv Ntuj thiaj fee hlo ntawm lawv. Nws cia lawv teev cov hnub qub nyob saum ntuj, raws nraim li cov lus sau hauv cov Yaj Saub phau ntawv tias :

Tsev neeg His Xas Lais, nej muab tsiaj tua txi kuv, thiab cev paj tshab rau kuv plaub caug xyoo hauv teb chaws suab puam, los tsis yog ? 43 Tab sis nej nqa rawv Mos Los lub tsev tsam phooj, thiab coj rawv tus dab Les Faas lub hnub qub. Nej ua cov dab ntawd los rau nej teev. Vim li ntawd, kuv yuav coj nej mus nyob txim tim Npas Npis Los."

44 "Nyob teb chaws suab puam, peb cov yawg koob muaj lub Tsev Tsam Phooj Tim Khawv. Tus Tswv Ntuj uas hais lus rau Mais Xes, qhia kom Mais Xes ua lub tsev tsam phooj raws li tus piv txwv Mais Xes pom. 45 Thaum peb cov yawg koob tau lub tsev tsam phooj ntawd, mas lawv nrog Yos Xuas nqa lub tsev mus txog lub teb chaws uas lawv txeeb ntawm cov kuj cuab. Tswv Ntuj caum lwm cov kuj cuab khiav ntawm cov yawg koob hauv ntej. Lub tsev tsam phooj nyob ntawd mus txog hnub Das Vis sawv.

46 Das Vis ua xis Tswv Ntuj siab. Nws

thov kom Ntuj kheev nws nrhiav ib qho chaw rau Yas Kos tus Tswv Ntuj nyob. 47 Tab sis yog Xas Los Moos tau txhim ib lub tsev rau Tswv Ntuj. 48 Tsis kav tus Nyob Siab Tshaj tsis nyob hauv tej tsev uas neeg txhais tes ua. Tus yaj saub hais li no : 49 'Huab Tais hais tias : Lub ntuj yog kuv lub theej kiab. Lub ntiaj teb yog kuv lub rooj tiag taw. Nej yuav ua lub tsev twg rau kuv nyob ? Qhov twg thiaj yuav yog kuv lub chaw so ? 50 Tej ntawd tsis yog kuv txhais tes ua tas huv tib si lod ?' 51 Nej yog neeg xwb qwb txhav ! Uas lub siab thiab pob ntseg tsis txais lub cim txiav, nej thiaj tawv ncauj tsis mloog Leej Ntuj Plig Ntshiab. Nej cov yawg koob zoo li ntawd, nej kuj zoo li ntawd thiab.

52 Puas muaj ib tug yaj saub uas nej cov yawg koob tsis tau hiam ? Lawv tua cov yaj saub uas tau xub hais txog tus Siab Ncaj uas yuav tuaj. Tus Siab Ncaj yog tus uas nej nyuam qhuav ntxeev siab rau nws, thiab nyuam qhuav muab nws tua. 53 Nej tau txais Txoj Cai ntawm cov Tshiab los, tab sis nej tsis mloog Txoj Cai.

54 Thaum lawv hnov cov lus no, mas lawv npau taws ceev kawg. Lawv zim hniav zog rau Tes Fas Nos.

Lawv xuas pob zeb tua Tes Fas Nos. 7 : 55 - 60. 8 : 1- 3.

55 Leej Ntuj Plig Ntshiab nyob puv hauv Tes Fas Nos lub siab. Tes Fas Nos tsa muag ntsia ntsoov rau saum ntuj. Nws pom Tswv Ntuj lub hwj chim thiab pom Yes Xus sawv nyob ntawm Tswv Ntuj sab xis. 56 Ces nws hais tias :

"Kuv pom lub ntuj qhib lug, thiab pom Neeg Leej Tub sawv ntsug ntawm Tswv Ntuj sab xis."

57 Thaum ntawd, cov Yus Das nthe nrov nrov. Lawv pos pob ntseg. Sawv daws ua ib tsaug khiau mus nthos nkaus Tes Fas Nos. 58 Lawv thawb Tes Fas Nos mus rau sab nroog nraud, ces lawv txawb pob zeb tua nws. Cov tim khawv tso lawv tej khaub ncaws rau ntawm ib tug tub hluas ko taw. Tus hluas ntawd hu ua Xauv. 59 Thaum lawv tab tom txawb pob zeb tua Tes Fas Nos mas Tes Fas Nos hu txog Ntuj. Nws hais tias : "Huab Tais Yes Xus, thov koj txais kuv tus plig."

60 Ces nws txhos caug, nws hais ib lo nrov nrov tias : "Huab Tais, koj txhob muab qhov txhaum ntawd rau lawv ris."

Tes Fas Nos hais li ntawd tas, ces nws txoj sia tu.

8 1 Hos Xauv, mas nws pom zoo kom lawv muab Tes Fas Nos tua. Hnub ntawd, lub Koom Txoos nyob Yes Lus Xas Les raug luag hiam loj kawg. Tas sawv daws tawg mus nyob nruab liaj nruab teb, hauv cov xeev Yus Das thiab Xas Mas Lias. Tsuas tshuav cov Hauv Paus Xa Lus thiaj tsis khiau xwb.

2 Muaj ib co neeg hwm Ntuj tuaj muab Tes Fas Nos lub cev mus faus, thiab lawv quaj nyiav nws ntev ntev.

3 Hos Xauv, mas nws iab hiam lub Koom Txoos. Nws mus ib lub tsev dhau ib lub tsev, nws cab cov poj niam thiab cov txiv neej huv si coj mus pov rau hauv tsev loj faj.

Fis Lis Pos nyob Xas Mas Lias teb. 8 : 4 - 8.

4 Cov neeg uas tawg ncaim mus rau txhua qhov chaw, mas lawv tshaj lub Moo Zoo rau sawv daws mloog. 5 Yog vim li

ntawd, mas Fis Lis Pos thiaj li mus rau nram ib lub nroog nyob Xas Mas Lias teb. Nws tshaj lus txog Yes Xus nyob ntawd. 6 Tas tsoom sid koom siab koom ntsws npuab cov lus uas Fis Lis Pos hais, vim sawv daws hnov txog cov cim uas Fis Lis Pos ua thiab pom nws ua. 7 Vim tias cov neeg raug dab phem coob leej rov zoo los : cov dab phem ntawd tawm hauv cov neeg mus, dab qw tej suab nrov nrov. Cov tuag ceg thiab cov ceg tawv coob leej kuj cia li zoo hlo. 8 Nyob hauv lub nroog ntawd, mas sawv daws zoo siab tas nrho.

Pob Zeb thiab Zam nkawd mus Xas Mas Lias teb. 15 Nkawd nqes mus nram cov Xas Mas Lias, ces nkawd thov Ntuj rau lawv kom Ntuj pub Leej Ntuj Plig rau lawv. 16 Vim tias Leej Ntuj Plig tseem tsis tau poob los rau saum leej twg li. Lawv tsuas kawg tau txais lub cim ntxuav nyob hauv Huab Tais Yes Xus lub npe xwb. 17 Pob Zeb thiab Zam nkawd tsa tes rau saum lawv, ces lawv thiaj tau txais Leej Ntuj Plig Ntshiab. 18 Thaum Xis Moos pom tias yog vim cov Hauv Paus Xa Lus tsa tes, mas Ntuj thiaj pub Leej Ntuj Plig Ntshiab, ces nws muab nyiaj rau cov Hauv Paus Xa Lus. Nws hais tias :

19 "Neb muab lub hwj huam ntawd rau kuv thiab saib ! Kom kuv tsa tes rau saum leej twg, mas tus ntawd tau txais Leej Ntuj Plig Ntshiab thiab."

Tus txiv khawv koob Xis Moos.
8 : 9 - 25.

9 Thaum ntawd, nyob hauv lub nroog no muaj ib tug neeg hu ua Xis Moos. Nws txawj ua khawv koob, ces tsoom pej xeem Xas Mas Lias qhuas nws kawg. Nws khav tias nws yog ib tug neeg loj. 10 Tas sawv daws, tsis hais me hlob me yau, ntseeg nws. Sawv daws hais tias : "Tus neeg ntawd yog Tswv Ntuj lub hwj huam ! Yog lub hwj huam loj tiag !" 11 Lawv sawv daws raws nws, vim nws ua khawv koob tau ntev los rau sawv daws pom. Sawv daws thiaj li qhuas kawg. 12 Tiam sis thaum Fis Lis Pos qhia lub Moo Zoo txog Tswv Ntuj lub Ceeb Tsheej thiab txog Yes Xus Pleev lub npe, mas lawv ntseeg Fis Lis Pos. Ces tsis hais poj niam los txiv neej, sawv daws txais lub cim ntxuav. 13 Xis Moos kuj ntseeg thiab. Thaum nws txais lub cim ntxuav tas lawd, nws tsis tso Fis Lis Pos tseg li. Nws pom Fis Lis Pos ua tej yam hwj huam yees ntxwv loj, mas nws qhuas kawg.

14 Cov Hauv Paus Xa Lus nyob Yes Lus Xas Les, lawv hnov tias Xas Mas Lias teb txais Tswv Ntuj lo lus lawm, mas lawv xa

20 Tiam sis Pob Zeb teb rau nws tias : Kom koj cov nyiaj ploj, thiab koj nrog cov nyiaj ntawd ploj mus ! Vim koj xav tias nyiaj txiag muas tau Tswv Ntuj lub txiaj ntsim. 21 Koj tsis muaj feem tsis muaj tug nyob hauv txoj hauj lwm no, vim koj lub siab tsis ncaj nyob ntawm Tswv Ntuj xub ntiag. 22 Koj thov txhaum rau koj zaj tswv yim phem, thiab koj thov Huab Tais : tej zaum nws yuav zam rau zaj tswv yim uas nyob hauv koj lub siab. 23 Vim kuv pom koj nyob hauv ib co kua tsib iab iab thiab nyob hauv kev nkhaus cov hlua. 24 Xis Moos teb hais tias :

"Neb thov Huab Tais rau kuv, kom kuv tsis txhob raug zoo li neb nyuam qhuav hais."

25 Thaum ob tug Hauv Paus Xa Lus ua tim khawv txog Huab Tais, thiab tshaj Huab Tais lo lus tas, mas nkawd rov qab mus Yes Lus Xas Les. Nkawd qhia lub Moo Zoo rau ntau lub zos Xas Mas Lias nyob ntawm kev.

**Fis Lis Pos ua lub cim ntxuav rau
ib tug neeg sam. 8 : 26 - 40.**

26 Huab Tais tus Tshiab hais rau Fis Lis Pos tias :

"Thaum tav su, koj sawv kev, koj mus rau tom txoj kev uas nqes ntawm Yes Lus Xas Les mus nram Nkas Xas. Tsis muaj neeg taug txoj kev ntawd."

27 Fis Lis Pos thiaj sawv kev mus txog tom txoj kev.

Thaum ntawd, ib tug Es Thias Pias tab tom los txog ntawd. Nws yog ib tug neeg sam, yog tus poj vaj Es Thias Pias hu ua Kas Ntas ib tug nom loj. Nws yog tus saib cov txhab nyiaj. Nws tuaj mus teev ntuj pem Yes Lus Xas Les rov los.

28 Nws zaum hauv nws lub tsheb rov mus, ces nws nyeem tus yaj saub His Xais phau ntawv. 29 Leej Ntuj Plig hais rau Fis Lis Pos tias :

"Koj khiav mus caum lub tsheb ntawd."

30 Fis Lis Pos thiaj khiav ntsuj caum. Nws hnov tus nom Es Thias Pias nyeem His Xais phau ntawv. Fis Lis Pos nug nws tias :

"koj puas to taub qhov koj nyeem?"

31 Tus nom teb hais tias :

"Yog tsis muaj neeg qhia kuv, mas kuv yuav ua li cas to taub ?" Ces nws caw kom Fis Lis Pos nce los zaum ntawm nws ib sab. 32 Zaj uas tus nom tab tom nyeem yog zaj no :

Luag cab nws mus hauv tsev tua tsiaj zoo li ib tug yaj. Nws tsis qhib ncauj, nws zoo li ib tug me nyuam yaj tsis hais lus rau tus uas muab nws cov plaub chais. 33 Nws tso nws rau hauv txoj kev poob tsim, luag tsis ua ncaj rau nws. Leej twg yuav hais txog nws cov xeeb ntxwv ? Vim tias luag tso nws txoj sia kom ploj hauv ntiaj teb.

34 Tus nom sam hais rau Fis Lis Pos tias :

"Koj sim qhia saib. Tus yaj saub hais txog leej twg zoo li ntawd ? Nws puas rov hais txog nws, los nws hais txog lwm tus ?"

35 Fis Lis Pos thiaj qhib ncauj hais lus. Nws siv cov lus sau tseg hauv Ntawv los qhia Yes Xus lub Moo Zoo rau tus nom sam. 36 Thaum nkawd mus kev, txog ib qho chaw muaj dej, ces tus nom sam hais tias :

"Ntawm no muaj dej. Ua cas kuv yuav txais tsis tau lub cim ntxuav ?" [37...]

38 Ces nws kom lub tsheb nres. Fis Lis Pos thiab tus nom sam nkawd ob leeg nqes mus hauv dej. Fis Lis Pos thiaj ua lub cim ntxuav rau nws. 39 Thaum nkawd tawm hauv dej los, Huab Tais tus Ntsuj Plig nqa Fis Lis Pos lawm. Ces tus nom sam tsis pom Fis Lis Pos ntxiv. Tab sis tus nom sam xyiv fab hlo taug nws txoj kev mus ntxiv. 40 Hos Fis Lis Pos mas, nws tshwm hauv lub zos As Ntxos, nws taug kev mus ntxiv. Nws tshaj lub Moo Zoo rau cov nroog uas nws hla tas huv si. Nws ua li ntawd mus txog Xes Ntxas Les.

Yes Xus hu Xauv. 9 : 1 - 1 9.

9 1 Hais txog Xauv, mas nws yeej niaj hnub xyu, xav ntsoov txog qhov hem thiab tua Huab Tais cov thwj tim. Nws mus cuag tus thawj leej choj. 2 Nws thov kom tus thawj leej choj muab ntawv tso cai rau nws mus xyuas hauv cov tsev txoos nyob Das Mas saib puas muaj cov neeg npuab Txoj Kev. Yog muaj, mas nws muab lawv khi cab mus pem Yes Lus Xas Les, tsis hais poj niam los txiv neej .

3 Thaum nws tab tom mus kev, yuav txog Das Mas, ces ib sij huam, muaj ib qho pom kev ci dawb vog tuaj saum ntuj

- tuaj ncig nws. 4 Nws ntog rau pem teb. "Koj mus mog, vim tus neeg ntawd yog ib rab twj uas kuv xaiv los coj kuv lub Npe mus rau cov neeg teev dab, rau cov vaj, thiab rau cov tub His Xas Lais. 16 Kuv yuav qhia nws tias nws yuav tsum raug tsim txom npaum li cas vim kuv lub Npe."
- 5 Xauv teb hais tias :
 "Huab Tais, koj yog leej twg ?"
 Lub suab ntawd hais tias :
 "Kuv yog Yes Xus, tus uas koj hiam.
 6 Koj sawv, koj mus hauv lub nroog. Yuav muaj neeg qhia koj tias yuav ua dab tsi."
 7 Cov neeg nrog Xauv ua ke mus kev sawv daws nres. Lawv ntshai ntshai hais tsis taus ib lo lus : lawv kuj hnov lub suab meej, tab sis lawv tsis pom dab tsi.
 8 Xauv sawv hauv av los, nws qhov muag rua pliav, tab sis nws tsis pom kev li. Lawv tuav nws tes coj nws mus hauv lub nroog Das Mas. 9 Nws nyob peb hnub, tsis pom kev, tsis noj tsis haus dab tsi li.
 10 Nyob Das Mas, muaj ib tug thwj tim hu ua As Nas Nias. Huab Tais yees tawm los hais rau nws tias :
 "As Nas Nias."
 As Nas Nias teb tias :
 "Huab Tais, kuv nyob ntawm no."
 11 Huab Tais hais ntxiv tias :
 "Koj sawv, koj mus tom txoj kev uas hu ua Kev Ncaj, koj mus hauv Yus Das tsev, koj nrhiav ib tug neeg hu ua Xauv nyob Tas Xis tuaj. Tam sim no nws tab tom teev Ntuj. 12 Nws pom ib tug txiv neej hu ua As Nas Nias chaws los tsa tes rau saum nws kom nws rov pom kev tuaj."
 13 As Nas Nias teb tias :
 "Huab Tais, kuv tau hnov ntau leej hais tias tus neeg ntawd ua phem kawg rau koj cov Ntshiab nyob Yes Lus Xas Les. 14 Nws tuaj ntawm no, vim nws tau cai ntawm cov leej choj tuaj khi cov neeg uas hu txog koj lub npe tas huv tib si."
 15 Tab sis Huab Tais hais rau As Nas Nias hais tias :
- 17 As Nas Nias thiaj mus. Nws chaws mus hauv lub tsev ntawd. Nws tsa tes rau saum Xauv, nws hais tias :
 "Xauv, kuv tus kwv, yog Huab Tais xa kuv tuaj, yog tus Yes Xus uas tau tawm los rau koj pom tom txoj kev uas koj tuaj. Nws xa kuv tuaj kom koj rov qab pom kev, thiab kom koj tau txais Leej Ntuj Plig Ntshiab puv hauv koj."
- 18 Tam sim ntawd muaj tej daim zoo li nplai ntses poob ntawm Xauv qhov muag los, ces nws rov qab pom kev. Lawv ua lub cim ntxuav rau nws Tam sim ntawd.
- 19 Ces nws noj mov, nws rov qab muaj zog.
- Xauv tshaj Ntuj lus nyob Das Mas.**
9 : 19 - 25.
- Xauv nrog cov thwj tim nyob ob peb hnub hauv Das Mas. 20 Ces ib sij huam nws cia li mus nyob hauv cov tsev Txoos, nws qhia tias Yes Xus yog Tswv Ntuj Leej Tub. 21 Tas tsoom neeg uas tau hnov nws, mas lawv poob siab. Lawv hais tias :
 "Tus no tsis yog tus uas nyob Yes Lus Xas Les, nws hiam cov neeg hu txog lub Npe ntawd lod ? Puas yog nws txhob txwm tuaj ntawm no kom tau ntes cov neeg ntseeg, muab lawv khi, thiab cab lawv mus rau cov Thawj Leej Choj ?"
- 22 Hos Xauv, mas nws muaj zog zus tuaj. Nws nrog cov Yus Das nyob Das Mas sib cav, nws ua pov thawj hais tias Yes Xus yog Leej Pleev tiag. 23 Ua li

ntawd tau ib ntus, ces cov Yus Das sab laj
yuav muab Xauv tua. 24 Tiam sis Xauv
xub hnov tias lawv npaj muab nws tua.
Lawv zov cov qhov rooj tawm hauv lub
tsheej nruab hnub hmo ntuj huv si.
25 Ces hmo ntuj, cov thwj tim muab
Xauv ntim rau hauv ib lub tawb, lawv tso
nws nqes ntawm lub ntsa zeb xov lub
tsheej mus sab nraud.

Xauv mus xyuas Yes Lus Xas Les.
9 : 26 - 30.

26 Thaum Xauv tuaj txog Yes Lus Xas
Les lawm, nws xav mus nrog cov thwj
tim sib koom. Tab sis sawv daws ntshai
nws, lawv tsis ntseeg tias nws yog ib tug
thwj tim tiag. 27 Ces Npas Nas Npes
thiaj coj Xauv mus cuag cov Hauv Paus
Xa Lus. Nws piav rau lawv txog qhov
Xauv tau pom Huab Tais hais lus rau nws
ntawm kev, thiab piav tias Xauv muaj
peev xwm tshaj Yes Xus lub npe nyob
Das Mas, nws tsis ntshai.

28 Txij hnub ntawd los, Xauv nrog cov
Hauv Paus Xa Lus mus los hauv Yes Lus
Xas Les. Nws muaj lub siab tawv qhawv
tshaj lus qhia txog Yes Xus lub npe.

29 Nws hais lus rau cov Hes Las, nws
nrog lawv tham. Tab sis lawv nrhiav kev
kom tau muab nws tua. 30 Cov kwv tij
hnov li ntawd, mas lawv coj Xauv mus
rau Xes Ntxas Les, ces lawv xa nws
ntawm Xes Ntxas Les mus rau Tas Xis.

Lub Koom Txoos nyob thaj yeeb.
9 : 31.

31 Lub caij ntawd, cov Koom Txoos
nyob hauv xeev Yus Das, Nkas Lis Lais,
thiab Xas Mas Lias tau nyob thaj yeeb.
Sawv daws txhim cov Koom Txoos, thiab
sawv daws taug txoj kev hwm Huab Tais.

Leej Ntuj Plig Ntshiab nplij cov Koom
Txoos, ces lawv huam vam.

Pob Zeb kho ib tug neeg tuag ceg.
9 : 32 - 35.

32 Pob Zeb ncig mus rau txhua qhov
chaw xyuas sawv daws. Nws nqes mus
txog nram cov ntshia nyob lub zos Lis
Das. 33 Nyob nrad muaj ib tug neeg hu
ua Es Nes pw saum ib daim khaub lev tau
yim xyoo lawm. Nws tuag ceg. 34 Pob
Zeb hais rau nws tias :

"Es Nes, Yes Xus Pleev kho koj zoo. Koj
sawv tsees los kho koj lub txaj."

Tam sim ntawd tus tuag ceg sawv tsees.

35 Tas cov neeg nyob hauv Lis Das thiab
nyob hauv lub tiaj Xas Loos pom Es Nes,
mas sawv daws tig los ntseeg txog Huab
Tais.

**Pob Zeb tsa ib tug poj niam tuag
lawm kom sawv rov los.** 9 : 36 - 43.

36 Nyob Yos Pes, muaj ib tug thwj tim
poj niam hu ua Tas Npis Thas. Nws lub
npe txhais tias Me Nyuam Mos Lwj.
Nws ua ntau yam hauj lwm zoo thiab nws
pub ntau yam rau cov neeg txom nyem.

37 Muaj ib hnub, Tas Npis Thas cia li
mob, ces nws tuag. Lawv muab nws
ntxuav tas, thiab lawv coj nws mus tso
saum chav tsev siab. 38 Lis Das kuj
nyob ze Yos Pes. Cov thwj tim hnov tias
Pob Zeb tuaj txog Lis Das, ces lawv tso
ob tug neeg tuaj thov Pob Zeb tias :
"Thov koj tuaj nram peb, txhob ncua."

39 Pob Zeb nrog ob tug neeg mus tam
sim ntawd. Thaum nws tuaj txog ntua,
lawv kom nws nce mus saum chav tsev
siab. Cov poj ntsuam tuaj pom tuag,
sawv daws los ntsauv vog Pob Zeb.
Lawv quaj zom zaws. Lawv muab tej

tsoos tsho uas Tas Npis Thas tau ua thaum nws tseem nrog lawv nyob rau Pob Zeb saib.

40 Pob Zeb kom sawv daws tawm mus sab nraud. Nws txhos caug thov Ntuj, ces nws tig los hais rau tus tuag tias : "Tas Npis Thas, koj sawv."

Tus poj niam rua muag pom Pob Zeb, nws sawv tsees los zaum. 41 Pob Zeb tuav nws txhais tes, rub nws sawv ntsug. Ces Pob Zeb hu cov Ntshiab thiab cov poj ntsuam los xyuas Tas Npis Thas rau qhov nws ciaj rov los lawm. 42 Tas lub tsheej Yos Pes hnov lub moo ntawd, mas ntau leej ntseeg txog Huab Tais. 43 Pob Zeb nyob Yos Pes ib ntus. Nws nyob hauv tus ntswj hlua hu ua Xis Moos tsev.

**Tswv Ntuj hu ib tug xab txheeb Los
Mas los ntseeg . 10 : 1 - 43.**

10 1 Nyob Xes Ntxas Les, muaj ib tug neeg hu ua Kos Nes Lias. Nws yog tus xab txheeb kav pab peeb zeej hu ua Is Tas Lias. 2 Nws nquag teev ntuj thiab nws hwm Tswv Ntuj. Tas nws tsev neeg kuj ua zoo li nws. Nws lub siab dav pub ntau yam rau tsoom pej xeem Yus Das. Nws teev Tswv Ntuj tsis tseg.

3 Muaj ib hnub nws yees pom Tswv Ntuj tus Tshiab. Kvw yees thaum hnub qajif peeb teev, mas nws pom Ntuj tus Tshiab tseeb tseeb chaws los hauv nws tsev, hu nws tias :

"Kos Nes Lias !".

4 Kos Nes Lias ntsia dheev tus Tshiab, nws ntshai, nws thiaj nug tias :

"Huab Tais, muaj dab tsi ?"

Tus Tshiab teb rau Kos Nes Lias tias :

"Koj cov zaj thov Ntuj thiab koj cov dej num pab cov neeg txom nyem nce mus txog Tswv Ntuj. Tswv Ntuj nco txog koj.

5 Ua li mas nyem no, koj tso neeg mus

tos Xis Moos, tus uas luag hu nws ua Pob Zeb nram Yos Pes tuaj. Nws nyob hauv ib tug kws ntswj hlua hu ua Xis Moos tsev, lub tsev ntawd nyob ze ntug dej ntuj."

7 Thaum Ntuj tus Tshiab hais lus tas, nws rov mus lawm, Mas Kos Nes Lias hu ob tug tub txib thiab ib tug tub rog hwm Ntuj uas yog ib tug hauv cov uas nrog nraim nws. 8 Nws piav tas txhia yam rau lawv, ces nws txib lawv mus nram Yos Pes.

9 Hnub tom qab, lawv tab tom mus yuav txog lub nroog, Pob Zeb nce mus teev ntuj saum lub sam thiaj ruv tsev. Thaum ntawd, tav su lawm. 10 Pob Zeb hnov tshaib plab, nws xav noj mov. Thaum lawv tseem tab tom npaj zaub mov rau nws, mas nws feeb mus pom hauv nruab yeeb. 11 Nws pom lub ntuj qhib los thiab pom ib qho zoo li ib daig ntaub pua rooj dav dav nqes los rau ntiaj teb. Daim ntaub ntawd plaub ceg kaum khi ua plaub lub cos. 12 Nyob hauv daim ntaub, muaj tas puas tsav yam tsiaj uas muaj plaub txhais tes taw, muaj tas puas tsav yam noog ya saum ntuj. 13 Ces muaj ib lub suab hais rau Pob Zeb tias :

"Pob Zeb, koj sawv ! Koj muab los tua noj !"

14 Tab sis Pob Zeb teb tias :

"Huab Tais, kuv tsis noj. Txog tav no, kuv tsis tau noj dua ib yam lo txhaum los ib yam tsis huv."

15 Lub suab ntawd rov hais ntxiv zaum ob rau Pob Zeb tias :

"Tej yam Tswv Ntuj ua kom huv lawm, mas koj tsis txhob hais tias tsis huv."

16 Lub suab hais li ntawd peb zaug, ces daim ntaub rov nce dua saum ntuj lawm.

7 Pob Zeb tsis pom qab xav dab tsi li. Nws tab tom nrhiav saib tej yam uas nws yees pom ntawd xav qhia dab tsi. Thaum

ntawd, Kos Nes Lias cov neeg tuaj txog. Lawv nug Xis Moos lub tsev, ces lawv tuaj txog ntawm rooj vag loog.

18 Lawv hu thiab lawv nug tias tus Xis Moos uas hu ua Pob Zeb puas nyob ntawd tiag. 19 Pob Zeb tseem tab tom xav txog qhov nws nyuam qhuav pom. Ces Leej Ntuj Plig qhia nws tias :

"Muaj ib co neeg nrhiav koj. 20 Koj nqes lawm hauv , koj nrog lawv mus, txhob ua xyem xyav. Yog kuv xa lawv tuaj."

21 Pob Zeb nqes mus txog ntawm cov neeg. Nws hais rau lawv tias :

"Kuv yog tus nej nrhiav. Nej tuaj dab tsi ?"

22 Lawv teb hais tias :

" Tus xab txheeb Kos Nes Lias uas yog ib tug neeg siab ncaj thiab hwm Tswv Ntuj, tas tsoom Yus Das kuj hais lus zoo txog nws, nws tau pom ib tug Tshiab Ntshiab qhia nws kom hu koj mus tim nws tsev. Nws xav mloog cov lus uas koj yuav hais rau nws."

23 Ces Pob Zeb hu lawv los tsev, nws cheem lawv nrog nws nyob.

Tag kis tom qab, Pob Zeb mam sawv kev nrog lawv mus. Ob peb tug kwv tij nyob Yos Pes ua nws luag mus thiab. 24 Hnub tom qab, lawv tuaj txog Xes Ntxas Les. Kos Nes Lias nyob hauv tsev tos lawv. Nws twb sau nws tsev neeg thiab nws cov phooj ywg tib si tuaj nyob hauv nws tsev tos.

25 Thaum Pob Zeb tab tom yuav chaws los hauv tsev, Kos Nes Lias tuaj tos Pob Zeb, nws txhos caug ntawm Pob Zeb ko taw, pe Pob Zeb. 26 Tab sis Pob Zeb rub nws sawv, thiab hais tias :

"Koj sawv, kuv kuj yog ib tug neeg thiab xwb."

27 Ces nkawd ob leeg ua ke sib tham los hauv tsev. Pob Zeb pom cov neeg tuaj sib sau coob, 28 nws hais rau lawv tias :

"Nej twb yeej paub tias Txoj Cai txwv tsis pub ib tug Yus Das nrog ib tug pej kum neeg sib fim, thiab chaws mus hauv nws tsev. Tab sis Tswv Ntuj nyuam qhuav qhia kuv tias tsis txhob hu leej twg ua neeg txhaum los neeg tsis huv.

29 Vim li ntawd mas, thaum nej tuaj hu kuv mas kuv tsis yig. Nyem no, kuv xav nug nej tias vim li cas nej thiaj tos kuv tuaj hauv nej tsev ?"

30 Kos Nes Lias teb tias :

"Tau peb hnub ua ntej no, kuv tseem tab tom teev ntuj, yog thaum hnub qaij peb teev, ces cia li muaj ib tug neeg tshwm plaws los ntawm kuv xub ntiag. Nws hnav ib ce dawb paug. 31 Nws hais rau kuv tias : "Kos Nes Lias, Ntuj mloog koj cov zaj thov ntuj, thiab Tswv Ntuj nco ntsoov tias koj tau pub ntau yam rau cov neeg pluag. 32 Koj xa neeg mus nrhiav tus Xis Moos uas hu ua Pob Zeb nram Yos Pes. Nws nyob hauv tus ntswj hlua Xis Moos tsev, nyob ntawm ntug dej ntuj. 33 Ces Tam sim ntawd, kuv thiaj tso neeg tuaj nrhiav koj. Koj tuaj mas peb zoo siab. Nyem no, peb sawv daws nyob ntawm koj xub ntiag mloog saib Tswv Ntuj kom koj hais dab tsi rau peb."

Pob Zeb qhia lub Moo Zoo nyob hauv Kos Nes Lias tsev.

10 : 34 - 43.

34 Ces Pob Zeb pib hais tias :

"Nyem no, kuv paub tseeb tias Tswv Ntuj tsis kws leej twg cai. 35 Nyob hauv tas txhua haiv neeg, yog leej twg hwm Ntuj thiab coj txoj kev ncaj, mas leej twg ntxim Tswv Ntuj siab. 36 Tswv Ntuj xa nws lo lus tuaj rau cov His Xas Lais. Nws xa lub Moo Zoo tias neeg yuav nyob thaj yeeb nyob hauv Yes Xus Pleev. Yes Xus Pleev yog sawv daws tus Huab Tais.

37 Nej twb tau hnov txog tej xwm uas tshwm sim tuaj nyob hauv xeev Yus Das : yam li thaum Zam tshaj tias sawv daws yuav txais lub cim ntxuav, mas nej kuj hnov hais txog Yes Xus nyob Nas Xas Les. Nws pib qhia hauv xeev Nkas Lis Lais. 38 Tswv Ntuj tau pleev nws. Tswv Ntuj muab Leej Ntuj Plig Ntshiab thiab muab hwj huam rau nws. Nws mus ncig teb ncig chaw, nws ua zoo rau sawv daws. Nws kho cov neeg poob hauv dab phem tes kom lawv zoo. Vim Tswv Ntuj nrog nws nyob.

39 Peb ua tim khawv pom tas puas tsav Yam Yes Xus tau ua nyob hauv cov Yus Das lub teb chaws thiab nyob Yes Lus Xas Les. Cov Yus Das tau ua phem rau nws : lawv muab nws dai saum ib tug ncej kom nws tuag. 40 Tab sis, hnub tim peb, Tswv Ntuj tsa nws sawv rov qab los lawm thiab pub kom nws tawm los xyuas cov tim khawv uas nws xub tau xaiv ua ntej. 41 Tsis yog tas tsoom pej xeem tau pom nws. Cov tau pom nws yog peb. Thaum nws sawv hauv cov tub tuag rov los, mas peb tau nrog nws noj thiab haus ua ke. 42 Nws qhia peb kom peb tshaj rau tsoom pej xeem thiab ua pov thawj zeem tias nws yog tus uas Tswv Ntuj tsa los txiav txim rau cov neeg ciaj thiab cov neeg tuag.

43 Tas cov yaj saub ua tim khawv txog Yes Xus tias leej twg ntseeg txog nws, mas leej twg cov txhaum yuav daws tas nyob hauv nws lub npe."

Thawj pab neeg teev dab txais lub cim ntxuav. 10 : 44 - 48.

44 Pob Zeb tseem tab tom hais lus, ces Leej Ntuj Plig Ntshiab cia li nqes los rau saum cov neeg mloog Lo Lus. 45 Cov ntseeg uas nrog Pob Zeb tuaj yog ib co

neeg txais lub cim txiav lawm. Lawv pom tias Leej Ntuj Plig Ntshiab kuj nqes los rau saum cov neeg teev pej kum dab thiab, mas lawv poob siab tas nrho.

46 Lawv hnov cov neeg ntawd hais tej hom lus txawv cav txog Tswv Ntuj.

Pob Zeb thiaj hais tias :

47 "Ua cas peb yuav pub tsis tau cov dej ua lub cim ntxuav rau cov neeg uas tau txais Leej Ntuj Plig Ntshiab ib yam li peb ?"

48 Ces Pob Zeb kom lawv ua lub cim ntxuav rau cov neeg ntawd nyob hauv Yes Xus Pleev lub npe. Lawv thov kom Pob Zeb nrog lawv nyob ob peb hnub.

Pob Zeb qhia cov nyob Yes Lus Xas Les tias vim li cas nws ua lub cim ntxuav rau cov neeg teev pej kum dab. 11 : 1 - 18.

11 1 Cov Hauv Paus Xa Lus thiab cov kwv tij nyob hauv xeev Yus Das tau hnov tias tab yog cov neeg teev pej kum dab, mas lawv kuj tau txais Tswv Ntuj lo lus thiab. 2 Ces thaum Pob Zeb mus pem Yes Lus Xas Les, mas cov txais lub cim txiav yws yws rau Pob Zeb tias :

3 "Vim li cas koj thiaj li mus hauv cov niag neeg tsis txais lub cim txiav tsev, thiab nrog lawv noj mov ?"

4 Pob Zeb thiaj li piav txij lub hauv paus txog lub ntsis rau lawv tias :

5 "Nyob hauv lub nroog Yos Pes, thaum kuv tseem tab tom teev ntuj, kuv ua yog toog pom ib yam zoo li ib daig ntaub pua rooj loj loj nqes los. Daim ntaub ntawd plaub ceg kaum khi ua plaub lub cos, cia li nqes los txog ntawm kuv. 6 Kuv ntsia ntsoov daim ntaub, kuv pom muaj tas ib puas tsav yam tsiaj nyob ntiaj teb no, cov muaj plaub txhais tes taw, cov tsiaj quz, tsiaj nkag hauv av, thiab cov noog ya

- saum ntuj. 7 Kuv hnov ib lub suab hais rau kuv tias : 'Pob Zeb, koj sawv, koj muab los tua noj.' 8 Kuv teb tias : 'Huab Tais, kuv tsis noj, txog tav no tsis tau muaj ib yam lo txhaum los ib yam tsis huv nkag mus hauv kuv lub ncauj ib zaug.'
- 9 Lub suab ntawd tseem hais ib zaug ntxiv saum ntuj tuaj tias : 'Tej yam uas Tswv Ntuj ua kom huv, mas koj tsis txhob hais tias tsis huv.' 10 Lub suab hais peb zaug li ntawd tas, ces txhia yam rov nce rau saum ntuj lawm.
- 11 Thaum ntawd, muaj peb tug neeg tab tom tuaj txog ntawm lub tsev peb nyob. Luag xa lawv ntawm Xes Ntxas Les tuaj hu kuv. 12 Leej Ntuj Plig qhia kuv kom nrog lawv mus, tsis txhob ua xyem xyav. Rau leej kwv tij uas nrog kuv ua ke no, kuj mus huv tib si thiab. Peb sawv daws chaws mus hauv tus neeg lub tsev, uas yog tus nej hais no. 13 Tus neeg ntawd thiaj piav rau peb tias Ntuj ib tug Tshiab tuaj xyuas nws, hais rau nws tias : 'Koj tso neeg mus tos tus Xis Moos uas hu ua Pob Zeb nram Yos Pes tuaj. 14 Nws yuav hais ib co lus coj txoj kev cawm tuaj rau koj thiab rau koj tsev neeg tas huv tib si.'
- 15 Kuv nyuam qhuav pib hais lus xwb, Leej Ntuj Plig Ntshiab cia li nqes los rau saum lawv ib yam li thawj zaug nws nqes los rau saum peb. 16 Kuv thiaj nco txog Huab Tais lo lus no : 'Zam muab dej los ntxuav, tiam sis nej mas Ntuj yuav ntxuav nej nyob hauv Leej Ntuj Plig.'
- 17 Yog Tswv Ntuj twb pub tib lub txiaj ntsim rau cov neeg ntawd xws li pub rau peb, vim lawv ntseeg txog Huab Tais Yes Xus Pleev. Kuv yog leej twg, kuv thiaj yuav txwv tau Tswv Ntuj ?'
- 18 Cov lus no thiaj ua rau lawv lub siab nqig, ces lawv cav txog Tswv Ntuj tias : "Ua li mas Tswv Ntuj kuj pub txoj kev thov txhaum uas coj neeg mus txog txoj sia rau cov neeg teev pej kum dab thiab."
- Tsa lub Koom Txoos nyob As Nthias Kias. 11 : 19 - 26.**
- 19 Thaum Tes Fas Nos raug luag muab tua tas, muaj ib co ntseeg raug luag hiam, ces lawv thiaj khiav. Lawv mus txog Fes Nis Xias teb, txog Kws Plos, thiab txog As Nthias Kias. Mas lawv tsis tshaj Ntuj Lo Lus rau leej twg li, lawv tsuas tshaj rau cov Yus Das xwb. 20 Tsis kav, nyob hauv lawv, muaj tus puav yog cov neeg tuaj Kws Plos thiab Xis Les Nas tuaj txog As Nthias Kias, lawv tshaj Huab Tais Yes Xus lub Moo Zoo rau cov Hes Las.
- 21 Huab Tais txhais tes pab lawv. Ces cov neeg txais kev ntseeg thiab tig los cuag Huab Tais coob kawg.
- 22 Lub Koom Txoos nyob Yes Lus Xas Les hnov lub moo ntawd, lawv thiaj xa Npas Nas Npes mus nyob As Nthias Kias.
- 23 Thaum Npas Nas Npes tuaj txog, nws pom Tswv Ntuj lub txiaj ntsim, mas nws zoo siab hlo. Nws pab lawv ua siab loj siab tawv kom lawv nyob ruaj nreb hauv txoj kev ntseeg txog Huab Tais. 24 Npas Nas Npes yog ib tug neeg zoo. Leej Ntuj Plig Ntshiab nyob puv hauv nws, thiab nws yog ib tug neeg ntseeg ruaj. Ib pab neeg coob kawg los ntseeg txog Huab Tais ntxiv.
- 25 Ces Npas Nas Npes mus nrhiav Xauv nyob Tas Xis. 26 Thaum nws nrhiav tau Xauv lawm, mas nws coj Xauv los nyob As Nthias Kias.
- Nkawd nyob li ntawd ib xyoos hauv lub Koom Txoos, nkawd qhia ib pab neeg coob kawg. Yog nyob As Nthias Kias mas luag thiaj pib hu cov thwj tim ua cov Pleev.

**Npas Nas Npes thiab Xauv nkawd
mus Yes Lus Xas Les. 11 : 27 - 30.**

27 Lub caij ntawd, muaj ib co yaj saub tuaj pem Yes Lus Xas Les rau nram As Nthias Kias. 28 Muaj ib tug hu ua As Kas Npus. Leej Ntuj Plig tshoj nws, ces nws hais rau sawv daws tias nyob tas hauv lub qab ntuj no, sawv daws yuav tshaib plab loj. Lub teb chaws raug kev tshaib loj lub caij Kaus Dias kav. 29 Cov thwj tim thiaj sab laj tias lawv yuav pab cov kwv tij nyob Yus Das teb. Nyias yuav pab raws li nyias pab tau. 30 Ces lawv muab nyiaj rau Npas Nas Npes thiab Xauv nkawd nqa mus rau cov txwj laus Yus Das.

**Lawv ntes Pob Zeb. Ntuj tus Tshiab
tso nws dim. 12 : 1 - 19.**

12

1 Ze lub sij hawm ntawd, mas Hes Los ntes ob peb tug neeg nyob hauv lub Koom Txoos. Nws xav hiam lawv. 2 Nws xuas ntaj txiav Zam tus tij laug Yas Kos taub hau. 3 Hes Los pom tias cov Yus Das zoo siab rau qhov nws ua, ces nws tso neeg mus ntes Pob Zeb thiab. Hnub ntawd yog hnub noj cov ncuav mov tsis muaj poov xab. 4 Hes Los ntes tau Pob Zeb lawm, nws muab Pob Zeb kaw hauv tsev loj faj. Hes Los kom plaub pab tub rog zov rawv, ib pab muaj plaub leeg. Hes Los npaj tias thaum ua lub Ntees Hla tas nrho, mas nws yuav kom Pob Zeb tawm los rau ntawm tsoom pej xeem xub ntiag. 5 Thaum luag muab Pob Zeb kaw hauv tsev loj faj, mas lub Koom Txoos thov Tswv Ntuj tsis tseg rau Pob Zeb. 6 Txog hnub Hes Los yuav txiav txim rau Pob Zeb, hmo ntawd Pob Zeb tsaug zog nyob nruab nrab ob tug tub rog, ib txog hlua

khi rawv nws rau ntawm ob tug tub rog, hos tseem muaj ib co zov qhov rooj nyob sab nraud thiab. 7 Ib sij huam, Huab Tais tus Tshiab tawm los ua kem tsev pom kev lug. Tus Tshiab tuav Pob Zeb, tsa nws sawv, hais rau nws tias :

"Koj sawv tsees Tam sim no !"

Cov hlua khi Pob Zeb ob txhais tes cia li plam plaws. 8 Tus Tshiab hais ntxiv tias :

"Muab koj txoj siv sia thiab rau koj nkawm khau !"

Pob Zeb sia zoj siv, rau zoj khau tas. Tus Tshiab tseem hais tias :

"Muab koj lub tsho ntev pov saum koj xub pwg tso, koj lawv kuv qab !"

9 Ces Pob Zeb lawv tus Tshiab qab tawm mus. Pob Zeb tsis paub meej tias puas yog tiag, nws xav tias yog nws ua yog toog pom ib tug Tshiab xwb. 10 Nkawd hla thawj pab zov keeb, thiab tseem mus dhau ib pab ntxiv, nkawd thiaj txog lub qhov rooj hlau uas yuav tawm rau sab nroog nraud. Lub qhov rooj hlau cia li qhib plho rau nkawd. Nkawd tawm plaws mus txog ntawm ib txog kev, ces tus Tshiab cia li ploj ntais lawm. 11 Pob Zeb thiaj tsim dheev, nws hais tias :

"Zaum no, kuv paub tseeb tias Huab Tais xa nws tus Tshiab tuaj pab kuv kom kuv dim ntawm Hes Los thiab kom cov Yus Das txhab tau pom raws li lawv vam."

12 Pob Zeb thiaj rov qab paub tias nws nyob qhov twg. Ces nws mus tim Mab Liab tsev. Mab Liab yog Zam niam ; Zam yog tus uas luag hu nws ua Mas Kos. Muaj ib pab neeg coob tuaj sib sau teev ntuj nyob hauv lub tsev no. 13 Pob Zeb khob ntawm lub qhov rooj loog, ces ib tug ntxhais txib hu ua Los Des tawm tuaj mloog. 14 Nws paub Pob Zeb lub suab, nws zoo siab, nws tsis nco txog yuav qhib qhov rooj rau Pob Zeb, nws cia li khiav

rov los hauv tsev, los tshaj tias Pob Zeb
los txog ntawm rooj loog lawm.

15 Lawv hais rau nws tias :

"Koj vwm xwb !"

Tab sis tus ntxhais txib hais tias muaj
tiag. Sawv daws thiaj hais tias :

"Ntshai yog Pob Zeb tus Tshiab."

16 Thaum ntawd, Pob Zeb tseem nyob
nraum zoov khob qhov rooj tas zog.
Lawv thiaj mus qhib qhov rooj. Lawv
pom tias yog Pob Zeb tiag, mas lawv
sawv daws poob siab loj kawg. 17 Pob

Zeb tsa tes kom lawv ua twj ywm, ces
nws piav tias Huab Tais tau ua li cas npo
nws ntawm tsev loj faj. Nws hais ntxiv
tias :

"Nej fi xov mus rau Yas Kos thiab rau
cov kwy tij paub."

Ces Pob Zeb tawm rov mus dua lwm
qhov chaw lawm. 18 Tag kis kaj ntug,
cov tub rog poob siab tas nrho : Pob Zeb
dua qhov twg lawm ? 19 Hes Los kuj tso
neeg tuaj coj Pob Zeb, tiam sis coj tsis
tau. Hes Los thiaj nug cov zov keeb, ces
nws kom luag muab lawv tua. Ua li ntawd
tas, mas Hes Los tso lub xeev Yus Das
tseg, nws mus nyob nram Xes Ntxas Les.

Hes Los tuag. 12 : 20 - 23.

20 Thaum ntawd, Hes Los tab tom nrog
cov nyob Tws Los thiab nyob Xis Doos
muaj lus tsis sib haum loj. Cov nyob Tws
Los thiab nyob Xis Doos sib koom siab
tuaj cuag Hes Los. Lawv tuaj thov tau
Hes Los tus tim xyoob hu ua Nplas Tus.
Ces lawv thov kom Hes Los rov nrog
lawv sib haum xeeb, vim lawv lub teb
chaws kev noj kev haus yog los ntawm
txoj kev nrog Hes Los lub teb chaws ua
lag ua luam. 21 Thaum txog hnub teem,
Hes Los hnav nws lub zam ua vaj, nws
nce mus zaum saum nws lub theej kiab

qhuab qhia tsoom pej xeem. 22 Ces
sawv daws qw tias :

"Yog ib tug dab hais lus, tsis yog neeg."

23 Tab sis, ib sij huam ntawd, Huab Tais
tus Tshiab ntaus Hes Los, vim Hes Los
tsis cav txog Tswv Ntuj lub koob meej.
Ces ib co kas cia li noj nws lub cev, nws
txoj sia mam li tu.

Xauv thiab Npas Nas Npes nkawd rov mus As Nthias Kias.

12 : 24 - 25.

24 Huab Tais lo lus hlob thiab huam vam
tsis so. 25 Npas Nas Npes thiab Xauv
nkawd ua nkawd txoj hauj lwm nyob Yes
Lus Xas Les tiav lawm, ces nkawd rov
qab mus As Nthias Kias. Nkawd coj
Zam, tus uas hu ua Mas Kos, nrog nkawd
mus thiab.

Leej Ntuj Plig xa Npas Nas Npes thiab Xauv nkawd mus tshaj ntuj lus. 13 : 1 - 3.

13 1 Lub Koom Txoos nyob As
Nthias Kias muaj ib co yaj saub
thiab ib co kws txoj cai : yog Npas Nas
Npes, Xis Mes Oos uas luag hu nws ua
Nis Zes, Lus Xyus tus nyob Xis Les Nas
teb tuaj, Mas Nas Ees uas thaum yau nws
nrog tus vaj Hes Los ua phooj ywg, thiab
Xauv.

2 Muaj ib hnub, lawv tab tom ua lub
txoos teev ntuj, thiab coj cov kab ke yoo,
mas Leej Ntuj Plig Ntshiab hais rau lawv
tias :

"Nej qee Npas Nas Npes thiab Xauv
nkawd, vim kuv hu nkawd mus ua dua ib
txoj hauj lwm."

3 Ces thaum lawv yoo mov tas thiab teev
Ntuj tas, lawv tsa tes rau saum nkawd,
lawv xa nkawd mus.

Nyob Kws Plos, Xauv ntsib tus txiv khawv koob Es Lis Mas. 13 : 4 - 12.

4 Leej Ntuj Plig Ntshiab xa nkawd, ces nkawd nqes mus txog nram Xes Laws Xias, nkawd caij nkoy ntaub mus rau Kws Plos. 5 Nkawd tuaj txog Xas Las Mis, nkawd pib tshaj Tswv Ntuj Lo Lus nyob hauv cov Tsev Txoos Yus Das. Nkawd muaj Zam ua tus pab nkawd thiab.

6 Thaum lawv hla lub pov txvv thoob plaws mus txog Pas Fos, mas lawv ntsib ib tug txiv khawv koob, yog ib tug yaj saub cuav Yus Das, hu ua Es Lis Mas.

7 Nws yog tus vaj txheeb Xias Zus Paj Lug ib tug tub ncig. Tus vaj txheeb no yog ib tug neeg thoob tsib to nrog. Nws tso neeg tuaj hu Npas Nas Npes thiab Xauv nkawd. Nws xav hnov Tswv Ntuj Lo Lus. 8 Tab sis tus txiv khawv koob Es Lis Mas cav tiv nkawd. Nws xav kom tus vaj txheeb tsis txhab raws txoj kev ntseeg. 9 Ces Xauv, uas nws tseem muaj dua npe hu ua Paj Lug, ntsia ntsoov Es Lis Mas. Leej Ntuj Plig nyob puv hauv Paj Lug, ces nws hais rau Es Lis Mas tias :

10 "Koj tus neeg ntawm kod, koj lub tswv yim tsuas kawg nrhiav kev dag luag tej xwb, koj ua yam lim hiam thiab zais ntshis. Koj yog dab phem tus tub ! Koj yog tus yeeb ncuab ntxub txoj kev ncaj ! Koj puas yuav tseg tsis muab Huab Tais txoj kev ncaj ua kom nkhaus. 11 Tam sim no, Huab Tais txhais tes yuav ntaus koj : koj yuav dig muag tsis pom lub hnub ib ntus."

Ces tam sim ntawd, Es Lis Mas maub tsaus ntuj nti, tsis pom kev, nws mus rau sab ub sab no, nrhiav ib tug coj nws kev.

12 Tus vaj txheeb pom li ntawd, mas nws txais txoj kev ntseeg. Huab Tais Lo Lus qhia raug nws lub siab.

Paj Lug tshaj Lo Lus nyob Pis Xis Dias. 13 : 13 - 43.

13 Paj Lug thiab nws ob tug phooj ywg caij nkoy ntawm Pas Fos mus rau Pes Zes uas nyob Pas Fis Lias teb. Tab sis Zam tso nkawd tseg, nws rov mus Yes Lus Xas Les. 14 Paj Lug thiab Npas Nas Npes nkawd hla dhau Pes Zes, mus txog As Nthias Kias Pis Xis Dias. Txog hnub , nkawd mus hauv lub Tsev Txoos, nkawd zaum. 15 Thaum lawv nyeem Txoj Cai thiab cov Yaj Saub tej ntawv tas, mas cov tswj lub Tsev Txoos tso neeg los hais rau nkawd tias :

"Kwv tij, yog nej muaj lus dab tsi zoo txhawb tsoom pej xeem lub siab no, nej hais mas !"

16 Paj Lug thiaj li sawv tsees, tsa tes, thiab nws hais tias :

"Kwv tij His Xas Lais, thiab nej cov uas hwm Tswv Ntuj sawv daws, nej mloog mog ! 17 Tus Tswv Ntuj saib peb haiv neeg, tus Tswv Ntuj saib His Xas Lais, nws xaiv peb cov yawg koob thaud. Lub caij peb haiv neeg khuam nyob Hais Nkws Tos teb, Tswv Ntuj ua kom peb haiv neeg huam vam. Tiam sis nws tso nws lub zog tuaj pab lawv tawm ntawm lub teb chaws ntawd los. 18 Nws txuag lawv plaub caug xyoo, nyob hauv teb chaws suab puam. 19 Tswv Ntuj rhuav tas xya haiv neeg nyob hauv teb chaws Kas Nas Has, nws mam li muab lub teb chaws ntawd rau peb cov yawg koob nyob ua lawv tug. 20 Nws ua plaub puas tsib caug xyoo thiaj tas. Ua li ntawd tas, nws thiaj tsa ib co neeg txiav txim rau lawv, los txog tus Yaj Saub Xas Muas. 21 Ntev mus, lawv thou ib tug Vaj. Ces Tswv Ntuj tsa Xas Ws, uas yog Kis tus tub, xeem Npes Yas Mis. Ntu ntawd kav ntev li plaub caug xyoo.

- 22 Tswv Ntuj muab Xas Ws xyeeb pov rau nej : yog lo lus uas Ntuj cog rau peb tseg, Tswv Ntuj thiaj tsa Das Vis ua lawv cov yawg koob. 33 Tswv Ntuj tau ua tus vaj. Tswv Ntuj ua pov thawj txog Das raws li lo lus nws cog vim peb yog lawv Vis tias : "Kuv nrhiav tau Das Vis, Yes cov tub. Tswv Ntuj tau tsa Yes Xus sawv Xes tus tub. Nws yog tus neeg ntxim kuv rov los. Nyob hauv thawj zaj nkauj paj siab, nws yuav ua raws li kuv lub siab xav nruag, muaj lo lus sau tseg tias : 'Koj yog tas huv si.' 23 Nyob hauv Das Vis cov kuv Leej Tub. Hnub no, kuv xeeb koy.' xeeb ntxwv, Tswv Ntuj tsa Yes Xus ua
- 24 Zam xub tuaj ua ntej. Nws xub npaj tus cawm neeg los pab His Xas Lais. kev rau Yes Xus yuav tuaj. Nws tshaj rau
- 25 Thaum Zam ua nws txoj hauj lwm haiv His Xas Lais kom lawv sawv daws txais kab ke ntxuav thiab lees txhaum.
- 26 Kww tij, nej yog Has Nplas Has cov tub, thiab nej cov uas hwm Ntuj nyob ntawm no, Ntuj xa cov lus ceeb toom txog t xo j kev cawm neeg no tuaj rau nej.
- 27 Cov nyob Yes Lus Xas Les thiab cov nom tswv tau ua raws nraim li cov Yaj Saub cov lus uas peb nyeem niaj hnub xav npas tos, tab sis lawv tsis paub tias lawv tau ua li ntawd. 28 Lawv nrhiav tsis tau ib Yam dab tsi nyob hauv Yes Xus kom txaus muab nws tua. Tab sis lawv txiav txim rau nws, thiab lawv thov kom Pis Las Tos muab Yes Xus tua.
- 29 Thaum lawv ua tas raws li Ntawv sau tseg lawm, mas lawv daws nws saum tus ntoo los thiab lawv muab nws lub cev mus zwm ntxa. 30 Tab sis Tswv Ntuj tsa nws sawv rov los lawm. 31 Tau ntev hnub los, Yes Xus twb tawm los xyuas cov neeg nrog nws tuaj ntawm Nkas Lis Lais tuaj rau hauv Yes Lus Xas Les. Yog cov neeg uas nyem no ua nws tim khawv rau tsoom pej xeem sawv daws pom.
- 32 Hos peb, mas peb tshaj lub Moo Zoo
- rau nej : yog lo lus uas Ntuj cog rau peb cov tub. Tswv Ntuj tau tsa Yes Xus sawv rov los. Nyob hauv thawj zaj nkauj paj nruag, muaj lo lus sau tseg tias : 'Koj yog kuv Leej Tub. Hnub no, kuv xeeb koy.'
- 34 Tswv Ntuj tsa Yes Xus sawv hauv cov tub tuag rov los, kom nws tsis txhob rov mus zwm rau lub cev t xo j kev lwj, raws li Tswv Ntuj ib txwm hais tias : 'Kuv yuav muab Das Vis tej yam Ntshiab rau nej, yog tej yam tseeb tiag.' 35 Tswv Ntuj tseem hais dua tias : 'Koj yuav tsis cia koj tus Ntshiab raug t xo j kev lwj.'
- 36 Tab sis thaum Das Vis ua Tswv Ntuj cov dej num tas lawm, nws mus nrog nws cov yawg koob pw, ces nws raug t xo j kev lwj. 37 Hos tus uas Tswv Ntuj tsa sawv, mas nws tsis raug t xo j kev lwj. 38 Kww tij, zaum no, nej yuav paub tias Yes Xus yog tus tuaj qhia t xo j kev daws txhaum rau nej. Mais Xes T xo j Cai ua tsis tau kom nej ncaj tuaj. 39 Yog Yes Xus thiaj ua tau : leej twg ntseeg txog Yes Xus, mas Ntuj saib nws yog neeg siab ncaj.
- 40 Nej yuav ceev faj tsis txhob ua xws li cov neeg uas cov Yaj Saub hais txog tias : 41 "Cov neeg thuam Ntuj, nej ntsia : Nej yuav ntshai, nej yuav ploj ntais mus. Vim lub zim txwv nej ua neej nyob, kuv ua ib Yam hauj lwm, yog Yam hauj lwm uas tab txawm luag piav rau nej, mas nej tsis ntseeg."
- 42 Paj Lug hais li ntawd tas, thaum lawv tawm hauv tsev t xo os mus, lawv thov kom lwm hnub xav npas tos, Paj Lug nkawd rov qhia txog qhov ntawd ntxiv.
- 43 Thaum sawv daws tawm tas mas muaj coob leej Yus Das thiab ib co pej kum neeg hwm Ntuj raws Paj Lug thiab Npas Nas Npes nkawd. Nkawd nrog lawv tham, thiab qhia kom lawv npuab ruaj

nreb Tswv Ntuj lub txiaj ntsim.

**Paj Lug thiab Npas Nas Npes
nkawd qhia cov neeg teev dab.
13 : 44 - 52.**

44 Lwm Hnub Xya, yuav luag tas lub tsheej tuaj sib sau mloog Tswv Ntuj Lo Lus. 45 Cov Yus Das pom neeg tuaj coob coob, mas lawv khib. Ces thaum Paj Lug hais lus mas lawv teb tej lo lus thuam Ntuj. 46 Paj Lug thiab Npas Nas Npes nkawd ua siab loj hais tias :

"Peb yuav tsum xub tshaj Tswv Ntuj lo lus rau nej tso, vim kev cai mus li ntawd. Tab sis yog vim nej xyeeb Tswv Ntuj lo lus, thiab nej saib nej tsis tsim nyog txais txoj sia nyob mus li. Vim qhov ntawd mas peb thiaj tig mus qhia cov neeg teev pej kum dab. 47 Huab Tais twb qhia peb tias : "Kuv tsa koj ua qhov pom kev kaj txhua haiv neeg, kom koj xa txoj kev cawm neeg mus txog tim npoo ntiaj teb."

48 Cov neeg teev pej kum dab hnov cov lus no mas sawv daws zoo siab. Lawv cav txog Huab Tais lo lus.

Cov uas lawv txoj hmoo yog txais txoj sia nyob mus li mas lawv tig los ntseeg. 49 Ces Huab Tais lo lus ri mus puv tas ib cheeb tsam ntawd. 50 Tab sis cov Yus Das mus cob cov poj nom uas hwm Tswv Ntuj, thiab cov ua hau nyob hauv lub tsheej. Cov Yus Das pib hiam Paj Lug thiab Npas Nas Npes nkawd. Lawv ntiaj nkawd kom tawm hauv lawv teb chaws mus.

51 Nkawd thiaj nchos cov plua av lo nkawd ko taw rau lawv, ces nkawd mus rau Is Kos Nias. 52 Hos cov thwj tim, mas lawv zoo siab, thiab Leej Ntuj Plig Ntshiab nyob puv hauv lawv.

**Paj Lug nkawd tshaj Ntuj lus nyob
Is Kos Nis Yus. 14 : 1 - 7.**

14 1 Paj Lug nkawd mus Is Kos Nis Yus, nkawd kuj mus hauv cov Yus Das lub tsev Txoos thiab. Nkawd hais lus zoo kawg, ces ib pab Yus Das coob thiab ib pab Hes Las coob coob txais txoj kev ntseeg. 2 Tiam sis cov Yus Das tsis xav ntseeg, lawv mus haub cov teev dab kom nrhiav lus rau cov kwv tij.

3 Paj Lug thiab Npas Nas Npes nkawd tseem nyob ntxiv ntev hauj sim. Nkawd ua siab loj nyob hauv Huab Tais. Huab Tais pub kom nkawd ob txhais tes ua tau ib co cim thiab ib co hwj huam pab nkawd ua tim khawv txog lo lus thiab lub txiaj ntsim. 4 Cov pej xeem hauv lub nroog thiaj faib ua ob tog : ib co nrog cov Yus Das, ib co nrog cov Hauv Paus Xa Lus. 5 Nyob hauv tog Yus Das, cov teev dab thiab cov Yus Das nrog lawv cov nom tswv npaj yuav ua phem rau ob tug Hauv Paus Xa Lus thiab npaj xuas pob zeb los tua nkawd. 6 Tab sis nkawd xub paub li ntawd, ces nkawd khiav mus tsiv nraim nyob hauv cov nroog nyob Lis Kos Nias teb : yam li lub nroog Lis Ros thiab Des Npes thiab nyob ib ncig thaj tsam ntawd. 7 Nkawd tshaj lub Moo Zoo nyob ntawd.

**Nyob Lis Ros, lawv xav tua nyuj txi
Npas Nas Npes thiab Paj Lug
nkawd. 14 : 8 - 18.**

8 Nyob Lis Ros, muaj ib tug neeg uas nws ob txhais taw tsis muaj zog. Nws tuag taw txij hnub nws yug los, nws tsis tau rhais ruam mus kev ib zaug li. 9 Nws mloog Paj Lug cov lus qhuab qhia. Paj Lug ntsia ntsoov nws, ces Paj Lug pom

tias nws ntseeg txaus kho nws kom zoo.
10 Paj Lug thiaj hais ib suab nrov tias :
"Koj sawv saib ! Koj sawv ntsug tsuj
saum koj ob txhais taw ntseg ntseg mog."

Tus tuag taw tib plhaw sawv tsees : nws
mus taus kev lawm. 11 Cov neeg pom
Paj Lug ua li ntawd, lawv ua lus Lis Kos
Nias qw qw tias :

"Ib co dab txia ua neeg nqes los nrog peb
nyob."

12 Lawv hu Npas Nas Npes ua Dab
Ntxaws, ho hu Paj Lug ua Dab Es Mes,
vim Paj Lug yog tus hais lus. 13 Cov
leej choj teev tus dab Ntxaws nyob sab
nroog nraud coj ib co heev nyuj tuaj txog
ntawm lub rooj loog. Lawv dai tej ntshua
paj ntoos rau cov heev nyuj. Cov leej
choj thiab tas tsoom sid tseem tab tom
npaj yuav txi nyuj rau nkawd.

14 Luag qhia Npas Nas Npes thiab Paj
Lug nkawd paub txog qhov ntawd, ces
nkawd dua nkawd cov ris tsho, thiab

nkawd khiav mus hais rau tsoom sid tias :

15 "Cov phooj ywg, nej ua dab tsi li no ?

Wb kuj yog tib neeg thiab xwb. Wb
kawg tau txaib txog hmoov ua neeg ib
yam li nej thiab xwb. Wb yog ob tug
neeg tuaj qhia nej kom nej tso tej dab tej
mlom no pov tseg, tig los hwm tus Tswv
Ntuj muaj tzoj sia uas yog tus tsim lub
ntuj lub ntiaj teb, lub hiav txwv thiab tas
txhua yam uas nyob hauv. 16 Yav thaud,
Tswv Ntuj cia cov haiv neeg nyias mus
raws nyias tzoj kev. 17 Tsis kav Tswv
Ntuj yeej muab nws lub hwj huam rau
sawv daws pom ; nws tso nag poob saum
ntuj los rau nej, nws ua kom muaj caij zoo
ua qoob ua loo rau nej, nws pub kom nej
muaj noj txaus nej siab, nws ua kom nej
siab ntsws puv, tej no yog nws cov txiaj
ntsim." 18 Nkawd cov lus no txwv yuav
luag tsis tau kom tsoom sid tsis txhob tua
nyuj txi nkawd.

Paj Lug thiab Npas Nas Npes
nkawd rov los As Nthias Kias.
14 : 19 - 28.

19 Thaum ntawd muaj ib co Yus Das tuaj
As Nthias Kias thiab Is Kos Nias tuaj.
Lawv haub tsoom sid. Ces lawv xuas pob
zeb txawb rau Paj Lug. Lawv cab Paj
Lug mus sab tsheej nraud. Lawv tso Paj
Lug rau nraud, lawv xav tias Paj Lug tuag
lawm. 20 Tab sis cov thwj tim tuaj sawv
ncig Paj Lug, ces nws rov sawv los thiab
nws rov mus hauv lub tsheej. Tag kis tom
qab, nws nrog Npas Nas Npes sawv kev
mus Des Npes. 21 Thaum nkawd tshaj
Ntuj lus tas nyob hauv lub tsheej Des
Npes, thiab nkawd qhia tau ib pab thwj
tim coob lawm, mas nkawd rov mus Lis
Ros, rau Is Kos Nias thiab rau As Nthias
Kias. 22 Nkawd pab kom cov thwj tim
ua siab ruaj tawv qhawv nyob hauv tzoj
kev ntseeg. Nkawd qhia tias :

"Peb yuav tsum raug ntau yam kev txom
nyem, peb thiaj yuav tau mus hauv Tswv
Ntuj lub Ceeb Tsheej."

23 Nkawd tsa ib co txwj laus nyob hauv
txhua lub koom txoos. Thaum nkawd
nrog sawv daws hais cov zaj teev ntuj
thiab yoo mov tas, mas nkawd muab lawv
cob rau tus Huab Tais uas lawv ntseeg
txog. 24 Ces nkawd hla Pis Xis Dias teb
mus txog Pas Fis Lias teb. 25 Thaum
nkawd tshaj ntuj lus nyob Pes Zes tas
lawm, mas nkawd thiaj li mus nram As
Tas Lias. 26 Nkawd caij nkoy nyob As
Tas Lias mus rau As Nthias Kias uas yog
lub tsheej nkawd sawv kev mus tshaj Ntuj
lus. Tswv Ntuj lub txiaj ntsim tau pab
nkawd ua hauj lwm tiav lawm.

27 Thaum nkawd los txog As Nthias
Kias, mas nkawd hu lub Koom Txoos tas
huv si kom tuaj, nkawd piav txog tej yam
Tswv Ntuj tau pab nkawd ua rau sawv

daws mloog : nkawd piav tias Tswv Ntuj tau qhib cov neeg teev dab lub siab kom lawv ntseeg.

28 Nkawd nrog cov thwj tim nyob ib ntus ntev hauj sim.

**Paj Lug nrog cov Yus Das ntseeg
txog Yes Xus muaj lus sib cav
nyob As Nthias Kias. 15 : 1 - 4.**

15 1 Thaum ntawd, muaj ib co neeg tuaj Yus Das teb tuaj, lawv qhia cov kwv tij tias :

"Yog nej tsis ua lub cim txiav raws li txoj cai tuaj ntawm Mais Xes tuaj, mas nej yuav txais kev cawm tsis tau."

2 Paj Lug thiab Npas Nas Npes nkawd nrog lawv sib cav muaj ceem hauj sim txog qhov ntawd, lawv hais tsis sib haum, ces sawv daws thiaj txiav tias yuav tso Paj Lug thiab Npas Nas Npes thiab lawv ob peb leeg mus pem Yes Lus Xas Les, mus cuag cov Hauv Paus Xa Lus thiab cov txwj laus, nrog lawv sab laj txog cov lus ntawd.

3 Lub Koom Txoos xa nkawd mus ib ntus, ces nkawd mus nkawd ntxiv. Nkawd hla Fes Nis Xias thiab Xas Mas Lias teb, nkawd piav txog cov ua dab tig los txais kev ntseeg rau cov kwv tij mloog, mas sawv daws zoo siab.

4 Thaum lawv tuaj txog Yes Lus Xas Les, lub Koom Txoos nrog cov Hauv Paus Xa Lus thiab cov txwj laus tos lawv. Paj Lug thiab Npas Nas Npes nkawd piav rau sawv daws txog tej yam Tswv Ntuj tau pab nkawd ua.

**Thawj lub Rooj Ncauj Lus nyob Yes
Lus Xas Les. 15 : 5 - 29.**

5 Tab sis, muaj ib co neeg uas yog tog Fas Lis Xais, lawv kuj txais kev ntseeg ;

lawv sawv los hais tias yuav tsum kom cov neeg teev pej kum dab txais lub cim txiav thiab coj Mais Xes txoj cai. 6 Cov Hauv Paus Xa Lus thiab cov txwj laus thiaj sib sau sab laj txog cov lus no.

7 Lawv sib cav ntev loo, ces Pob Zeb mam li sawv ntsug hais rau lawv tias : "Kwv tij sawv daws, nej paub hais tias : thaum lub hauv paus, Tswv Ntuj tau xaiv kuv nyob hauv nruab nrab nej los, kom cov teev dab tau hnov lub Moo Zoo ntawm kuv lub ncauj, thiab kom lawv txais kev ntseeg. 8 Tswv Ntuj uas nws paub neeg lub siab, nws twb qhia peb tias nws nyiam cov neeg teev pej kum dab, nws twb pub Leej Ntuj Plig Ntshiab rau lawv ib yam li rau peb. 9 Nws tsis saib lawv thiab peb yog ib co neeg sib txawy, vim tias nws ntxuav lawv lub siab nyob hauv txoj kev ntseeg lawm. 10 Tim li cas nyem no nej thiaj li xav sim Tswv Ntuj. Tim li cas nej xav muab rab quab uas peb cov yawg koob thiab peb twb tsis muaj zog ris, mus nog rau cov thwj tim lub caj dab ? 11 Thiab peb kuj ntseeg tias yog Huab Tais Yes Xus lub txiay ntsim xwb cawm peb ib yam li cawm lawv."

12 Ces sawv daws nyob ntsiag to. Lawv mloog Paj Lug thiab Npas Nas Npes nkawd piav txog cov hauj lwm muaj hwj huam uas Tswv Ntuj kom nkawd ua nyob hauv tsoom neeg teev pej kum dab.

13 Thaum nkawd hais lus tas, ces Yas Kos qhib ncauj hais tias : "Kwv tij, nej mloog kuv hais. 14 Xis Moos nyuam qhuav piav tias txij lub hauv paus los, Tswv Ntuj yeej xaiv tej tus nyob hauv cov neeg teev dab los ua ib haiv neeg hwm nws lub npe. 15 Qhov ntawd raug cov Yaj Saub cov lus, raws li Ntawv sau cia tias : 16 ' Thaum ntawd, kuv yuav rov qab los, kuv yuav rov tsa Das Vis lub

*tsev tsam phooj uas vau lawm, tej vaj tse
uas pob tas lawm, kuv yuav rov kho, kuv
yuav rov txhim kom sawv ntseg ; 17 kom
lwm cov neeg nrhiav Huab Tais, kom tas
ib tsoom haiv neeg uas kuv npaj lawv cia
hwm kuv lub npe, nrhiav tau kuv.'*

18 Tus hais li no yog tus Huab Tais uas
tau qhia tej yam ntawd tau ntau txheej
ntau tiam los lawm. 19 Vim li no, mas
kuv thiaj pom zoo tias : kom tsis txhob ua
ntxhov rau cov neeg teev dab uas tig los
ntseeg Tswv Ntuj. 20 Peb tsuas qhia
lawv kom caiv cov nqaij txi dab, caiv kev
ua dev ua npua, caiv cov nqaij pos tuag,
thiab caiv ntshav xwb. 21 Vim tias txij
puag txheej thaud los, muaj neeg tshaj
Mais Xes txoj kev cai nyob tas txhia lub
nroog. Lawv nyeem cov kev cai ntawd
niaj hnub nyob hauv cov Tsev Txoos."

22 Ces cov Hauv Paus Xa Lus thiab cov
txwj laus nrog lub Koom Txoos hais sib
haum. Lawv txiav tias yuav xaiv lawv ob
peb leeg thiab xa lawv nrog Paj Lug thiab
Npas Nas Npes nkawd mus As Nthias
Kias. Lawv xaiv Yus Das uas hu ua Npas
Xas Npas thiab Xis Las nkawd. Nkawd
yog ob tug nto moo zoo nyob hauv cov
kwv tij. 23 Cov Hauv Paus Xa Lus muab
tsab ntawv no rau lawv nqa mus :

"Cov Hauv Paus Xa Lus thiab cov txwj
laus, uas yog nej cov kwv tij, xa lus foom
kev kaj lug tuaj rau cov kwv tij uas yog
pej kum neeg txais kev ntseeg, nyob As
Nthias Kias, nyob Xis Lias teb, thiab
nyob Xis Lis Xias teb. 24 Peb tau hnov
tias muaj ib co neeg tuaj ntawm peb teb
chaws tuaj. Lawv tuaj hais ib co lus ua
kom nej ntxhov siab thiab ua kom nej lub
tswv yim tws kev. Tab sis, tsis yog peb
xa lawv tuaj. 25 Peb thiaj ua ke txiav
tias cia peb xaiv ob tug sawv peb chaw
nrog ob tug kwv tij Npas Nas Npes thiab
Paj Lug nkawd, tuaj cuag nej. 26 Paj

Lug thiab Npas Nas Npes nkawd yog ob
tug neeg zoo siab siv nkawd txoj sia los
tsob hwb peb tus Huab Tais Yes Xus
Pleev lub Npe. 27 Ua li mas peb tso Yus
Das thiab Xis Las nkawd tuaj, kom
nkawd hais cov lus uas peb xa tuaj rau
nej. 28 Leej Ntuj Plig Ntshiab thiab peb,
tau txiav tias yuav tsis yuam tej lub nra
ceeb laj ris rau nej. Nej tsuas yuav coj ob
peb Yam no xwb :

29 Nej yuav caiv cov nqaij txi dab, caiv
ntshav, caiv cov nqaij pos tuag, caiv
kev ua dev ua npua. Tej no mas nej
yuav caiv, thiaj li zoo. Nej nyob kaj lug."

**Ob tug Hauv Paus Xa Lus rov mus
As Nthias Kias. 15 : 30 - 35.**

30 Thaum lawv sib xa kev sib ncaim tas,
mas lawv nqes mus rau As Nthias Kias.
Lawv hu sawv daws tuaj, ces lawv muab
tsab ntawv rau lub txoos. 31 Lawv
nyeem tsab ntawv, lawv zoo siab tias cov
lus nyob hauv txhawb lawv ntau. 32 Yus
Das thiab Xis Las Nkawd kuj yog ob tug
Yaj Saub. Nkawd ntuas cov kwv tij ntev
loo, kom lawv ntseeg ruaj. 33 Nkawd
nyob ib ntus, ces cov kwv tij xa nkawd
rov mus rau cov uas xa nkawd tuaj. Lawv
foom kev thaj yeeb nrog nkawd rov mus.
[34...]

35 Tshuav Paj Lug thiab Npas Nas Npes
nkawd nyob As Nthias Kias. Nkawd nrog
coob leej tshaj lub Moo Zoo thiab qhia
Huab Tais lo lus.

**Paj Lug ncaim Npas Nas Npes.
Nws coj Xis Las nrog nws.
15 : 36 - 40.**

36 Ib ntus tom qab, Paj Lug hais rau
Npas Nas Npes hais tias :
"Wb rov mus xyuas cov kwv tij nyob

hauv txhua lub nroog uas wb tau tshaj
Huab Tais lo lus, saib lawv nyob li cas
lawm."

37 Npas Nas Npes xav coj Zam uas
tseem hu ua Mas Kos nrog nkawd mus
thiab. 38 Tab sis Paj Lug tsis xav rov coj
Zam mus, vim thawj zaug Zam twb tso
nkawd tseg nyob Pas Fis Lias, tsis mus
nrog nkawd ua hauj lwm. 39 Paj Lug
thiab Npas Nas Npes nkawd sib cav npau
taws heev, ces nkawd sib ncaim. Npas
Nas Npes coj Mas Kos nrog nws mus,
nkawd caij nkoy mus rau Kws plos.

40 Hos Paj Lug xaiv Xis Las nrog nws.
Cov kwj tij hu Tswv Ntuj lub txiaj ntsim
tuaj pov hwm nkawd tas ces nkawd mus.

Paj Lug xaiv Tis Mos Tes.

15 : 41 + 16 : 1 - 5.

41 Paj Lug hla Xis Lias thiab Xis Lis
Xias teb, nws pab cov Koom Txoos kom
ntseeg ruaj.

16 1 Paj Lug thiaj mus txog Des
Npes thiab Lis Ros. Nyob ntawd
muaj ib tug thwj tim hu ua Tis Mos Tes.
Nws niam yog ib tug poj niam Yus Das
txais kev ntseeg. Nws txiv yog ib tug Hes
Las. 2 Cov kwv tij nyob Lis Ros thiab
nyob Is Kos Nias, sawv daws zeem tseeb
tias Tis Mos Tes yog neeg zoo.

3 Paj Lug xav kom Tis Mos Tes nrog
nws mus. Ces Paj Lug coj Tis Mos Tes
mus, nws ua lub cim txiav rau Tis Mos
Tes, vim muaj ib co Yus Das coob nyob
tsis deb tsis ze, thiab sawv daws paub tias
nws txiv yog ib tug Hes Las.

4 Lawv hla lub nroog twg, mas lawv
ceeb toom cov txhooj uas cov Hauv Paus
Xa Lus thiab cov txwj laus nyob Yes Lus
Xas Les tau tsa rau cov Ntseeg. 5 Ua li
mas cov Koom Txoos khov zuj zus nyob

hauv txoj kev ntseeg, thiab niaj hnub
huam vam coob ntxiv tuaj.

Paj Lug hla As Xias teb. 16 : 6 - 10.

6 Paj Lug lawv hla lub teb chaws Fis
Zias thiab xeev ntuj Nkas Las Tias, vim
Leej Ntuj Plig tsis kheev lawv tshaj ntuj
Lo Lus nyob As Xias teb. 7 Thaum lawv
tuaj txog ntawm Mis Xias ciamb teb, lawv
yuav mus rau Npis Tis Nias teb, tab sis
Yes Xus Leej Tswv Yim tsis kheev.

8 Ces lawv hla Mis Xias teb nqes mus
rau nram lub tsheej Thuas. 9 Muaj ib
hmos, Paj Lug yees pom ib tug Mas Xes
Dos Nias sawv ntsug puag sab tim ub,
nws thov Paj Lug tias :

"Koj hla tuaj rau Mas Xes Dos Nias teb,
tuaj pab peb !"

10 Paj Lug pom li ntawd tas nrho, ces
peb nrhiav kev mus Mas Xes Dos Nias
teb Tam sim ntawd. Peb paub tseeb tias
Tswv Ntuj hu peb mus tshaj Ntuj lus rau
lub teb chaws ntawd.

Paj Lug tuaj txog Fis Lis Pos.

16 : 11 - 15.

11 Peb caij nkoy nyob Thuas ncaj qha
mus rau Xas Mos Thas Kes. Hnub tom
qab peb mus rau Nias Pos Lis. 12 Txog
Nias Pos Lis, peb mus ntxiv rau Fis Lis
Pos uas yog thawj lub tsheej nyob hauv
lub ceeb Mas Xes Dos Nias, uas yog ib
lub xeev Los Mas. Peb nyob ob peb hnub
hauv lub nroog ntawd. 13 Txog hnub
xav npas tos, peb tawm mus rau sab loog
nraud, nyob ntawm ib tug ntug dej, uas
peb paub tias yog qhov chaw teev ntuj.
Peb zaum, ces peb thiaj hais lus rau cov
poj niam tuaj sib sau nyob ntawd.

14 Muaj ib tug poj niam hu ua Lis Dias,
nws mloog peb hais. Nws yog ib tug

muag tshuaj zas ntaub liab tsam xem nyob hauv lub tsheej Thias Tis Las. Nws teev Tswv Ntuj. Huab Tais qhib nws lub siab kom nws txais Paj Lug cov lus.

15 Thaum Lis Dias thiab nws tsev neeg txais lub cim ntxuav tas, mas nws thov peb li no :

"Yog nej saib kuv yog ib tug neeg ntseeg txog Huab Tais, mas thov nej chaws los nyob hauv kuv tsev."

Ces nws kom peb mus so hauv nws tsev.

Paj Lug thiab Xis Las nkawd raug kaw hauv tsev loj faj. 16 : 16 - 24.

16 Muaj ib hnub, peb mus txog tom lub chaw teev ntuj, peb pom ib tug ntxhais txib raug ib tug dab ntaus txheeb. Nws cov tswv tau noj nyiaj ntau vim tus ntxhais ntawd txawj txhais ntau yam.

17 Tus ntxhais txib ntawd lawv Paj Lug peb qab, nws qw tias :

"Cov neeg ntawd yog tus Tswv Ntuj Nyob Siab cov tub txib. Lawv tshaj txoj kev cawm neeg rau nej."

18 Nws ua li ntawd tau ntau hnub, ces Paj Lug meem txom. Paj Lug thiaj tig los hais rau tus dab tias :

"Kuv tuav txog Yes Xus Pleev lub npe, kuv ntiab koj tawm ntawm tus poj niam no mus."

Tus dab cia li tawm plaws Tam sim ntawd mus. 19 Tus ntxhais cov tswv pom tias lawv yuav tsis tau nyiaj ntxiv lawm, ces lawv ntes Paj Lug thiab Xis Las nkawd. Lawv cab nkawd mus rau tom lub tshaw puam, ntawm cov txwj laus xub ntiag, 20 ces lawv coj nkawd mus rau cov nom txiat txim, lawv hais tias :

"Ob tug neeg no ua kom peb lub zos ntxhov. Nkawd yog neeg Yus Das,

21 nkawd tshaj ib co kev cai uas peb cov Los Mas txais tsis tau thiab coj tsis tau."

22 Tas tsoom sid qw ntsuag qees rau nkawd. Ces cov nom txiat txim kom luag muab nkawd tej khaub ncaws hle, thiab muab nkawd nplawm. 23 Lawv muab nkawd ntaus sab kawg, ces lawv mam muab nkawd pov rau hauv tsev loj faj. Lawv hais tuav ntsej rawv rau tus zov tsev loj faj kom zov nkawd zoo zoo.

24 Tus zov tsev loj faj hnov cov nom tswv hais li ntawd, mas nws coj nkawd mus kaw hauv lub qhov taub uas nyob hauv lub nruab nrog tsev loj faj, thiab tseem xuas saw hlau khi nkawd ko taw tib si.

Ntuj npo ob tug tub tshaj Ntuj lus dim tsev loj faj. 16 : 25 - 40.

25 Thaum ib tag hmo, Paj Lug thiab Xis Las nkawd teev ntuj, nkawd hu nkauj cav txog Tswv Ntuj. Cov neeg nyob txim mloog nkawd. 26 Ib sij huam, lub tsev loj faj qeeg heev, cov phab ntsa ua zog tas. Tas cov qhov rooj cia li qhib plho tam sim ntawd, hos cov saw khi cov neeg raug txim plam tas huv tib si. 27 Tus zov tsev loj faj tsim dheev los, nws pom cov qhov rooj qhib lug, ces nws rho hlo nws rab ntaj, nws yuav rov tua nws, vim nws xav tias cov neeg raug txim twb khiav tas lawm. 28 Tab sis Paj Lug qw ib suab nrof tias :

"Koj txhab tua koj. Peb sawv daws tseem nyob ntawm no huv tib si."

29 Tus zov tsev loj faj thiaj kom luag taws tsau, ces nws chaws nrawm nroos los hauv, nws tshee tshee, nws los txhos caug ntawm Paj Lug thiab Xis Las nkawd. 30 Ces nws coj nkawd tawm sab nraud, nws hais rau nkawd tias :

"Huab Tais, kuv yuav ua li cas Ntuj thiaj yuav cawm kuv ?"

31 Nkawd teb tias :

"Koj ntseeg txog Huab Tais Yes Xus, ces Ntuj yuav cawm koj thiab koj tsev neeg." 32 Nkawd qhia Huab Tais Lo Lus rau nws, thiab rau cov neeg hauv nws tsev tas huv tib si. 33 Tus zov tsev loj faj coj nkawd los hauv nws tsev, thaum ntawd twb yog ib tag hmo lawm. Nws ntxuav nkawd cov qhov txhab. Ces nws thiab tas nws tsev neeg huv si txais lub cim ntxuav tam sim ntawd. 34 Nws coj nkawd nce mus saum nws tsev, nws rau mov rau sawv daws noj. Nws thiab tas nws tsev neeg huv si zoo siab, vim lawv ntseeg txog Tswv Ntuj lawm.

35 Thaum kaj ntug, cov nom tswv xa ib co neeg tuaj hais rau tus zov tsev loj faj tias : "Koj tso cov neeg ntawd mus."

36 Tus zov tsev loj faj thiaj qhia Paj Lug tias :

"Cov nom tswv twb xa lus tuaj kom tso neb mus. Mas neb kav tsij tawm mus mog."

37 Tab sis Paj Lug hais rau cov tub rog tias :

"Wb yog ob tug pej xeem Los Mas. Lawv muab wb ntaus nyob ntawm zeej tsoom xub ntiag, tsis tshuaj xwm dab tsi li, thiab lawv tseem muab wb pov rau hauv tsev loj faj. Nyem no, lawv xav tso wb mus twj ywm xwb, mas tsis tau li. Tseev kom lawv tuaj tso wb mus, mas thiaj tau."

38 Cov tub rog xa cov lus ntawd mus rau cov nom tswv. Cov nom tswv hnov tias nkawd yog ob tug tseem pej xeem Los Mas, ces lawv ntshai kawg. 39 Lawv tuaj thov nkawd kom nkawd tso lub tsheej tseg sai.

40 Thaum nkawd tawm hauv tsev loj faj, nkawd mus hauv Lis Dias tsev, nkawd pom cov kwv tij nyob ntawd, nkawd ntuas lawv tas, ces nkawd thiaj sawv kev mus lawm.

Cov Yus Das xav ntes Paj Lug thiab Xis Las nkawd nyob Tes Xas Los Nis. 17 : 1 - 9.

17 1 Paj Lug thiab Xis Las nkawd hla Aas Fis Pos Lis thiab As Pos Los Nias tas, nkawd mam li tuaj txog Tes Xas Los Nis. Cov Yus Das muaj ib lub tsev txoos nyob ntawd. 2 Paj Lug ua raws li nws ua kam, nws mus cuag cov Yus Das nyob hauv lub tsev txoos. Nws nrog cov Yus Das tham txog Ntawv Ntshiab peb hnub sib law.

3 Nws nthuav Ntawv Ntshiab rau lawv, thiab nws qhia tias Leej Pleev yuav tsum raug luag tsim txom tas tso, mas nws mam li sawv hauv cov tuag rov los. Nws hais tias :

"Leej Pleev yog Yes Xus, tus uas kuv tshaj txog nws rau nej."

4 Leej puav pom zoo txais Paj Lug thiab Xis Las nkawd cov lus. Cov pej kum neeg hwm Ntuj thiab ib co Hes Las coob thiab ntau tus poj nom txais nkawd cov lus thiab. 5 Tab sis cov Yus Das khib. Lawv thiaj haub cov neeg dog dig uas tuaj nyob ntawd los ua tej pab kom sawv daws ua ntxhov quav niab puv lub nroog. Ces lawv tuaj vij Zas Xoos lub tsev, lawv nrhiav Paj Lug thiab Xis Las nkawd, lawv xav coj nkawd mus rau cov nom tswv.

6 Lawv nrhiav tsis tau nkawd, ces lawv muab Zas Xoos thiab ob peb tug kwv tij cab mus rau cov nom. Lawv qw ntsuag qees tias :

"Cov niag neeg ntawd twb ua lub ntiaj teb ntxhov quav niab, nyem no lawv tuaj txog ntawm no, 7 Zas Xoos txais lawv nyob hauv nws tsev. Cov niag ntawd hla Xes Ntxas cov lus ceeb toom ; lawv tshaj tias muaj dua lwm tus Vaj hu ua Yes Xus."

8 Lawv qw qw li ntawd ces cov nom

tsvw thiab tsoom sid txhawj tas nrho.
9 Cov nom tswv yuav tseev kom Zas
Xoos thiab cov kwv tij muab nyiaj tuaj
txhiv, mas cov nom thiaj li tso lawv mus.

**Paj Lug nkawd rov ntsib teeb
meem nyob Npes Les. 17 : 10 - 15.**

10 Hmo ntawd, cov kwv tij cia li xa Paj
Lug thiab Xis Las nkawd Tam sim ntawd
mus rau Npes Les. Nkawd mus txog
Npes Les, nkawd mus tom cov Yus Das
lub tsev Txoos. 11 Cov Yus Das ntawd
muaj lub siab ncaj dua cov nyob Tes Xas
Los Nis. Lawv kub siab lug txaix Ntuj lo
lus. Ntuj hnub lawv xyuas saib Ntaww
Ntshiab puas raug raws li Paj Lug qhia.
12 Muaj coob leej txais kev ntseeg : ib
co, yog cov poj niam Hes Las muaj meej
mom thiab tseem muaj ib co txiv neej
thiab.

13 Tab sis thaum cov Yus Das nyob Tes
Xas Los Nis hnov tias Paj Lug tshaj Tswv
Ntuj lo lus nyob Npes Les lawm, ces lawv
tuaj ua kom tsoom sid ua ntxhov quav
niab dua thiab. 14 Ua li mas cov kwv tij
xa Paj Lug sai sai mus rau nram ntug dej
hiav txwv. Xis Las thiab Tis Mos Tes
nkawd nyob hauv Npes Les ntxiv.

15 Cov neeg uas xa Paj Lug, lawv xa
nws mus txog ntua As Thes Nas, lawv
mam rov qab. Lawv coj Paj Lug cov lus
rov los rau Xis Las thiab Tis Mos Tes
nkawd kom nkawd mus cuag Paj Lug sai.

**Paj Lug nyob As Thes Nas.
17 : 16 - 34.**

16 Paj Lug nyob As Thes Nas tos Xis
Las thiab Tis Mos Tes nkawd. Nws pom
muaj mlom pawg lug puv lub tsheej, mas
nws meem txom. 17 Ces nws mus nrog
cov Yus Das thiab cov neeg hwm Tswv

Ntuj tham nyob hauv lub tsev txoos. Ntuj
hnub, nws nrog cov neeg dua kev tham
nyob ntawm cov nom lub tshav. 18 Kuj
muaj tej tus kws txuj Es Pis Kws thiab
Tos Es Xias tuaj nrog nws tham thiab.
Muaj qee leej sib ntxhi tias :

"Tus leej nkaub ntawd xav piav dab tsi ?"

Ib txhia hais tias :

"Zoo li yog ib tug qhia txog cov dab
qhuas nyob pej kum teb."

Lawv hais li ntawd, vim Paj Lug hais
txog Yes Xus thiab txog kev sawv rov
los. 19 Ces cov kws txuj coj Paj Lug
mus hauv lub tsev sab laj As Les Os Pas.
Lawv nug nws tias :

"Peb xav paub koj zaj kev cai tshiab puas
tau ? 20 Cov lus koj hais rau peb hnov,
yog tej yam txawv tas nrho. Peb xav
paub saib yog hais txog dab tsi tiag."

21 Tas cov neeg nyob hauv As Thes Nas
thiab cov neeg pej kum teb uas tuaj nyob
hauv lub nroog, sawv daws puav leej tsis
muaj dab tsi ua laug caij. Lawv kawg
nyob piav thiab mloog tej xwm tshiab uas
nyuam qhuav tshwm sim.

22 Ces Paj Lug sawv ntsug nyob hauv
nruab nrab lub tsev As Les Os Pas. Nws
hais tias :

"Cov As Thes Nas, raws li kuv pom mas
nej yog ib co neeg hwm dab zoo tshaj tej.
23 Kuv mus yos hauv nej lub tsheej thiab
mus xyuas nej cov tsev teev dab, mas kuv
pom muaj ib lub thaj txi dab uas sau ib co
npe ntawv tias : "Cia hwm tus dab peb
tsis paub." Mas tus uas nej hwm, tab sis
nej tsis paub nws, kuv tuaj tshaj txog nws
rau nej paub.

24 Tus Tswv Ntuj tsim lub ntiaj teb thiab
tsim tas puas tsav yam nyob hauv lub sim
ceeb, nws yog tus Huab Tais kav lub ntuj
lub teb. Nws tsis nyob hauv cov tsev teev
ntuj uas yog neeg ob txhais tes txhim.

25 Nws kuj tsis yuav neeg ob txhais tes

los tsob hwb nws, xws li tus xav yuav ub yuav no. Nws yog tus pub txoj sia rau sawv daws, nws pub txoj pa thiab tas puas tsav yam rau peb. 26 Tswv Ntuj tsim neeg los nyob puv lub ntiaj teb ; nws ua neeg tawm ntawm ib lub hauv paus los, nws teem caij teem chaw rau cov haiv neeg nyob. Tos nws ua li ntawd yog vim 27 nws xav kom neeg maj mam maub nrhiav kom mus cuag tau Tswv Ntuj, thiab ntsib Tswv Ntuj. Vim tias Tswv Ntuj yeej nyob ze peb txhua leej txhua tus. 28 Peb nyob hauv Tswv Ntuj txhais tes, mas peb thiaj muaj txoj sia, txawj nti, thiab ciaj taus. Nej twb muaj ib co neeg tau hais tias : "Peb yog Tswv Ntuj caj ces."

29 Li ntawd, peb yog Tswv Ntuj caj ces, mas peb yuav tsis txhob xav tias Tswv Ntuj yog zoo li ib thooj kub, ib thooj nyiaj, los ib thooj pob zeb uas neeg lub tswv yim thiab txhais tes txawj tes nkiag puab tau. 30 Nyem no, Tswv Ntuj tsis xav kom neeg nyob hauv txoj kev tsis paub Ntuj ntxiv. Tswv Ntuj ceeb toom rau ib zeej tsoom nyob tas qhov txhia chaw tias sawv daws yuav tsum hloov siab los thov txhaum. 31 Vim Tswv Ntuj tau teem ib hnub cia txiav txim rau lub qab ntuj neeg raws li txoj kev ncaj. Tswv Ntuj twb xaiv tus txiav txim ntawd lawm, nws tsa tus txiav txim sawv hauv cov tub tuag rov los, sawv daws thiab paub tseeb tias Tswv Ntuj tso siab rau tus yuav txiav txim ntawd."

32 Thaum Paj Lug nyuam qhuav hais txog kev sawv hauv cov tub tuag rov los, mas ib txhia thuam Paj Lug, ib txhia hais rau Paj Lug tias :

"Lwm zaus tso, peb mam rov mloog koj hais txog qhov ntawd dua."

33 Ua li mas Paj Lug tso lawv tseg li ntawd. 34 Tsis kav, kuj muaj tus puav

raws Paj Lug thiab txais kev ntseeg. Cov txais kev ntseeg muaj ib tug yog Dias Nws Xyos, uas nws yog ib tug kws txuj hauv cov As Les Os Pas ; muaj ib tug poj niam hu ua Das Mas Lis thiab ob peb leeg ntxiv uas lawv tau txais kev ntseeg.

Paj Lug tsa lub Koom Txoos nyob Kos Lis Nthos. 18 : 1-11.

18 1 Ua li ntawd tas, ces Paj Lug tawm hauv As Thes Nas. Nws mus txog Kos Lis Nthos. 2 Nyob Kos Lis Nthos, Paj Lug ntsib ib tug Yus Das hu ua As Kis Las. As Kis Las yug los nyob Poos Tus teb, nws mus nyob Los Mas. Nws thiab nws poj niam hu ua Phis Xis Las nkawd nyuam qhuav tsiv tim Is Tas Lias teb los txog. Vim tus Vaj Kaus Dias ceeb toom rau cov Yus Das kom lawv sawv daws tawm hauv Los Mas mus. Paj Lug mus cuag nkawd. 3 Vim tias Paj Lug kuj ua txoj hauj lwm uas nkawd ua thiab, nws thiaj mus nrog nkawd nyob, ces lawv ua hauj lwm ua ke. Lawv txoj hauj lwm yog ntos ntaub ua tsev tsam phooj. 4 Niaj hnub, Paj Lug mus qhia sawv daws nyob hauv lub tsev txoos. Nws siv zog qhia cov Yus Das thiab cov Hes Las kom lawv ntseeg.

5 Thaum Xis Las thiab Tis Mos Tes nkawd tuaj ntawm Mas Xes Dos Nias teb tuaj txog lawm, mas Paj Lug siv nws lub sij hawm cia tshaj Lo Lus lawm xwb. Nws zeem tseeb rau cov Yus Das tias Yes Xus yog Leej Pleev. 6 Tab sis lawv tsis ntseeg, lawv hais tej lo lus thuam Ntuj. Ces Paj Lug nchos nws cov ris tsho thiab nws hais rau lawv tias :

"Cia nej cov ntshav rov poob los rau saum nej taub hau. Kuv li mas kuv tsis txhaum. Txij no mus, kuv yuav mus tsham cov neeg teev pej kum dab."

7 Paj Lug hais li ntawd tas, ces nws sawv kev mus. Nws mus hauv ib tug hu ua Tis Tos Yus Tus lub tsev. Yus Tus yog ib tug neeg hwm Tswv Ntuj ; nws lub tsev nyob puab lub tsev Txoos. 8 Khis Pus uas yog tus saib lub tsev Txoos nrog nws tsev neeg sawv daws ntseeg txog Huab Tais. Muaj ntau leej Kos Lis Nthos hnov Paj Lug, lawv ntseeg thiab txais lub cim ntxuav.

9 Muaj ib hmos, Paj Lug ua yog toog pom Huab Tais hais rau nws tias : "Koj tsis txlob ntshai, kav tsij rau siab ntso hais lus, koj tsis txlob nyob twj ywm. 10 Vim kuv nrog nraim koj, tsis muaj leej twg yuav tsa tes ua phem rau koj tau. Vim tias kuv muaj ib haiv neeg coob nyob hauv lub tsheej no."

11 Ces Paj Lug thiaj nyob hauv lub tsheej ntawd ib xyoos thiab rau hli. Nws qhia Tswv Ntuj lo lus rau lawv.

Cov Yus Das mus kom Paj Lug rau cov nom tswv. 18 : 12 - 17.

12 Thaum ntawd, Nkas Loos ua pwm tsav kav lub xeev As Kas Yis. Cov Yus Das koom siab sawv ntxeev Paj Lug, lawv coj Paj Lug tuaj rau lub tsev txiav txim. 13 Lawv hais tias :

"Tus neeg ntawd tuaj haub zeej tsoom kom sawv daws teev Tswv Ntuj tsis haum Txoj Cai."

14 Paj Lug tseem yuav qhib ncauj hais, tab sis Nkas Loos twb teb ntua rau cov Yus Das tias :

"Cov Yus Das, yog nej hais txog kev ua tub sab tub nyiag, los kev ua phem, mas kuv yuav nrog nej tu plaub tu ntug. 15 Tab sis yog nej sib cav txog tej lo lus, tej lub npe, thiab txog ib txoj cai uas yog nej li, mas cia nej ua nej. Kuv tsis kam txiav

txim rau tej yam ntawd." 16 Ces Nkas Loos ntiab sawv daws tawm hauv tsev txiav txim. 17 Sawv daws thiaj ntes tus saib lub tsev Txoos hu ua Xos Tes Nes. Lawv muab nws ntaus nyob ze lub tsev txiav txim. Nkas Loos tsis quav ntsej rau tej ntawd li.

Paj Lug rov los As Nthias Kias.

18 : 18 - 22.

18 Paj Lug tseem nyob Kos Lis Nthos ib ntus ntxiv, nws mam ncaim cov kwv tij mus. Nws nce nkoy mus rau Xis Lias teb. Phis Xis Las thiab As Kis Las nkawd nrog nws mus.

Lawv mus txog Kees Khes, Paj Lug chais plaub hau, vim nws tau fiv ib lub yeem li ntawd. 19 Lawv tuaj txog Es Fes Xos, lawv nqes nkoy. Paj Lug tso nws ob tug phooj ywg nyob ntawd. Nws mus hauv lub tsev Txoos, nws nrog cov Yus Das tham. 20 Cov Yus Das thov kom nws nyob ntev me ntsis, tiam sis nws tsis kam. 21 Thaum nws yuav ncaim lawv mus, nws hais tias :

"Yog Tswv Ntuj pom zoo, mas lwm zaus kuv yuav rov tuaj xyuas nej dua."

Ces nws rov nce nkoy ntawm Es Fes Xos mus ntxiv. 22 Paj Lug mus nqes nkoy nyob Xes Ntxas Les. Nws nce mus xyuas lub Koom Txoos nyob ntawd tas, nws mam li mus rau As Nthias Kias.

Paj Lug rov mus tshaj Ntuj lus zaum peb. 18 : 23.

23 Paj Lug nyob As Nthias Kias ib ntus, nws sawv kev mus ntxiv. Nws mus xyuas Nkas Las Tias teb thiab Fis Zias teb. Nws pab cov thwj tim kom sawv daws ntseeg khov ntseeg ruaj.

As Pos Los tuaj nyob Es Fes Xos.

18 : 24 - 28.

24 Ib tug Yus Das hu ua As Pos Los, nyob As Les Xas Nrias tuaj txog Es Fes Xos. Nws yog ib tug neeg txawj tham thiab paub Ntawv Ntshiab zoo. 25 Nws tau kawm Huab Tais Txoj Kev. Nws kub siab, nws hais thiab nws qhia raug kawg txog Yes Xus, tab sis nws tsuas paub Zam lub cim ntxuav xwb. 26 Nws hais lus muaj cuab kav thiab tsis ua xyem xyav nyob hauv lub tsev Txoos. Phis Xis Las thiab As Kis Las nkawd mloog nws hais tas, ces nkawd coj nws nrog nkawd mus, thiab nkawd qhia Tswv Ntuj Txoj Kev rau nws kom meej dua.

27 As Pos Los xav mus As Kas Yis teb. Cov kwj tij txheem nws kom ua siab loj mus. Lawv sau ib tsab ntawv mus rau cov thwj tim kom lawv txais nws. Vim Ntuj lub txiaj ntsim pab, mas thaum nws tuaj txog As Kas Yis teb, nws tau pab cov ntseeg ntawd kawg.

28 Nws ua siab loj siab tawv tab meeg tiv cov Yus Das. Nws siv Ntawv Ntshiab los qhia tias Yes Xus yeej yog Leej Pleev tiag.

Zam ib pab thwj tim txais lub cim ntxuav, nyob Es Fes Xos. 19 : 1 - 7.

19

1 Thaum As Pos Los nyob Kos

Lis Nthos, Paj Lug hla lub teb chaws toj siab mus rau Es Fes Xos. Nws ntsib ib co thwj tim nyob ntawd. 2 Nws nug lawv hais tias :

"Thaum nej los ntseeg, nej puas tau txais Leej Ntuj Plig Ntshiab ?"

Lawv teb nws tias :

"Peb tsis tau hnov tias muaj Leej Ntuj Plig Ntshiab li."

3 Paj Lug thiaj hais tias :

"Ua li nej txais leej twg lub cim ntxuav?

Lawv teb tias :

"Peb txais Zam lub cim ntxuav."

4 Paj Lug hais rau lawv tias :

"Zam ua kab ke ntxuav kom sawv daws thov txhaum. Nws hais kom tsoom laj mej pej xeem ntseeg txog tus yuav lawv nws qab tuaj, tus ntawd yog Yes Xus."

5 Lawv hnov cov lus ntawd, mas lawv txais lub cim ntxuav nyob hauv Huab Tais Yes Xus lub npe. 6 Thaum Paj Lug tsa tes rau lawv, mas Leej Ntuj Plig Ntshiab los nyob saum lawv, ces lawv hais ib co xeem lus tshiab, thiab lawv ua yaj saub. 7 Pab neeg no tas huv si, muaj kaum ob leeg.

Paj Lug tsim lub Koom Txoos nyob Es Fes Xos. 19 : 8 - 10.

8 Paj Lug mus hauv lub tsev Txoos. Nws muaj cuab kav hais lus thiab tsis ua xyem xyav peb lub hlis, nws tham thiab muab siab rau nrhiav cov lus hais kom raug Tswv Ntuj lub Ceeb Tsheej. 9 Tab sis muaj ib co ua siab txhav tawv kawg, lawv tsis kam ntseeg li, ces lawv txhob txwm thuam Txoj Kev nyob ntawm sawv daws xub ntiag. Nws thiaj tso cov neeg ntawd tseg. Nws coj cov thwj tim mus rau ib qho, nws niaj hnub nrog lawv tham nyob hauv Tws Las Nos lub tsev kawm ntawv.

10 Paj Lug qhia kev ntseeg li ntawd ob xyoos, ces tas cov neeg nyob As Xias teb, tsis hais cov Yus Das los cov Hes Las, sawv daws puav leej tau hnov txog Huab Tais lo lus.

Cov Yus Das txawj ntiab dab nyiag hu txog Yes Xus lub npe.

19 : 11 - 20.

- 11 Tswv Ntuj xuas Paj Lug txhais tes ua
ib co hwj huam yees ntxwv uas tsis tau
muaj neeg pom dua. 12 Tej phuam thiab
tej ntaub uas tau chwv Paj Lug lub cev
lawd, lawv muab los chwv cov neeg mob
xwb, mas lawv tus mob cia li zoo, hos
cov dab phem los cia li khiav mus.
- 13 Muaj ib co Yus Das txawj ntiab dab,
uas mus ib lub zos rau lwm lub zos. Lawv
tuav txog Huab Tais Yes Xus lub npe rau
cov neeg raug dab. Lawv sim hais tias :
"Kuv tuav txog tus Yes Xus uas Paj Lug
tshaj txog nws lub npe, kuv ntiab nej."
- 14 Cov neeg ua li ntawd yog Xes Vas
xya leej tub. Xes Vas yog ib tug leej choj
Yus Das. 15 Tab sis tus dab phem teb
lawv tias :
"Yes Xus, mas kuv paub nws. Kuv kuj
paub tias Paj Lug yog leej twg. Tiam sis
nej, mas kuv tsis paub nej yog leej twg."
- 16 Ces tus neeg raug dab phem tib plhaw
mus mos ntiag lawv, muab lawv ntaus sab
kawg. Lawv mam khiav tawm liab qab
hauv lub tsev mus, lawv ib ce to tas.
- 17 Tas cov neeg nyob Es Fes Xos, tsis
hais cov Yus Das los cov Hes Las, sawv
daws hnov hais txog qhov ntawd. Tas
sawv daws ntshai kawg. Sawv daws cav
lus zoo txog Huab Tais Yes Xus lub npe.
- 18 Cov uas tig los ntseeg, coob leej tuaj
lees lawv tej kev vam txog dab yav thaud.
- 19 Ib co neeg coob uas txawj tso dab,
ntau leej nqa lawv tej phau ntawv tuaj
hawv rau sawv daws pom. Cov ntawv
no muaj nqe ze ntawm tsib caug txhiab
lub txiaj nyiag. 20 Ua li mas Huab Tais
lo lus hlob zuj zus thiab muaj zog zuj zus.

**Paj Lug xav mus txog lub tuam
ceeb Los Mas. 19 : 21 - 22.**

- 21 Tej xwm no dhau tas, Paj Lug npaj
tias nws yuav mus Yes Lus Xas Les, mas

nws yuav hla Mas Xes Dos Nias thiab As
Kas Yis teb. Nws hais tias :

"Thaum kuv mus xyuas Yes Lus Xas Les
tas lawd, kuv yuav mus xyuas Los Mas
thiab."

- 22 Ces nws xa ob tug tub pab nws mus
Mas Xes Dos Nias : yog Tis Mos Tes
thiab Es Las Tos nkawd. Hos Paj Lug
mas nws tseem nyob As Xias teb ib ntus
ntxiv.

**Cov kws ntaus nyiaj xav ntes Paj
Lug nyob Es Fes Xos. 19 : 23 - 40.**

- 23 Ze lub sij hawm ntawd, muaj lus sib
cav ntxhov quav niab loj vim Txoj Kev.
24 Muaj ib tug hu ua Des Mes Rhias,
nws yog ib tug kws ntaus nyiaj. Nws
xuas nyiaj nchuav ua tej lub thaj teev tus
dab As Tes Mis. Nws muab hauj lwm rau
ntau tus kws ntaus nyiaj ua.

- 25 Des Mes Rhias hu nws cov tub zog
thiab cov kws nchuav nyiaj huv tib si tuaj.
Nws hais rau lawv tias :

"Cov npawg, nej paub tias peb tau noj qab
hnav zoo vim peb txoj hauj lwm nchuav
nyiaj. 26 Tab sis, nej sawv daws pom
thiab hnov hais tias nyob Es Fes Xos
thiab nyob yuav luag tas hauv As Xias
teb, tus Paj Lug no ntxias ib pab neeg
coob kawg kom txhob teev dab. Nws
hais tias cov dab uas neeg txhais tes txua,
tsis yog ib co tswv ntuj. 27 Ua li mas
ntev mus ntshai peb txoj hauj lwm yuav
poob nqi, thiab yuav tsis muaj neeg saib
lub tsev teev tus niam nkauj dab loj loj As
Tes Mis, ntshai nws lub koob meej uas
tas As Xias thiab lub qab ntuj khwb
hawm yuav ploj."

- 28 Lawv hnov cov lus no, lawv sawv
daws npau taws heev kawg, lawv nthe
ntthe tias :

"Tus loj tshaj, yog cov Es Fes Xos tus

niam nkauj As Tes Mis !"

29 Tas lub nroog ua ntxhov quav niab. Lawv sawv daws khiav nplawg ntia tuaj tom lub tsev ua yees siv. Lawv ntes Nkas Yus thiab As Lis Tas, uas yog Paj Lug ob tug npawg Mas Xes Dos Nias, nkawd yog ob tug ua nws luag mus tshaj ntuj lus.
 30 Paj Lug xav txeem mus hauv tsoom sid, tab sis cov thwj tim tsis pub nws mus.
 31 Ob peb tug nom tswv uas nrog Paj Lug ua phooj ywg kuj xa lus tuaj hais rau Paj Lug kom tsis txhob tuam yim mus tom lub tsev yees siv. 32 Cov neeg nyias nthe nyias zaj sib txawv tas nrho, vim kev ntxhov kis tas pab neeg ntawd. Feem coob twb tsis paub tim li cas sawv daws thiaj tuaj sib ntsauv nyob ntawd.
 33 Lawv rub As Les Xas Nros tawm hauv tsoom neeg los, vim cov Yus Das muab nws thawb mus rau ntawm tsoom sid xub ntiag. As Les Xas Nros thiaj tsas tes, xav hais kom sawv daws to taub.
 34 Tab sis thaum luag pom tias nws yog ib tug Yus Das, ces tas sawv daws ua ib tsaug nthe ntev li ob teev, hais tias : "Tus loj tshaj, yog cov Es Fes Xos tus niam nkauj As Tes Mis."

35 Ces tus nom tswj nroog kom sawv daws tswm seeb. Nws hais tias : "Cov Es Fes Xos, nyob ntiaj teb no, leej twg thiaj tsis paub tias lub nroog Es Fes Xos yog lub uas zov tus niam nkauj As Tes Mis loj loj, thiab nws tus mlom uas poob saum ntuj los ? 36 Qhov no, muaj tseeb, tsis muaj leej twg cav tau li. Ua li mas nej yuav tsum nyob tus yees, tsis txhob lam tau lam ua tsis saib qab saib hau. 37 Vim tias cov neeg uas nej coj los no, lawv tsis tau ua ib qho tub qaug thiab tsis tau thuam peb tus dab. 38 Yog tias Des Mes Rhias thiab nws cov kws ntaus nyiaj, lawv tsis zoo siab rau leej twg, mas twb muaj cov rooj sab laj, thiab cov nom

hais plaub : cia lawv coj mus hais hauv rooj plaub rooj ntug.

39 Yog nej muaj yam twg xav hais, mas yuav tsum hais hauv cov rooj sab laj raws li txoj cai. 40 Yog ua li nej ua hnub no, mas peb yuav raug luag liam tias peb ntxias tsoom pej xeem kom ntxeev siab rau cov nom tswv. Vim tias tsis muaj ib yam dab tsi txaus ua kom neeg tuaj sib sau coob npaum li no." Nws hais cov lus no tas, ces nws kom nyias rov mus nyias tsev.

Paj Lug mus Mas Xes Dos Nias thiab Hes Las teb. 20 : 1 - 6.

20 1 Thaum sawv daws rov nyob tus lawm, mas Paj Lug hu cov thwj tim tuaj. Nws ntuas lawv, thiab hais ib co lus hwm sawv daws tas, ces nws mus Mas Xes Dos Nias teb. 2 Thaum nws hla Mas Xes Dos Nias teb, nws ntuas cov ntseeg ntev loo, nws mam li mus rau Hes Las teb. Nws nyob peb hlis nyob ntawd. 3 Thaum nws tab tom yuav caij nkij mus rau Xis Lias teb, mas cov Yus Das npaj ua phem rau nws, ces nws thiaj hla Mas Xes Dos Nias teb rov qab los mus.

4 Muaj ob peb leeg nrog nws mus, yog : Pws Los tus tub Xos Pas Ros uas nyob Npes Les Hes tuaj, As Lis Tas thiab Xes Kus Ntus, uas nyob Tes Xas Los Nis tuaj, Nkas Yus uas nyob Dos Npes Les tuaj, Tis Mos Tes, thiab tseem muaj ob tug As Xias hu ua Tws Sis Kos thiab Tos Fis Mos. 5 Lawv pab no, ua peb ntej mus lawm, lawv tos peb nyob Thuas.

6 Thaum ua lub Hnub Nyoog noj cov mov tsis xyaw poov xab tas lawm, peb mam li caij nkij ntawm Fis Lis Pos mus. Peb mus tau tsib hnub peb thiaj mus caum tau lawv nyob Thuas. Peb so xya hnub nyob ntawd.

Nyob Thuas, Paj Lug tsa ib tug neeg tuag sawv rov los. 20 : 7 - 12.

7 Hnub chiv lub lis piam, peb sawv daws tuaj sib txoos ua kab ke lov mov. Vim tias tag kis kaj ntug Paj Lug yuav sawv kev mus, ces nws nrog lawv tham ntev, nws tham txog ib tag hmo. 8 Lawv taws ntau lub teeb rau hauv kem tsev siab uas peb sib sau. 9 Muaj ib tug tub hluas hu ua Aws Tis Kos. Nws zaum ntawm qhov rai. Nws cia li tsaug zog lawm, hos Paj Lug hais lus tsis tseg. Aws Tis Kos tsaug zog heev, nws cia li poob puag saum txheej tsev peb mus rau hauv pem teb. Lawv muab nws tsa, tab sis nws twb tuag lawm. 10 Paj Lug nqes los txog, nws khoov mus tsaws tus tub hluas los puag. Nws hais tias :

"Nej tsis txhob ua ncha, nws tus plig tseem nyob."

11 Ces Paj Lug rov nce mus saum tsev, nws rov mus ua kab ke lov mov rau sawv daws noj tas. Nws tseem tham txog kaj ntug, nws mam li sawv kev mus. 12 Hos ntawm tus me hluas mas lawv coj nws rov los hauv tsev, nws muaj txoj sia. Qhov no yog ib txog kev zoo siab loj kawg.

Paj Lug sawv kev hauv Thuas mus rau Mis Les Tos. 20 : 13 - 16.

13 Peb caij nkoy ua ntej mus rau As Xos. Peb yuav tsum nyob ntawd tos Paj Lug. Paj Lug yeej teem li ntawd, vim nws mus ko taw. 14 Thaum nws caum tau peb nyob As Xos, nws nce los hauv peb lub nkoy, ces peb sawv daws ua ke mus Mis Tis Les Nas. 15 Tag kis sawv ntxov, peb rov caij nkoy mus ntxiv, peb mus txog Kis Yaus. Hnub tom qab, peb mus txog Xas Mos, ces peb nres nkoy nyob Tos Kis Loos. Peb tseem mus ib hnub ntxiv, peb

mam li mus txog Mis Les Tos. 16 Paj Lug hla Es Fes Xos, nws tsis so li, vim nws tsis xav theem ntev nyob As Xias teb. Nws maj maj, vim nws xav mus saib puas ncav lub hnub nyoog tsib caug nyob Yes Lus Xas Les.

Paj Lug hais cov lus sib ncaim rau cov txwj laus nyob Es Fes Xos.

20 : 17 - 38.

17 Thaum Paj Lug tuaj txog Mis Les Tos, nws xa neeg mus hu cov txwj laus saib lub Koom Txoos nyob Es Fes Xos tuaj. 18 Thaum lawv tuaj txog, nws hais rau lawv tias :

"Txij hnub kuv ko taw tau tsuj As Xias teb los txog tav no, nej paub tias kuv ib txwm ua li cas rau nej. 19 Kuv yog tus neeg me tsob hwb Huab Tais, kuv tau ntsib txoj kev los kua muag, txoj kev txom nyem ntau zaus, vim cov Yus Das tuav tswv yim ua phem rau kuv. 20 Kuv pom ib yam zoo ua los pab nej thaum twg, mas kuv tsis tau thaub qab ib zaug li, xws li thaum kuv qhuab ntuas nej thiab qhia nej nyob ntawm sawv daws xub ntiag los nyob hauv nej vaj nej tsev.

21 Kuv qhuab ntuas cov Yus Das thiab cov Hes Las tas zog kom sawv daws tig los mloog Tswv Ntuj thiab ntseeg txog peb tus Huab Tais Yes Xus Pleev.

22 "Nyem no, kuv mus Yes Lus Xas Les, Leej Ntuj Plig twb muab saw hlau los khi kuv lawm, kuv yeej tsis paub tias yuav muaj dab tsi tuaj raug kuv nyob ped.

23 Kuv tsuas paub tias thaum kuv hla ib lub nroog mus rau lwm lub, mas Leej Ntuj Plig Ntshiab qhia kuv tias saw hlau thiab kev txom nyem tos nrhw kuv.

24 Txawm li cas los kuv tsis saib tias kuv txoj sia muaj nqis hnyav. Tsuav yog kuv tau taug kuv txoj kev kom kawg thiab leg

cov dej num uas Huab Tais Yes Xus muab rau kuv leg kom tiav, yam li mus ua tim khawv txog lub Moo Zoo pub Tswv Ntuj lub txiaj ntsim. 25 Kuv paub tias txij no mus, tas nej cov uas kuv tau nrog nyob thiab qhia txog lub Ceeb Tsheej rau, mas nej yuav tsis pom kuv lub ntsej muag ntxiv lawm. 26 Vim qhov ntawd, mas hnub no, kuv thiab hais tseeb rau nej tias kuv tau ua ncaj rau nej sawv daws. 27 Thaum kuv tshaj txog kev uas Tswv Ntuj npaj rau nej, mas kuv tsis ntshai ib zaug li.

28 Nej yuav ceev faj rau nej, thiab muab siab rau saib pab yaj uas Leej Ntuj Plig Ntshiab tsa nej ua cov tswj zov thiab coj Tswv Ntuj lub Koom Txoos mus noj zaub. Yog lub Koom Txoos uas Tswv Ntuj muab nws roj ntsha los txhiv.

29 Kuv paub tias thaum kuv mus lawm, mas yuav muaj ib co hma tsiv tsaim txeem los nrog nej ua ib pab. Lawv yuav tsis txuag pab yaj siav. 30 Tab yog nyob hauv nej pab neeg no, haj tseem yuav muaj ib co neeg sawv los hais tej zaj nkhaus kom cov thwj tim raws laww.

31 Ua li mas nej yuav ceev faj mog. Nej nco ntsoov tias kuv tau quaj ntuas nej nruab hnub hmo ntuj peb xyoos.

32 Nyem no, kuv tso nej rau Tswv Ntuj thiab rau nws Lo Lus pub txiaj ntsim. Lo Lus ntawd muaj hwj huam txhim tau lub tuam tsev, thiab muaj hwj huam pub tau lub cuab tam rau cov ntshiab. 33 Kuv tsis tau ntshaw leej twg cov nyiaj, cov kub, los cov tsoos tsho. 34 Nej paub tias yog kuv ob txhais tes no ua rau kuv thiab kuv cov phooj ywg noj xwb. 35 Kuv ua txhij ua txhua li ntawd kom tau qhia nej tias peb yuav tsum khwv thiab yuav pab tau cov tsis muaj zog, thiab peb tseem yuav nco ntsoov Huab Tais Yes Xus cov lus tias :

"Thaum koj pub, koj muaj kev kaj siab ntau dua thaum koj tau txais."

36 Paj Lug hais cov lus no tas, nws txhos caug nrog lawv teev Ntuj. 37 Sawv daws quaj, sawv daws mus puag Paj Lug caj dab, thiab nwj Paj Lug. 38 Lawv sawv daws tu siab tshaj rau lo lus uas Paj Lug hais tias lawv yuav tsis rov pom nws ntxiv lawm. Ces sawv daws xa Paj Lug mus txog ntua lub nkjoj.

Paj Lug mus Yes Lus Xas Les.

21 : 1 - 14.

21 1 "Thaum peb tso lawv tseg lawm, thiab peb caij nkoj mus deb rau hauv plawv dej lawm, mas peb cia li ncaj qha mus rau Kaus. Tag kis tom qab, peb mus txog Los Das, ces peb mus ntxiv txog Pas Tas Las. 2 Nyob ntawd, peb nrhiav tau ib lub nkoj yuav mus Fes Nis Xias teb, peb nce hauv lub nkoj ces peb mus ntxiv. 3 Peb mus txog ze Kws Plos, peb pom Kws Plos nyob ntawm peb sab laug, tab sis peb ncaj qha mus rau Xis Lias teb. Peb nqes nkoj nyob Tws Los, vim lub nkoj thauj toob xib mus thau rau ntawd. Peb nrhiav tau cov thwj tim nyob Tws Los, ces peb nrog lawv nyob xya hnub. Leej Ntuj Plig Ntshiab qhia lawv, ces lawv hais rau Paj Lug kom nws txhob nce mus pem Yes Lus Xas Les.

5 Tab sis txog hnub sawv kev, peb cia li mus lawm. Peb mus ko taw. Sawv daws xa peb, cov poj niam thiab cov me nyuam yaus sawv daws huv tib si xa peb. Thaum peb tawm hauv lub tsheej mus txog sab nraud lawm, mas sawv daws txhos caug teev Ntuj ntawm ntug dej hiav txwv.

6 Teev Ntuj tas, peb sawv daws sib xa, yuav sib ncaim, ces peb nce nkoj. Cov neeg tuaj xa peb mam rov mus tsev.

7 Peb caij nkoj hla dej yuav txog chaw.

Peb sawv kev ntawm Tws Los mus rau Tos Les Mais. Peb nyob ib hnub hauv Tos Les Mais xyuas cov kwv tij. 8 Tag kis, peb rov sawv kev mus ntxiv rau Xes Ntxas Les. Peb mus so hauv Fis Lis Pos tsev. Fis Lis Pos yog ib tug tub tshaj lub Moo Zoo nyob hauv Pab Xya Leej uas cov Hauv Paus Xa Lus tau xaiv. 9 Nws muaj plaub tug ntxhais ua yaj saub.

10 Peb nyob ob peb hnub, ces peb ntsib ib tug yaj saub tuaj hauv xeev Yus Das tuaj, nws hu ua As Nkas Npus. 11 Nws tuaj xyuas peb, ces nws muab Paj Lug txoj siv pav nws tes nws taw, nws hais tias :

"Nej saib, Leej Ntuj Plig Ntshiab hais li no : Txoj siv no tus tswv yuav raug cov Yus Das muab nws khi zoo li no nyob Yes Lus Xas Les. Lawv yuav muab nws rau hauv cov neeg teev dab txhais tes."

12 Peb hnov cov lus no, mas peb nrog cov neeg nyob txawm ntawd thov Paj Lug kom nws tsis txhob nce mus pem Yes Lus Xas Les. 13 Tab sis nws teb rau peb tias :

"Tim li cas nej yuav quaj ua luaj no, nej ua kom kuv siab fab ua luaj ? Kuv yeej zoo siab cia lawv khi kuv, thiab kuv tseem haj yam zoo siab tuag nyob Yes Lus Xas Les vim Huab Tais Yes Xus lub npe."

14 Peb cheem tsis tau Paj Lug, ces peb tsis hais ntxiv, peb kawg hais li no xwb : "Thov kom muaj raws li Huab Tais lub siab xav."

Paj Lug tuaj txog Yes Lus Xas Les.
21 : 15 - 26.

15 Ob peb hnub tom qab, thaum peb tu peb cov nra txhij tas lawm, ces peb mus pem Yes Lus Xas Les. 16 Ib co thwj tim nyob Xes Ntxas Les ua peb luag mus,

lawv coj peb mus so hauv ib tug hu ua Nas Xoos tsev. Nws yog ib tug Kws Plos, thiab yog ib tug hauv cov uas xub los ua thwj tim dua cov.

17 Peb tuaj txog Yes Lus Xas Les mas cov kwv tij zoo siab txais peb. 18 Hnub tom qab, Paj Lug nrog peb mus tom Yas Kos tsev, cov txwj laus sawv daws tuaj sib sau nyob ntawd. 19 Thaum Paj Lug nrog lawv sib foom kev kaj lug tas, nws thiaj maj mam piav ib tog zuj zus txog tej yam uas Tswv Ntuj tau kom nws ua tim cov neeg teev dab. 20 Lawv hnov tej ntawd mas lawv cav txog Tswv Ntuj. Lawv hais rau Paj Lug tias :

"Tij laug, koj paub tias muaj ntau txhiab leej Yus Das txais txoj kev ntseeg, tab sis lawv kuj kub siab coj Mais Xes Txoj Cai thiab. 21 Lawv tau hnov luag tej hais tias koj tau qhia cov Yus Das uas nyob xyaw cov neeg teev dab kom lawv tso Mais Xes Txoj Cai tseg, kom tsis txhob ua lub cim txiav rau lawv cov me nyuam, thiab kom txhob ua raws li tej kev cai Yus Das ntxiv. 22 Ua li mas peb yuav ua li cas ? Vim sawv daws yeej yuav hnov tias koj los txog lawm, mas sawv daws yuav ua ntxhov hnyo xwb.

23 Li ntawd, mas koj yuav tau ua raws li peb hais no : Nyob ntawm no, peb muaj plaub tug neeg tau fiv yeem lawm. 24 Koj coj plaub tug ntawd mus, koj mus ua cov kab ke ntxuav huv, thiab koj them nqi rau lawv chais taub hau. Ua li mas sawv daws thiaj yuav paub tias tej yam lawv hnov hais txog koj tsis muaj tseeb. Koj yog ib tug neeg ua raws li Txoj Cai thiab. 25 Hais txog ntawm cov neeg teev dab uas los txais kev ntseeg, mas peb yeej qhia qhov uas peb twb tau txiav los tias lawv yuav caiv cov nqaij txi dab, caiv ntshav, caiv cov nqaij pos tuag, thiab caiv kev ua dev ua npua."

26 Hnub tom qab, Paj Lug thiaj coj plaub tug neeg ntawd mus. Nws nrog lawv mus txais cov kab ke ntxuav huv tas, nws chaws mus hauv lub Tuam Tsev Teev Ntuj mus hais rau cov leej choj tias tshuav pes tsawg hnub lawv yuav tuaj pauj yeem, kom cov leej choj txi ntuj rau lawv tsib leeg huv tib si.

**Cov Yus Das ntes Paj Lug.
21 : 27 - 40.**

27 Lub sij hawm xya hnub twb yuav dhau, ces cov Yus Das nyob As Xias teb txawm tuaj pom Paj Lug hauv lub Tuam Tsev Teev Ntuj. Lawv qw hu ib pab neeg coob tuaj ntes Paj Lug. 28 Lawv nthe hais tias :

"Cov His Xas Lais, nej tuaj pab peb saib. Tus no yog tus niag uas qhia sawv daws nyob tas qhov txhia chaw kom ntxub peb haiiv neeg, ntxub Txoj Cai, thiab ntxub qhov chaw no ! Nej ntsia saib, nws tseem coj ib co Hes Las tuaj tsuj hauv lub Tuam Tsev Teev Ntuj no thuam lub Chaw Ntshiab !"

29 Lawv nthe nthe li ntawd vim lawv tau pom ib tug Es Fes Xos hu ua Tos Fis Mos nrog Paj Lug ua ke hauv lub tsheej, ces lawv xav tias Paj Lug coj nws mus hauv lub Tuam Tsev Teev Ntuj thiab.

30 Tas lub tsheej ua ntxhov hnyo, tsoom pej xeem khiav nplawg ntia qhov txhia chaw tuaj. Lawv nthos nkaus Paj Lug, lawv muab nws thawb tis thawb cab tis cab tawm hauv lub Tuam Tsev Teev Ntuj mus lawm nraum zoov. Ces lawv kaw nkaus cov qhov rooj Tuam Tsev.

31 Lawv tseem npaj yuav muab Paj Lug tua, tab sis muaj neeg khiav mus hais rau tus xab txheeb Los Mas tias :

"Yes Lus Xas Les ua kub ua ntxhov tas."

32 Tus xab txheeb Los Mas coj kiag ib

pab tub rog nrog nws tuaj tam sim ntawd, cov tub rog dhia tuaj npuj cov neeg ua ntxhov ntawd. Thaum lawv pom tus xab txheeb thiab cov tub rog tuaj, mas lawv tsis ntaus Paj Lug ntxiv. 33 Tus xab txheeb thiab txav los nthos nkaus Paj Lug, nws kom lawv muab ob txog saw hlau xauv Paj Lug. Ces nws nug tias Paj Lug yog leej twg thiab nws tau ua dab tsi.

34 Tab sis tas tsoom sid nyias nthe nyias zaj. Sawv daws nthe ua ncha nthw, tus xab txheeb tshuaj tsis tau dab tsi meej li, ces nws kom lawv coj Paj Lug mus hauv lub yeej. 35 Thaum Paj Lug mus txog ntawm cov theem ntaiv pob zeb nce saum yeej, mas cov tub rog yuav tsum nqa Paj Lug, vim tsoom sid ua heev kawg rau Paj Lug. 36 Muaj neeg coob coob raws Paj Lug, lawv qw qw tias :

"Muab nws tua !"

37 Thaum lawv yuav coj Paj Lug nkag mus hauv lub yeej, nws nug tus xab txheeb tias :

"Kuv xav hais ib lo lus puas tau ?"

Tus xab txheeb nug tias :

"Koj paub lus Hes Las thiab lod ? 38 Ua li koj tsis yog tus Hais Nkws Tos uas tau tsis ntev no, nws hu plaub txhiab tus tub sab thiab coj lawv mus hauv teb chaws suab puam lod ?"

39 Paj Lug teb tias :

"Kuv yog ib tug Yus Das. Kuv yug los nyob Tas Xis, nyob Xis Lis Xias teb. Kuv yog ib tug pej xeem tuaj ntawm ib lub tsheej nto moo zoo tuaj. Kuv thov koj cia kuv hais lus rau tsoom pej xeem."

40 Tus xab txheeb tso lus kheev rau Paj Lug. Ces Paj Lug sawv saum cov theem ntaiv, nws tsa tes rau tsoom pej xeem. Tas sawv daws cia li tswm seeb.

Ces Paj Lug ua lus Hes Nplaws hais rau sawv daws.

Paj Lug hais lus rau cov Yus Das nyob Yes Lus Xas Les. 22 : 1 - 21.

22 1 Paj Lug hais tias :

"Niam txiv, kwv tij sawv daws, nej mloog cov lus kuv yuav hais rau nej saib, nej yuav pom tias kuv tsis tau ua dab tsi txhaum."

2 Thaum lawv hnov Paj Lug hais lus Hes Nplaws rau lawv, mas lawv haj yam tswm seeb zoo. Ces Paj Lug hais ntxiv tias :

3 "Kuv yog ib tug Yus Das. Kuv yug los nyob Tas Xis nyob Xis Lis Xias teb. Tab sis kuv tuaj hlob nyob hauv lub tsheej no. Nkas Mas Lias yog kuv tus xib hwb, nws qhia kuv kom ua raws nraim peb cov yawg koob Txoj Cai. Mas kuv yeej kub siab kawm txog Tswv Ntuj ib yam li nej nyem no. 4 Kuv hiam cov neeg uas coj Txoj Kev ntawd txog qhov tuag. Kuv tau muab saw hlau los khi poj niam txiv neej huv tib si, thiab coj lawv mus pov rau hauv tsev loj faj. 5 Tus thawj leej choj thiab pab txwj laus tib si puav leej ua tim khawv pom kuv tau ua li ntawd tiag. Kuv tseem tau txais lawv ib co ntawv hais txog cov kwv tij nyob Das Mas thiab. Ces kuv thiaj sawv kev mus Das Mas. Kuv npaj siab mus khi cov nyob Das Mas coj los rau txim nyob Yes Lus Xas Les. 6 Kuv

tseem tab tom mus kev, tshuav tsis deb yuav txog Das Mas, thaum ntawd twb yuav tav su, cia li muaj ib qho pom kev ci dawb paug loj loj tuaj saum ntuj tuaj vij kuv.

7 Kuv poob nthav pem teb, kuv hnov ib lub suab hais rau kuv tias : 'Xauv, Xauv, vim li cas koj hiam kuv ?' 8 Kuv teb tias : 'Huab Tais, koj yog leej twg ?' Ces lub suab ntawd teb kuv tias : 'Kuv yog tus Yes Xus Nas Xas Les uas koj hiam.' 9 Cov neeg nrog kuv kuj pom qhov pom kev ci dawb loj loj thiab, tab sis lawv tsis hnov lub suab hais lus rau

kuv. 10 Kuv hais ntxiv tias : 'Huab Tais, kuv yuav ua dab tsi ?' Huab Tais thiaj hais rau kuv tias : 'Koj sawv, koj mus Das Mas. Mus txog tod, mas lawv mam qhia tias koj yuav ua dab tsi.'

11 Thaum ntawd kuv tsis pom kev kiag li, vim qhov pom kev ci fam kuv qhov muag. Kuv cov phooj ywg thiaj tuav kuv tes, coj kuv mus txog Das Mas.

12 Nyob Das Mas muaj ib tug hu ua As Nas Nias, nws yog ib tug neeg hwm Ntuj zoo raws li Txoj Cai. Cov Yus Das nyob hauv lub tsheej ntawd sawv daws hais lus zoo txog nws. 13 Nws tuaj xyuas kuv. Thaum nws tuaj txog mas nws hais rau kuv tias : 'Xauv, kuv tus kwv, koj rov pom kev mog.' Kuv cia li pom nws tam sim ntawd. 14 Nws hais ntxiv tias : 'Peb cov yawg koob tus Tswv Ntuj yeej ib txwm xaiv koj lawm, kom koj paub nws lub siab, kom koj pom tus siab ncaj, thiab kom koj hnov lub suab tawm hauv nws lub ncauj los. 15 Vim tias koj yuav ua nws tim khawv nyob ntawm zeej tsoom xub ntiag. Koj yuav ua tim khawv txog tej yam koj tau pom tau hnov. 16 Ua li mas koj tseem yuav tos dab tsi ntxiv ? Koj kav tsij txais lub cim ntxuav thiab koj hu txog nws lub npe kom nws ntxuav koj cov txhaum.'

17 Thaum kuv rov qab los Yes Lus Xas Les, muaj ib hnub kuv teev Ntuj nyob hauv lub Tuam Tsev Teev Ntuj, zoo li kuv feeb rau hauv yeeb ceeb lawm.

18 Kuv pom Huab Tais hais rau kuv tias : 'Koj tsuag tsuag tawm hauv Yes Lus Xas Les mus, vim lawv yuav tsis txais koj cov lus ua pov thawj zeem txog kuv.'

19 Kuv teb tias : 'Huab Tais, lawv twb paub tseeb tias kuv tau mus ib lub tsev txoos dhau ib lub tsev txoos, mus ntes cov neeg ntseeg txog koj, muab lawv pov rau hauv tsev loj faj, thiab kom luag muab

hlua nplawm lawv. 20 Thaum luag muab koj tus tim khawv Tes Fas Nos tua, kuv kuj nyob ntawd thiab, kuv nrog luag pom zoo, kuv yog tus zov cov neeg tua Tes Fas Nos cov ris tsho.' 21 Huab Tais tseem hais ntxiv rau kuv tias : 'Koj cia li mus mog. Kuv xav xa koj mus deb deb, mus puag tim cov neeg teev pej kum dab.'

Paj Lug qhia tias nws yog pej xeem Los Mas. 22 : 22 - 29.

22 Sawv daws ua tib zoo mloog Paj Lug hais los txog tav no. Tab sis thaum nws hais cov lus ntawd, ces sawv daws cia li qw zom zaws tias :

"Nej kav tsij ua kom tus neeg ntawd ploj hauv lub ntiaj teb no mus ! Nws tsis tsim nyog ua neeg lawm !"

23 Sawv daws nthe nthe, tus hle tsho cuam pov tseg los muaj, tus tsuab hmoov av w saum ntuj los muaj. 24 Tus xab txheeb thiaj kom lawv coj Paj Lug mus hauv lub yeej, nws kom lawv nplawm Paj Lug saib Paj Lug puas yuav qhia tias yog vim li cas tsoom sid thiaj nthe tas npaud rau nws.

25 Thaum lawv muab hlua khi Paj Lug tas, mas Paj Lug hais rau tus lwm txheeb tias :

"Ib tug pej xeem Los Mas uas lawv tsis tau txiav txim rau nws, nej puas muaj cai muab hlua nplawm nws ?"

26 Ces tus lwm txheeb thiaj mus cuag tus xab txheeb thiab hais rau nws tias :

"Koj yuav ua li cas ? Tus ntawd yog ib tug pej xeem Los Mas."

27 Ces tus xab txheeb thiaj los nug Paj Lug tias :

"Koj qhia kuv saib, koj yog ib tug pej xeem Los Mas los tsis yog ?"

Paj Lug teb tias : "Kuv yog".

28 Tus xab txheeb hais ntxiv tias :

"Kuv tau siv nyiaj ntau kawg mas kuv thiaj tau ua ib tug pej xeem Los Mas." Ces Paj Lug hais tias :

"Kuv yeej yug los ua pej xeem Los Mas."

29 Tam sim ntawd cov npaj yuav nplawm Paj Lug txav mus, hos tus xab txheeb kuj ntshai, vim nws muab saw hlau khi ib tug pej xeem Los Mas.

Lub Rooj Txwj Laus Xas Nes Nrees txiav txim rau Paj Lug.

22 : 30 + 23 : 1 - 11.

30 Hnub tom qab, tus xab txheeb xav paub tseeb tias cov Yus Das liam dab tsi rau Paj Lug, ces nws daws Paj Lug thiab nws kom cov leej choj thiab tas tsoom txwj laus tuaj sib sau. Nws coj Paj Lug mus rau lawv nug.

23 1 Paj Lug ntsia ntsoov pab txwj laus, nws hais tias :

"Kwv tij, kuv lub siab tiaj tus yees leg kuv tej dej num nyob ntawm Tswv Ntuj xub ntiaj, los txog niaj hnub no."

2 Tiam sis tus thawj leej choj As Nas Nias kom cov neeg nyob ntawd ib tawg ncuav rau Paj Lug qhov ncauj. 3 Ces Paj Lug hais rau nws tias :

"Phab ntsa zas hmoov zeb sib, yog Tswv Ntuj yuav ntaus koj ! Koj zaum ntawm kod, yog yuav txiav txim rau kuv raws li txoj cai no uas, koj thuam txoj cai, koj thiaj kom luag ntaus kuv !"

4 Cov neeg nyob ntawd hais tias :

"Koj tseem cem Tswv Ntuj tus thawj leej choj thiab lod ?"

5 Paj Lug teb tias :

"Kwv tij, kuv tsis tau paub tias nws yog tus thawj leej choj. Ntawv hais li no : "Koj yuav tsis txhob tsawm tus thawj coj koj haiv neeg."

6 Paj Lug paub tias cov neeg nyob ntawd

muaj ib tog yog tog Xas Dus Kais, hos ib tog yog tog Fas Lis Xais. Ces nws tsa suab hais tias :
 "Kwv tij, kuv yog ib tug Fas Lis Xais. Kuv niam kuv txiv kuj yog Fas Lis Xais. Tos muaj neeg xav txiav txim rau kuv los, yog vim peb muaj txoj kev cia siab tias cov neeg tuag yuav ciaj rov qab los."
 7 Paj Lug tseem hais li no suab tsis tau tu, cov Fas Lis Xais thiab cov Xas Dus Kais twb pib sib ceg lawm, ces sawv daws faib kiag ua ob tog. 8 Cov Xas Dus Kais hais tias tsis muaj kev sawv rov los, tsis muaj Ntuj cov Tshiab, thiab tsis muaj dab li. Hos cov Fas Lis Xais ntseeg tias neeg yuav sawv rov los, muaj Ntuj cov Tshiab, thiab muaj dab. 9 Sawv daws thiaj sib cav ntsuag qees. Muaj ob peb tug kws ntawv, uas yog tog Fas Lis Xais sawv, lawv siv zog hais nrov tias :
 "Peb tsis pom tus neeg ntawd ua ib qho txhaum dab tsi. Tsam ho yog ib leeg tim tswv ntshiaq qhia nws, los ho yog Ntuj ib tug Tshiab qhia nws ne ?"
 10 Lawv pheej sib cav heev zuj zus tuaj. Tus xab txheeb ntshai tsam lawv muab Paj Lug tua, nws thiaj kom pab tub rog nqes mus chua Paj Lug ntawm lawv tes, coj nws rov los nyob hauv lub yeej.
 11 Hmo ntawd, Huab Tais tuaj xyuas Paj Lug, Huab Tais hais rau nws tias :
 "Koj ua siab loj mog. Koj tseem yuav ua tim khawv txog kuv nyob Los Mas ib yam nkaus li koj tau ua tim khawv nyob Yes Lus Xas Les."

Cov Yus Das tuav xam yuav tua Paj Lug. 23 : 12 - 22.

12 Thaum kaj ntug, cov Yus Das sab laj. Lawv cog lus rau Ntuj tias lawv yuav tsis noj mov tsis haus dej, yog lawv tsis tau muab Paj Lug tua tso. Hos yog lawv xub noj los xub haus tsis tau muab Paj Lug tua, mas kom Ntuj nplua lawv. 13 Muaj plaub caug tawm leej tau cog lus li ntawd. 14 Lawv mus cuag cov leej choj thiab cov txwj laus, lawv hais tias : "Peb tau cog lus tias peb yuav tsis noj dab tsi li yog peb tsis tau muab Paj Lug tua. 15 Ua li mas nyem no, nej yuav nrog cov Xas Nes Nrees sib haum tso, nej mus ntxias tus xab txheeb kom nws coj Paj Lug tuaj rau nej. Nej yuav ua xws li nej xav paub meej dua txog tus neeg ntawd. Hos peb, mas peb sawb sim txhij tos tua nws thaum nws tuaj tsis tau txog."
 16 Tiam sis Paj Lug tus muam muaj ib tug tub paub txog qhov lawv npaj tos kev tua. Nws thiaj mus pem lub yeej, nws qhia Paj Lug. 17 Paj Lug thiaj hu ib tug lwm txheeb thiab hais rau nws tias :
 "Koj coj tus tub hluas no mus cuag tus xab txheeb, nws muaj lus yuav hais rau tus xab txheeb."
 18 Ces tus lwm txheeb coj tus tub hluas mus rau tus xab txheeb, nws hais tias : "Tus neeg raug txim hu ua Paj Lug thov kom kuv xa tus hluas no tuaj rau koj, nws muaj lus yuav hais rau koj." 19 Tus xab txheeb tuav tus hluas tes, coj nws mus nyob ib qho xu kev, ces nws nug tias : "Koj muaj dab tsi hais rau kuv ?" 20 Tus tub hluas teb tias : "Cov Yus Das tau sab laj tias lawv yuav tuaj thov kom tag kis koj tso Paj Lug mus tom lawv lub tsev txiav txim. Lawv yuav dag tias lawv xav tshuaj lus ntxiv txog nws. 21 Tab sis koj tsis txhob ntseeg. Vim lawv muaj plaub caug tawm leej tau cog lus tias lawv yuav tsis noj mov tsis haus dej li yog lawv tsis xub tau muab Paj Lug tua tso. Nyem no, lawv twb npaj txhij tas lawm, tshuav qhov tos kom koj tso Paj Lug mus xwb."
 22 Tus xab txheeb tso tus hluas mus, nws hais rau tus hluas tias :

"Koj tsis txhob tham qhia leej twg tias koj tau hais tej no rau kuv."

Tus xab txheeb xa Paj Lug mus rau Xes Ntxas Les. 23 : 23 - 35.

23 Ces tus xab txheeb hu ob tug lwm txheeb los, nws hais rau nkawd tias : "Neb npaj ob puas tus tub rog, xya caum tus caij nees, thiab ob puas tus tub txib. Thaum ib tag hmo nej sawv kev mus Xes Ntxas Les. 24 Nej nog nees rau Paj Lug caij thiab. Nej yuav txuag Paj Lug kom tsis txhob raug xwv txheej dab tsi mus txog tus Vaj Txheeb Fes Lis. 25 Tus xab txheeb sau ib tsab ntawv muaj ntsiab li no : 26 "Kaus Dis Yus Lis Xias xa nws cov cov lus foom kev kaj lug tuaj rau Vaj Txheeb Fes Lis. 27 Tus neeg no yog cov Yus Das ntes nws. Lawv twb yuav muab nws tua txog tes. Kuv hnov tias nws yog ib tug pej xeem Los Mas, kuv thiaj coj ib co tub rog tuaj chua nws ntawm lawv tes los. 28 Kuv xav paub tseeb tias lawv liam dab tsi rau nws, ces kuv coj nws mus rau lawv lub Rooj Txwj Laus Xas Nes Nrees. 29 Kuv thiaj pom tias lawv liam txog tej yam sawv daws sib cav nyob hauv lawv txoj cai xwb, tsis muaj ib yam dab tsi hnyav yuav txaus muab tus neeg no tua los muab saw hlau khi nws. 30 Muaj neeg tuaj qhia kuv tias cov Yus Das npaj tua tus neeg no, mas kuv thiaj xa nws tuaj rau koj tam sim ntawd. Thiab kuv ceeb toom rau cov neeg liam rau nws tias yog lawv muaj lus dab tsi mas kom lawv tuaj cuag koj." 31 Thaum tsaus ntuj, cov tub rog ua raws li tus xab txheeb txib : lawv mus coj Paj Lug los, ces lawv xa nws mus txog Aas Tis Pas This. 32 Tag kis, cov tub rog caij nees nrog Paj Lug mus ntxiv, cov mus ko taw rov qab los tom lub yeej. 33 Lawv

tuaj txog Xes Ntxas Les, cov tub rog cev tsab ntawv rau tus Vaj Txheeb thiab muab Paj Lug cob rau nws. 34 Tus Vaj Txheeb nyeem tsab ntawv tas, nws nug tias Paj Lug nyob lub xeev twg tuaj. Thaum nws paub tias Paj Lug nyob Xis Lis Xias teb tuaj, mas tus Vaj Txheeb thiaj hais rau Paj Lug tias :

35 "Thaum cov neeg nrhiav plaub rau koj tuaj txog, mas kuv mam li mloog koj hais."

Ces nws tso Paj Lug rau lawv zov nyob hauv Hes Los chav tsev txiav txim.

Cov Yus Das tuaj ua txoj nug txog Paj Lug nyob Xes Ntxas Les.

24 : 1 - 9.

24 1 Tsib hnub tom qab, tus thawj leej choj As Nas Nias nrog ob peb tug txwj laus thiab ib tug kws hais plaub, hu ua Tes Tus Lus nqes tuaj txog. Lawv tuaj kom Paj Lug rau tus Vaj Txheeb.

2 Lawv hu Paj Lug tuaj txog, ces Tes Tus Lus pib cev lus li no : 'Vaj Txheeb Fes Lis, peb tau nyob thaj yeeb lug los yog vim koj saib peb. 3 Tej Txhooy tshiab uas koj tsa kom peb haiv neeg tau mus raws txoj kev vam meej mas peb zoo siab txais tas huv tib si. Peb ua koj tsaug tsis txawj tag. 4 Peb tsis xav txob koj ntev, tab sis peb vam txog koj lub siab zoo, peb thov koj mloog peb me ntsis. 5 Tus neeg ntawd phem kawg, peb pom nws mus tsim kev kub ntxhov nyob tas ntiaj teb rau hauv cov Yus Das. Nws yog ib tug thawj coj hauv pab neeg tuaj tog Nas Xas Les. 6 Nws xav thuam thiab ua kom lub Tuam Tsev Teev Ntuj tsis ntshiab ntxiv, mas peb thiaj ntes nws. Peb xav txiav txim rau nws raws li peb Txoj Cai. 7 Tab sis tus xab txheeb Lis Xias tuaj pab nws lawm. Thaum nws chua kiag tus niag

ntawd ntawm peb tes mus, mas nws ua tawv kawg. 8 Ces Lis Xias ceeb toom rau cov neeg xav kom tus ntawd tias lawv yuav tsum tuaj cuag koj. Yog koj xav paub meej tias puas muaj raws li peb hais no tiag, mas koj nug tus xab txheeb , nws yuav qhia koj." 9 Cov Yus Das txheem Tes Tus Lus cov lus tias muaj tseeb tiag.

Paj Lug piav nws zaj rau Vaj Txheeb Fes Lis mloog. 24 : 10 - 21.

10 Ces tus vaj txheeb kom Paj Lug hais lus. Paj Lug thiaj teb hais tias : "Kuv paub tias koj yog tus coj plaub coj ntug rau lub teb chaws no tau ntau xyoo los lawm, mas kuv tso siab lug piav lub ntsiab rau koj. 11 Koj xav paub meej saib puas muaj tiag li hais : kuv nce tuaj teev ntuj pem Yes Lus Xas Les tau kaum ob hnub xwb. 12 Tsis tau muaj neeg pom kuv nrog ib tug sib cav, los tab tom ntxias tsoom sid hauv lub Tuam Tsev Teev Ntuj, los hauv cov tsev txoos, los hauv ib lub tsheej twg li. 13 Lawv yeej nrhiav tsis tau ib qho ua pov thawj tias kuv tau ua tej yam uas lawv liam rau kuv nyem no.

14 Hos kuv lees rau koj li no : kuv teev kuv cov yawg koob tus Tswv Ntuj raws li Txoj Kev uas lawv hu ua 'ib tog'. Tab sis kuv kuj tseem ntseeg txhua yam nyob hauv Txoj Cai, kuv ntseeg cov lus sau nyob hauv cov Yaj Saub tej ntawv.

15 Kuv tso siab rau Tswv Ntuj, xws li cov Fas Lis Xais no, uas lawv kuj tso siab tias cov neeg siab ncaj thiab cov neeg siab nkhaus yuav sawv rov los. 16 Yog vim li ntawd, mas kuv thiaj niaj hnub muab siab rau tas zog kom kuv lub siab txhob muaj qhov xyeej nyob ntawm Tswv Ntuj xub ntiag thiab ntawm neeg xub ntiag.

17 Kuv mus tau ntev xyoo lawm, kuv

nqa nyiaj los pab kuv haiv neeg, thiab kuv rov los txi Ntuj. 18 Lawv thiaj li ntsib kuv nyob hauv lub Tuam Tsev Teev Ntuj, thaum kuv mus ua cov kab ke ntxuav huv, kuv tsis tau txhib tej pab neeg tuaj sib txoos ua ke, thiab tsis tau tsim muaj kev kub ntxhov. 19 Tsuas muaj ob peb tug Yus Das nyob As Xias teb, phim yog lawv yuav tuaj kom kuv rau koj, saib lawv puas muaj lus tsis zoo siab rau kuv. 20 Tab sis cov tuaj nyob ntawm no, kom lawv hais saib, thaum kuv mus sawv ntawm cov txwj laus Xas Nes Nrees xub ntiag, mas lawv pom kuv tau ua dab tsi phem. 21 Ntshai yog lo lus uas kuv qw rau lawv tias : Yog tim cov neeg tuag txoj kev sawv rov los, mas hnub no kuv thiaj raug txiav txim nyob ntawm nej xub ntiag."

Paj Lug nyob hauv tsev loj faj ob xyoos hauv Xes Ntxas Les.

24 : 22 - 27.

22 Fes Lis paub zoo txog Txoj Kev, ces nws kom lawv rov qab mus, nws hais tias :

"Thaum twg tus xab txheeb Lis Xias tuaj txog mas kuv mam li tu nej rooj plaub."

23 Nws kom tus lwm txheeb kaw Paj Lug rau hauv tsev loj faj, tab sis nws yuav tsis txhob ua nrui dhau rau Paj Lug, thiab yuav cia Paj Lug cov phooj ywg tuaj pab nws.

24 Ob peb hnub tom qab, Fes Lis nrog nws poj niam hu ua Nrws Xis Las tuaj txog. Nrws Xis Las yog ib tug poj niam Yus Das. Fes Lis kom lawv hu Paj Lug tuaj, nws mloog Paj Lug piav txog txoj kev ntseeg txog Yes Xus Pleev. 25 Tab sis thaum Paj Lug piav txog txoj kev ncaj, kev yoo noj yoo haus, kev txiav txim yav pem suab, mas Fes Lis ntshai, ces nws

hais tias : "Zaum no, hais li no xwb. Koj mus kuj tau. Lwm zaus kuv mam rov hu koj tuaj dua."

26 Tus vaj txheeb xav tias Paj Lug yuav muab nyiaj xiab nws, mas nws thiaj hu Paj Lug tuaj nrog nws tham ntau zaus hauj sim. 27 Paj Lug nyob txim li ntawd ob xyoos. Ces Poos Xyus Fes Tus tuaj hloov Fes Lis. Fes Lis xav kom cov Yus Das zoo siab, ces nws cia Paj Lug nyob hauv tsev loj faj ntxiv.

**Paj Lug xav mus cuag Xes Ntxas.
25 : 1 - 12.**

25 1 Fes Tus tuaj nyob hauv lub xeev tau peb hnub, ces nws sawv kev ntawm Xes Ntxas Les mus rau pem Yes Lus Xas Les. 2 Cov thawj leej choj thiab cov txwj laus Yus Das tuaj ua txoj nug txog Paj Lug rau Fes Tus.

3 Lawv tuaj kom Paj Lug , mas lawv thov xws li lawv xav pab Paj Lug : lawv thov kom muab Paj Lug xa mus pem Yes Lus Xas Les. Lawv npaj tos kev tua Paj Lug tom ib tog kev. 4 Tiam sis Fes Tus teb rau lawv tias Paj Lug yuav tsum nyob hauv tsev loj faj nyob Xes Ntxas Les, hos Fes Tus los kuj maj maj mus tam sim ntawd. Nws hais tias :

5 "Nyob hauv nej cov no, tus twg muaj cai cev lus, mas kom nws nrog kuv mus, yog tus neeg no tau ua txhaum dab tsi, mas cov nrog kuv mus yuav ua cov kom nws."

6 Tus vaj txheeb nyob yim hnub mus rau kaum hnub hauv Yes Lus Xas Les, ces nws nqes rov los rau nram Xes Ntxas Les. Tag kis tom qab, nws mus hauv lub tsev txiav txim, nws kom lawv coj Paj Lug los. 7 Thaum Paj Lug tuaj txog, cov Yus Das uas tuaj Yes Lus Xas Les tuaj mus vij Paj Lug, lawv liam ntau yam hnyav kawg rau

Paj Lug, tab sis lawv nrhiav tsis tau dab tsi ua pov thawj. 8 Paj Lug teb rau lawv tias :

"Kuv tsis tau ua dab tsi txhaum cov Yus Das Txoj Cai, txhaum lub Tuam Tsev Teev Ntuj, los txhaum Xes Ntxas."

9 Fes Tus xav ua kom cov Yus Das zoo siab, nws thiaj teb rau Paj Lug tias :

"Koj puas xav mus pem Yes Lus Xas Les, kom lawv txiav txim rau koj nyob ped, nyob ntawm kuv xub ntiag."

10 Paj Lug teb hais tias : "Kuv nyob hauv Xes Ntxas lub tsev txiav txim, mas yuav tsum txiav txim rau kuv hauv lub tsev no. Kuv tsis tau ua dab tsi txhaum cov Yus Das, koj yeej paub meej lawm.

11 Yog kuv muaj txim, yog kuv yeej tau ua tej qhov txhaum uas tsim nyog lub txim tuag, mas kuv tuaj yeem tuag. Tiam sis yog cov neeg ntawd lam liam rau kuv xwb, lawv cov lus tsis muaj chaw txawb chaw rau, mas tsis muaj leej twg muaj cai tso kuv pov tseg rau hauv lawv txhais tes. Kuv hu txog Xes Ntxas txiav txim rau kuv." 12 Fes Tus nrog nws cov tim xyoob sab laj tas, ces nws hais tias :

"Koj hu txog Xes Ntxas, mas cia koj mus cuag Xes Ntxas."

Fes Tus piav txog Paj Lug rau tus vaj As Nkis Pas. 25 : 13 - 27.

13 Ob peb hnub tom qab, tus vaj As Nkis Pas thiab Npes Les Nis nkawd tuaj txog Xes Ntxas Les, nkawd mus xyuas Fes Tus. 14 Vim tias nkawd yuav nyob ntev hnub, ces Fes Tus thiaj piav txog Paj Lug rau tus vaj. Nws hais tias :

"Nyob ntawm no, muaj ib tug neeg nyob txim uas Fes Lis cia nws kaw rau hauv tsev loj faj.

15 Thaum kuv mus Yes Lus Xas Les, cov leej choj thiab cov txwj laus Yus Das tuaj liam nws rau kuv, lawv kom kuv

muab txim rau nws. 16 Kuv teb lawv tias cov Los Mas tsis muaj kev caiyuav cia li muab tus neeg uas raug luag liam tso rau luag tes. Lawv yuav tsum xub hu cov neeg kom nws tuaj nrog tus raug liam ntawd tim ntsej tim muag hais tso, thiab yuav cia tus raug liam tau kev hais lus daws lub txim uas luag liam rau nws. 17 Ua li mas cov Yus Das thiaj nrog kuv tuaj ntawm no, tsis ncua sij hawm li. Tag kis tom qab, kuv mus zaum hauv lub tsev txiav txim, kuv kom lawv coj tus neeg tom nkuaj los. 18 Cov neeg tuaj liam txav los liam. Lawv liam tsis tau ib qho loj, raws qhov kuv xav. 19 Lawv kawg nrog nws muaj lus sib cav, xyov, hais txog lawv txoj kev cai teev ntuj, thiab hais txog ib tug Yes Xus uas tuag lawm, tab sis Paj Lug hais tias nws tseem muaj txoj sia nyob. 20 Kuv tsis pom qab ua dab tsi rau ib zag sib cav li ntawd, kuv thiaj nug Paj Lug saib nws puas yeem mus pem Yes Lus Xas Les, cia mam txiav txim txog tej ntawd rau nws nyob ped. 21 Tiam sis Paj Lug tau thov kom cia tus Tuam Vaj txiav txim rau nws xwb. Kuv thiaj li cia Paj Lug nyob twj ywm ntawm no mus txog hnub kuv xa nws mus rau Xes Ntxas."

22 Ces As Nkis Pas hais rau Fes Tus tias :
"Kuv kuj xav hnov tus neeg ntawd hais thiab."

Fes Tus teb hais tias :
"Tag kis mas koj yuav hnov nws hais."

23 Tag kis tom qab, As Nkis Pas thiab Npes Les Nis nkawd tuaj muaj hwj chim ntxiag, mus hauv lub tsev hais plaub. Cov xab txheeb thiab cov nom muaj meej mom hauv lub nroog kuj nrog nkawd tuaj.

Fes Tus kom lawv coj Paj Lug los.

24 Fes Tus hais tias :
"Vaj As Nkis Pas, thiab tas nej sawv daws uas tuaj nrog peb nyob ntawm no, nej ntsia tus neeg no, yog tus uas tas tsoom Yus Das, tsis hais cov nyob Yes Lus Xas Les los cov nyob ntawm no, sawv daws tuaj liam, tuaj qw nrov zej nrov zos tias kom txhob cia nws ua neeg ntxiv lawm. 25 Ntawm kuv, mas kuv pom tias nws tsis tau ua dab tsi txaus muab nws tua. Tiam sis nws tau hu txog tus Tuam Vaj, mas kuv yuav xa nws mus rau tus Tuam Vaj. 26 Kuv nrhiav tsis tau ib qho meej los sau txog tus ntawd mus rau huab tais. Vim li ntawd kuv thiaj hu nws tuaj rau ntawm nej xub ntiag, thiab rau koj, Vaj As Nkis Pas, kom nej nug nws, kuv thiaj yuav muaj lo puav lus sau. 27 Yog xa ib tug neeg nyob txim tsis muaj ib co lus liam rau nws ris, mas kuv ntsia zoo li tus xa ntawd vwm xwb.

Paj Lug piav nws zaj lus rau As Nkis Pas. 26 : 1 - 23.

26 1 As Nkis Pas hais rau Paj Lug tias :
"Peb tso cai rau koj hais daws tej lus uas luag kom koj."
Ces Paj Lug tsa tes, nws hais li no :
2 "Vaj As Nkis Pas, hnub no kuv saib tias kuv txoj hmoov zoo, kuv thiaj tau kev hais lus nyob ntawm koj xub ntiag, hais txog tej lus uas cov Yus Das liam rau kuv.
3 Vim tias koj paub zoo txog cov kev cai Yus Das tas huv tib si, thiab paub lawv cov lus sib cav. Vim li no kuv thov koj ua siab ntev mloog kuv. 4 Kuv lub neej, txij thaum hluas los, kuv tau ua li cas nyob hauv kuv haiv neeg, thiab nyob Yes Lus Xas Les, cov Yus Das puav leej paub tas huv tib si. 5 Lawv yeej paub kuv tau ntev los lawm. Yog lawv xav hais mas lawv ua tau tim khawv tias kuv yog tog uas coj txoj cai nrui tshaj nyob hauv peb

txoj kev teev ntuj, tog ntawd yog cov Fas Lis Xais. 6 Nyem no, tos kuv raug txiav txim los yog vim kuv tso siab rau Tswv Ntuj lo lus uas nws cog rau peb cov yawg koob. 7 Peb kaum ob lub xeem ua siab kub lug tsob hwb Tswv Ntuj nruab hnub hmo ntuj, vam vam cia siab lug tos lo lus ntawd tshwm sim. Vaj, yog vim kuv vam thiab cia siab li no, mas cov Yus Das thiaj liam rau kuv.

8 Tim qhov twg nej thiaj ntseeg tsis tau tias Tswv Ntuj tsa cov neeg tuag sawv rov los ?

9 Yav thaud, kuv xav tias kuv yuav siv txhua txoj kev tawm tsam tiv Yes Xus Nas Xas Les lub npe. 10 Ces kuv yeej tau ua li ntawd nyob Yes Lus Xas Les. Kuv tau muab coob leej ntshiab ntes mus kaw hauv tsev loj faj. Cov leej choj tso lus rau kuv ua tej ntawd. Thaum luag muab lawv tua mas kuv yeej nrog pom zoo. 11 Ntau zaus, kuv mus txhua cov tsev txaos, kuv yuam kom lawv thuam Ntuj. Thaum kuv npau taws heev, kuv haj tseem caum lawv mus txog hauv cov pej kum nroog thiab.

12 Muaj ib hnub, kuv mus Das Mas muaj cai ntxiag, vim yog cov leej choj xa kuv mus. 13 Thaum ntawd kwv yees tav su, kuv tseem txog tom ib tog kev, ces kuv pom ib qho pom kev ci dua lub hnub, nqes saum ntuj los. Qhov pom kev ntawd ci ntsa iab tuaj ncig kuv thiab ncig cov nrog kuv taug kev. 14 Peb sawv daws ntog hauv av tas tib si. Kuv hnov ib lub suab ua lus Hes Nplaws hais rau kuv tias : 'Xauv, Xauv, vim li cas koj hiam kuv ? Koj yuav maim rab ntsis hmuv mas nyuaj kawg.'

15 Kuv teb tias : 'Huab Tais, koj yog leej twg ?' Huab Tais hais tias : 'Kuv yog Yes Xus uas koj hiam. 16 Koj sawv, koj

sawv ntsug nres saum koj ob txhais taw. Kuv tawm los rau koj pom vim kuv tsa koj ua tub txib, thiab ua tim khawv txog qhov koj nyuam qhuav tau pom kuv, thiab koj tseem yuav tau pom kuv ntau zaus ntxiv. 17 Kuv yuav pab koj kom dim ntawm tsoom pej xeem thiab ntawm tsoom neeg teev dab uas kuv xa koj mus. 18 Kuv xa koj mus kom koj qhib lawv qhov muag, kom lawv tso Xas Tas lub hwj huam tseg, tig los txais txoj kev pom kev ; kom lawv tso Xswv Ntuj lub hwj huam ; kom lawv ntseeg txog kuv, ces lawv yuav tau txais txoj kev zam txhaum, thiab yuav tau nrog cov ntshiab txais kuv lub cuab tam.' 19 Vaj As Nkis Pas, txij thaum ntawd los, kuv tsis tau tawv ncauj rau tus kuv pom nqes saum ntuj los li. 20 Kuv cia li pib ntuas sawv daws, xub pib nyob hauv Das Mas, mus rau Yes Lus Xas Les, rau txhua qhov chaw hauv lub teb chaws Yus Das, ces thiaj li mus txog cov pej kum neeg. Kuv tshaj rau sawv daws kom nyias tu siab rau nyias cov txhaum, kom sawv daws tig los rau Tswv Ntuj, thiab coj ib tug cwj pwm phim tus neeg hloov siab. 21 Yog tim tej no mas cov Yus Das thiaj ntes kuv hauv lub Tuam Tsev Teev Ntuj, lawv yeej npaj muab kuv tua ntag. 22 Tiam sis Tswv Ntuj pab kuv los txog niaj hnub no, kuv thiaj tseem sawv ntsug, ua tim khawv rau tus hlob tus yau, yeej tsis hais txog lwm yam li, tsuas hais txog tej lus uas cov yaj saub thiab Mais Xes lawv tau hais tseg tias yuav tshwm sim tuaj. 23 Tej lus thaud yeej qhia tias Leej Pleev yuav raug luag hiam, nws yuav yog thawj tug sawv hauv cov tub tuag rov los. Ces nws yuav qhia txoj kev pom kev rau tsoom pej xeem thiab rau cov neeg teev dab.

**Fes Tus thiab As Nkis Pas nkawd
tsis pom Paj Lug muaj txhaum.
26 : 24 - 32.**

24 Thaum Paj Lug piav txog nws li no,
ces Fes Tus hais nrov tias :

"Paj Lug, koj vwm lawm lauj ! Koj paub
txuj ntau dhau, koj hlwb tsis zoo lawm."

25 Ces Paj Lug teb hais tias :

"Fes Tus, tus nto moo zoo, kuv tsis vwm.
Kuv tsuas hais ib co lus tseeb, muaj chaw
txawb chaw rau xwb. 26 Tus vaj yeej
paub txog tej no tas huv tib si. Vim li
ntawd kuv thiaj tso siab lug piav rau nws
mloog, kuv paub tias tej no yeej tsis plam
ntawm nws qhov muag ib qho li, vim tej
xwm no tsis yog tau tshwm sim nyob tom
ib nyuag ces kaum xwb. 27 Vaj As Nkis
Pas, koj puas ntseeg cov yaj saub ? Kuv
paub tias koj yeej ntseeg. 28 As Nkis
Pas teb Paj Lug tias :

"Koj xav haub kuv kom kuv los ua ib tug
Pleev sai sai !"

29 Paj Lug hais tias :

"Txawm yuav sai, yuav qeeb los xij, kuv
thov Tswv Ntuj kom koj, thiab tas cov
neeg uas mloog kuv hais hnub no, hloov
los ua ib co neeg xws li kuv. Tsuas kom
nej tsis txhob raug saw hlau khi xws li
kuv xwb."

30 Paj Lug hais li no tas, ces tus vaj sawv
tsees. Tus vaj txheeb, Npes Les Nis, thiab
cov uas nrog lawv zaum ua ke ntawd kuj
sawv zom zaws. 31 Thaum lawv pib rov
mus, mas lawv sib tham hais tias :

"Tus neeg ntawd tsis tau ua dab tsi tsim
nyog muab nws tua los muab nws khi li
ntawd."

32 As Nkis Pas hais rau Fes Tus tias :

"Yog tus neeg ntawd tsis txhob hu
txog Xes Ntxas no, peb tso nws kuj
tau."

**Paj Lug sawv kev mus Los Mas.
27 : 1 - 8.**

27 1 Thaum lawv txiav tias peb
yuav caij nkoy mus Is Tas Lias
teb, mas lawv xa Paj Lug thiab ob peb tug
neeg nyob txim mus rau ib tug lwm
txheeb hu ua Yus Lis Yus, uas nyob hauv
pab peeb zeej Aus Nkus Tas. 2 Peb caij
ib lub nkoy tuaj ntawm As Nras Mis tuaj.
Lub nkoy ntawd yuav mus taug As Xias
ntug teb. Peb thiaj caij nkoy mus saum
hiav txwv. Muaj ib tug Mas Xes Dos
Nias nyob Tes Xas Los Nis nrog peb ua
ke, nws lub npe hu ua As Lis Tas Kws.

3 Hnub tom qab, peb mus txog Xis Doos.
Yus Lis Yus ua zoo rau Paj Lug. Nws
kheev Paj Lug mus xyuas Paj Lug cov
phooj ywg, thiab kheev lawv pab ub pab
no rau Paj Lug. 4 Peb nce nkoy ntawm
no, ces peb mus saum dej ntuj, mas peb
taug ntug pov txwv Kws Plos, vim cua
tuaj tom hauv ntej tuaj. 5 Peb hla dhau
dej ntuj Xis Lis Xias thiab dej ntuj Pas Fis
Lias, ces peb nqes nkoy hauv Mws Los,
nyob Lis Xias teb. 6 Txog ntawd, tus
lwm txheeb nrhiau tau ib lub nkoy tuaj As
Les Xas Nrias tuaj, yuav mus Is Tas Lias
teb ; nws kom peb caij lub nkoy ntawd.

7 Lub nkoy mus qeeb qeeb tau ntev hnub,
mus nyuaj hauj sim, peb thiaj mam li mus
ncaj rau Kaws Nis Dos. Cua tsis zoo, ces
peb yuav tsum nquam lub nkoy raws ntug
pov txwv Khes Tas ze tus kaus av Xas
Mos Nes. 8 Peb hla tus ntug kaus av
ntawd nyuaj heev, peb thiaj mus txog ib
qho chaw hu ua Ceeb Zoo Nres Nkoj, uas
nyob ze lub nroog Las Xas Yas.

**Cua hlob, lub nkoy tog hauv dej.
27 : 9 - 44.**

- 9 Peb tuaj tau ntev hnub lawm. Zaum no mas kev mus saum nkoy haj Yam muaj xwv txheej , vim tias lub hnub nyooog yoo mov dhau lawm. Paj Lug thiaj sab laj rau lawv tias :
- 10 "Cov npawg, tam li kuv pom mas, yog peb caij nkoy mus ntxiv, ntshai peb yuav sav tsam, thiab yuav ntsib xwv txheej. Tsam tej toob xib puaj yam thiab lub nkoy puas, hos peb txoj sia los kuj yuav raug xwv txheej thiab."
- 11 Tiam sis tus lwm txheeb tsis mloog Paj Lug hais, nws tso siab rau tus tsav nkoy thiab tus thawj los pav. 12 Qhov chaw nres nkoy ntawd kuj tsis zoo nyob rau lub caij ntuj no thiab. Ces feem coob pom zoo cia caij nkoy mus ntxiv kom txog Fes Nis, saib puas yuav tau, lawv mam li nyob Fes Nis tos kom ntuj no dhau. Fes Nis yog ib lub tsheej nres nkoy, uas tig rau Naj Fab hnub poob thiab Pej Fab hnub poob.
- 13 Muaj ib hnub, cua tuaj ntxuj ntxiag sab Naj tuaj, ces lawv xav tias yuav ua tau raws li lawv hais. Lawv rub tus nqe lauj nkoy, lawv mus raws ntug pov txwv Khes Tas. 14 Tiam sis ib pliag ntshis xwb, ib nthwv cua hlob hlob hu ua cua pej fab, tshuab tim ntug pov txwv tuaj nplawm lub nkoy. 15 Cua tuaj nplawm lub nkoy, ces taub hau nkoy yeej tiv tsis taus cua li, peb cia cua pus peb lub nkoy. 16 Thaum peb mus ncaj ib lub pov txwv me me hu ua Kaus Das, peb mam li tsav tau lub nkoy me ntsis. 17 Peb rub lub nkoy los rau saum av, peb muab ib co saw hlau los pav lub nkoy, peb mam mus ntxiv. Peb tso tus nqe lauj ntab hauv dej, vim ntshai tsam lub nkoy mus khuam nyob ntawm lub tshav suab puam Xis Tos. Peb cia cua pus lub nkoy mus. 18 Cua daj cua dub ntsawj heev kawg, ces hnub tom qab lawv thau ib co toob xib pov tseg. 19 Hnub peb, cov tsav nkoy muab cov ncej dai ntaub daws pov tseg. 20 Tau ntau hnub los lawm, peb yeej tsis pom lub hnub los ib lub hnub qub ci qhov twg li. Tsuas yog cua daj cua dub ntsawj tsis ntaug hlo li xwb, mas peb yeej tsis vam tias peb yuav dim peb txoj sia li lawm.
- 21 Sawv daws kuj tsis noj dab tsi tau ntau hnub lawm thiab, ces Paj Lug thiaj sawv ntsug hais rau sawv daws tias : "Cov npawg, khuv xim, nej tsis tau mloog kuv. Ua cas los peb yuav tsum nyob Khes Tas tos, yog nej mloog mas peb tsis tau raug xwv txheej zoo li no.
- 22 Txawm tias ua tau li no lawm los xij. Kuv hais rau nej tias nej yuav tsum ua siab loj siab tawv mog ! Nej yuav tsis muaj ib tug ploj, tsuas yog lub nkoy thiaj yuav puas xwb. 23 Nag hmo, kuv tau pom Ntuj ib tug Tshiab, yog tus Tswv Ntuj uas kuv teev tus Tshiab. Nws hais rau kuv tias : 24 'Paj Lug, koj tsis txhob txhawj. Koj yuav tsum mus sawv ntawm Xes Ntxas xub ntiag. Tswv Ntuj pub kom pab neeg nrog koj caij nkoy tsis muaj ib tug puas xwm.' 25 Cov npawg, ua li mas peb ua siab loj mog ! Kuv tso siab rau Tswv Ntuj. Yuav muaj tuaj raws li nws hais rau kuv. 26 Hos peb lub nkoy mas, yuav mus khuam ntawm ib lub pov txwv."
- 27 Cua ntsawj tau kaum plaub hmos. Hmo kaum plaub, peb ntab saum lub hiav txwv As Nrias Yas Tiv. Thaum ib tag hmo, cov tsav nkoy mem tau tias lawv mus txog ze av lawm. 28 Lawv tso tus ntsuas dej nqes mus ntsuas, dej tseem tob li nees nkaum daj. Mus deb me ntsis ntxiv, lawv rov ntsuas dej dua, dej tob li kaum tsib dag. 29 Lawv ntshai tsam lub nkoy mus tsoo pob zeb, ces lawv dauv plaub tug nqe lauj tom hauv nkoy nqes mus. Sawv daws ceeb laj tos txog kaj

ntug. 30 Tiam sis cov tub tsav nkoy xav khiau tso lub nkoy pov tseg. Lawv tso lub nkoy me nqes mus hauv dej, lawv dag tias lawv xav mus rub cov nqe lauj tom hauv nkoy. 31 Paj Lug hais rau tus lwm txheeb thiab cov tub rog tias :

"Yog cov neeg ntawd tsis nyob hauv nkoy lawm, mas nej yuav tsis dim txoj sia."

32 Ces Tam sim ntawd cov tub rog txiav cov hlua khi lub nkoy me kom poob lawm hauv dej.

33 Thaum sawv daws tos kom kaj ntug, mas Paj Lug txhob kom sawv daws noj mov. Nws hais tias :

"Nej nyob li no, yoo tshaib tau kaum plaub hnub lawm, tsis noj dab tsi. 34 Kuv hais rau nej tias nyem no nej yuav tsum noj mov, nej thiaj yuav muaj zog pab nej dim. Vim tias nej yuav tsis muaj ib tug poob ib txoj plaub hau li." 35 Paj Lug hais li no tas, nws muab mov los tuav, nws ua Tswv Ntuj tsaug nyob ntawm sawv daws xub ntiag, ces nws muab mov ntais los noj. 36 Sawv daws rov tso siab, ces lawv kuj noj mov thiab. 37 Nyob hauv lub nkoy, peb muaj ob puas xya caum rau leej. 38 Thaum sawv daws noj tsau tas, mas lawv muab cov nplej pov tseg hauv dej ntuj kom lub nkoy sib me ntsis.

39 Thaum kaj ntug, cov tsav nkoy tsis paub tias lawv tuaj txog thaj av twg li, lawv tsuas pom zem zuag ib thaj av suab puam nyob ntawm ntug dej xwb. Lawv xav sim saib puas yuav tsav tau lub nkoy mus txog tim lub ntug dej ntawd.

40 Lawv daws cov nqe lauj, lawv tso cov nqe lauj pov tseg rau hauv dej ntuj. Lawv kuj daws cov hlua khi cov duav nquam nkoy. Lawv tsa daim ntaub pem hauv nkoy, ces lawv cia cua pus lub nkoy mus lawm tim ntug dej. 41 Tab sis lub nkoy mus tsso ib lub pob zeb loj hauv qab thu

dej : lub hau nkoy mus khuam rau ntawd lawm, ua tsis taus zog, dej npbau tej niag twv loj tuaj ntsawj tog tw nkoy, lub nkoy ua qob qis thiab tawg tas.

42 Ces cov tub rog xav muab cov neeg nyob txim tua, tsam muaj tej tus lam ua luam dej khaiv. 43 Tiam sis tus lwm txheeb xav txuag Paj Lug, ces nws tsis kheev lawv tua cov neeg nyob txim. Nws txhib tias saib leej twg txawj ua luam dej, mas kom lawv kav tsij xub dhia lawm hauv dej, ua luam dej lawm tim ntug nqhuab. 44 Hos lwm cov mas yuav tuav txiag, los tuav tej yav ntoo tawg ntawm lub nkoy los, maj mam ntab mus rau tim ntug nqhuab. Sawv daws ua li ntawd, ces tas sawv daws thiaj mus txog av tsis muaj ib tug ploj.

**Paj Lug nyob Mes Lis Tas peb hlis.
28 : 1 - 10.**

28 1 Thaum peb dim los txog tas lawm, peb thiaj paub tias lub pov txwv ntawd hu ua Mes Lis Tas. 2 Cov neeg nyob txawm ntawd ua zoo kawg rau peb. Vim no no thiab los los nag, ces lawv rauv ib cub tawg loj txais peb.

3 Paj Lug txawm khaws ib tsuag taws qhuav los pov rau hauv lub cub tawg. Hluav taws sov, ces ib tug nab ntsuab tawm hauv tsuag taws los rig Paj Lug txhais tes. 4 Thaum cov Mes Lis Tas pom tus nab dai ntawm Paj Lug tes, mas lawv sib ntxhi tias : "Tus neeg ntawd yeej yog ib tug niag tua neeg tseeb tseeb li nttag ! Nws nyuam qhuav dim ntawm dej ntuj los, tsis kav Ntuj tsis kheev nws ua neej nyob." 5 Tiam sis Paj Lug nchos tus nab ntsuab rau hauv hluav taws, nws tsis hnov mob qhov twg. 6 Hos cov Mes Lis Tas xav tias ntshai Paj Lug txhais tes yuav o, thiab nws yuav tuag tam sid.

Lawv tos tos tsis pom dab tsi ces lawv hloov tswv yim, lawv hais tias Paj Lug yog ib tug tswv ntuj.

7 Nyob tsis deb ntawm qhov chaw ntawd, muaj ib thaj av, yog tus ua hau saib lub pov txwv thaj. Tus hau ntawd hu ua Pus Nplis Yus. Nws xyiv fab txais peb, thiab yug peb tau peb hnub.

8 Thaum ntawd Pus Nplis Yus txiv tab tom mob npaws hnyav thiab zawa plab, nws pw xwb. Paj Lug mus xyuas nws, Paj Lug teev Ntuj thiab tso Paj Lug ob txhais tes rau saum nws, ces nws tus mob cia li zoo hlo. 9 Lawv pom li ntawd, mas tas cov neeg nyob hauv lub pov txwv tuaj cuag Paj Lug. Paj Lug kho lawv zoo tas tib si. 10 Ces cov Mes Lis Tas pub ntau yam ua tshav ntuj rau peb. Thaum peb yuav rov sawv kev mus, mas lawv ntim txhiam laj txhiam xws ntau yam rau peb.

Paj Lug mus txog Los Mas.

28 : 11 - 16.

11 Peb lub hlis tom qab, peb rov caij nkoy mus ntxiv. Yog ib lub nkoy As Les Xas Nrias uas nyob tos hauv lub pov txwv no, kom ntuj no dhau tso. Lub nkoy muaj ob kwv tij mlom dab Dis Yos Kus Los nyob pem hauv nkoy. 12 Peb nqes nkoy nyob Xis Las Kus Xas. Peb nyob ntawd peb hnub. 13 Peb rov caij nkoy raws ntug dej mus txog Les Zias. Hnub tom qab, cua sawv sab Naj tuaj, peb mus ib hnub ntxiv ces peb mus txog Pus Tos Lis.

14 Peb ntsib ib co kwv tij nyob Pus Tos Lis. Lawv thov kom peb nrog lawv nyob xya hnub. Ces peb mam li mus Los Mas. 15 Cov kwv tij hauv lub nroog Los Mas hnov tias peb tuaj txog, mas lawv tuaj tos peb txog puag tom lub tshav As Pias thiab txog ntawm lub zos hu ua Peb Chav Tsev

Haus Cawv. Paj Lug pom lawv, mas nws

ua Tswv Ntuj tsaug, thiab nws lub siab rov loj tuaj.

16 Thaum peb tuaj txog hauv Los Mas lawm, mas lawv cia Paj Lug nws nyob nws hauv ib lub tsev, tsuas muaj tus tub rog uas zov nws nrog nws nyob xwb.

Paj Lug nrog cov Yus Das nyob Los Mas sib fim. 28 : 17 - 22.

17 Peb hnub tom qab, Paj Lug nqua hu cov thawj coj Yus Das hauv lub nroog tuaj sib txoos ua ke. Thaum lawv tuaj txog tas, Paj Lug hais rau lawv tias : "Kwv tij, kuv tsis tau ua dab tsi txhaum peb haiv neeg, los txhaum peb cov yawg koob tej kev cai, tsis kav lawv ntes kuv nyob Yes Lus Xas Les, thiab lawv muab kuv rau cov Los Mas. 18 Thaum cov Los Mas tshuaj lus tas, lawv xav tso kuv mus, vim kuv tsis tau ua dab tsi txaus ris lub txim tuag. 19 Tab sis cov Yus Das tsis kam tso, mas kuv thiaj tau hu txog Xes Ntxas. Tsis yog vim kuv xav liam dab tsi rau kuv haiv neeg. 20 Vim li no, mas kuv thiaj xav nrog nej tham thiab hais qhia nej paub. Yog vim His Xas Lais txoj kev tso siab, mas kuv thiaj li raug txoj saw no khi."

21 Cov Yus Das teb rau Paj Lug tias : "Peb tsis tau txais ib tsab ntawv dab tsi tuaj Yus Das teb tuaj, uas yuav hais txog koj. Hos cov kwv tij uas tuaj txog ntawm no, los kuj tsis tau hais, tsis tau tham dab tsi phem txog koj. 22 Tab sis peb xav hnov koj lus, txog qhov koj xav, vim yog hais txog ntawm pab neeg no, mas peb kuj paub tias lawv raug luag cem nyob txhua qhov chaw ntag !"

Paj Lug qhia txoj kev ntseeg tshiab rau cov Yus Das. 28 : 23 - 28.

23 Paj Lug teem hnuv yuav rov sib ntsib. Ces lawv tuaj coob coob hauv nws tsev, nrog nws tham. Paj Lug nthuav nws zaj lus rau lawv txij thaum sawv ntxov mus txog tsaus ntuj. Nws ua tim khawv piav txog Tswv Ntuj lub Ceeb Tsheej, nws nrhiav tej lo lus zoo ua kom lawv ntseeg txog Yes Xus. Nws muab cov lus nyob hauv Mais Xes Txoj Cai thiab cov yaj saub cov ntawv los qhia txog Yes Xus.

24 Ib txhia ntseeg cov lus Paj Lug hais, hos ib txhia tsis kam ntseeg. 25 Ua li mas lawv hais tsis haum, ces lawv nyias rov mus nyias zom zaws. Paj Lug tseem txhab ib lo lus ntxiv rau lawv tias : "Thaum Leej Ntuj Plig Ntshiab hais cov lus no rau nej cov yawg koob, mas nws hais raug nej kawg. Leej Ntuj Plig Ntshiab qhia tus Yaj Saub His Xais kom hais tias :

26 'Koj mus hais rau haiv neeg no tias : Nej pob ntseg yuav hnov, tiam sis nej yuav tsis to taub. Nej yuav ntsia, tiam sis nej yuav tsis pom.

27 Vim tias haiv neeg no lub siab ruam, lawv lag ntseg, lawv qi muag, kom lawv txhob pom, thiab txhob hnov, tsam lawv lub siab ho to taub, ces lawv yuav tsum tig los yuav ib lub siab tshiab, thiab tsam kuv ho kho lawv zoo hlo.'

28 Ua li mas nej yuav tsum paub mog : Tswv Ntuj xa txoj kev cawm neeg no mus rau cov neeg teev dab lawm. Lawv mas lawv yuav mloog !" [29...]

**Paj Lug nyob Los Mas ob xyoos.
28 : 30 - 31.**

30 Paj Lug nyob tau ob xyoos nkaus hauv lub tsev uas nws ntiav. Nws txais cov neeg uas tuaj xyuas nws tas huv tib si.

31 Nws tshaj cov lus txog Tswv Ntuj lub Ceeb Tsheej, thiab qhia txog Huab Tais Yes Xus Pleev. Nws tso siab lug qhia, tsis muaj leej twg txwv nws li.